




fig. 50



Division

SCB

Section

1608

Robert Harvey  
Augusta

---

Handwritten text, possibly a signature or title, in dark ink, appearing to read "Handwritten" or similar, followed by a horizontal line.



# APOLOGIE POVR CEVX DE LA RELIGION.

*SVR LES SVIETS D'AVER-  
sion que plusieurs pensent auoir contre  
leurs personnes & leur creance.*

Par MOYSE AMYRAVT.



Se vendent à Charenton,  
Par SAMVEL PETIT, Marchand Libraire,  
demeurant à Paris dans la court  
du Palais, à la Bible d'Or.

---

M. DC. XLVIII.

APOLLO

OF THE

RELIGION

OF THE

OF THE

OF THE

OF THE



OF THE

OF THE

OF THE

OF THE

OF THE



A

MONSIEVR  
MONSIEVR  
SARRAV,  
CONSEILLER  
DV ROY EN SON  
PARLEMENT.



MONSIEVR,

*Je crains aucunement  
que ceux entre les mains de qui cette  
Apologie tombera , n'y trouuent d'a-*

## ÉPISTRE.

bord deux choses un peu estranges.  
L'une, qu'estant expressement dressée  
pour diminuer l'auersion que tant de  
gens ont contre nous, elle sort d'un  
lieu où nous en experimentons beaucoup  
moins que plusieurs de nos freres ne  
font ailleurs, & où nous ioüissons d'une  
grande paix, par la prudence & par la  
generosité de ceux qui nous gouvernent.  
L'autre, qu'estant particulierement de-  
stinée à nous rendre les Magistrats equi-  
tables dans les Prouinces, ie la vous de-  
die, MONSIEUR, qui faites partie  
de cét auguste Parlement, dans l'equité  
duquel nous auons accoustumé de trou-  
uer du support, lors qu'on nous fait de-  
çà delà quelques traitemens peu fauo-  
rables. Car il semble que cette sorte  
d'Esçrits contienne quelque tacite plainte  
de ce qu'on a besoin de les publier. Or  
les plaintes ne sont pas seantes en la  
bouche de ceux qui en ont peu de sujet;

## E P I S T R E.

Et si quelque raison nous induit à nous  
 interesser en ce qui touche nos freres, on  
 peut dire que nous deurions plustost nous  
 adresser aux auteurs de leurs mescon-  
 tentemens, pour leur oster les mauuai-  
 ses impressions qu'ils ont contre nous,  
 Et leur en donner de meilleures. Mais  
 j'espere pourtant, MONSIEUR, que  
 quiconque prendra la peine de lire ce  
 petit ouurage, se deliurera aisément de  
 cet estonnement par ces considerations.  
 Tous ceux de la Religion qui sont en ce  
 Royaume ne constituent qu'un mesme  
 corps, en qui le desplaisir de chacun  
 de ses membres est sensible à tous les  
 autres. Comme donc il arrive au corps  
 humain, que quelques-fois la partie où  
 est le siege de la douleur, est fort esloi-  
 gnée de celle d'où sortent les gemisse-  
 mens & les souspirs, Et neantmoins  
 tant s'en faut qu'on blasme en cela  
 l'institution de la Nature, qu'on

## EPISTRE.

*admire la sagesse de son autheur, qui luy  
 a donné ces sentimens : si quelques-uns  
 de nos freres ont occasion de se plaindre  
 en des lieux separez de nous, on ne  
 doit nullement trouver mauuais que la  
 communion d'une mesme foy nous en  
 inspire la sympathie. Quant à nous,  
 bien que par la grace de Dieu nous  
 ayons tout sujet de nous louer de l'e-  
 quité du gouvernement sous lequel nous  
 viuons, nous sçauons pourtant quelle  
 est quasi par tout l'inclination des pe-  
 ples, & que si l'authorité superieure ne  
 la retenoit, icy comme ailleurs nous  
 esprouuerions le desaduantage qu'il y  
 a d'habiter parmy des gens mal affe-  
 ctionnez, quand la balance n'est pas  
 esgale. C'est pourquoy si outre la con-  
 duite de nostre vie, dont ceux avec qui  
 nous conuersons ont leurs yeux mesmes  
 pour tesmoins, nous taschons de les in-  
 former de la pureté de nostre creance &c)*



## EPISTRE.

de l'innocence de nos sentimens , nous le faisons & par deuoir & par interest. Car nous sommes obligez de leur donner , s'il est possible , quelque teinture de la verité , & nous affermirons par ce moyen dauantage nostre repos , quand ils n'auront plus cette mauuaise opinion de nostre Religion , qui leur donne quelque haine couuerte contre nos personnes. Pour ce qui est de vous , MONSIEVR, soit que l'on vous considere en la dignité que vous possédez , où bien en la profession de Religion que vous faites , cét Ecrit ne pouuoit estre mieux adressé qu'à vous. En ce premier esgard c'est non tant une plainte des déportemens d'autrui , ny une iustification des nostres , & de la Foy que nous suiurons , qu'une action de graces que nous rendons en vostre personne à cette illustre Cour dont vous estes membre , de ce que par l'autorité de ses Arrests,

## EPISTRE.

elle a diuerses fois corrigé ce qu'il y peut auoir eu d'excessif dans le zele des autres Iuges. En ce second, s'il y a quelqu'un des Senateurs qui la composent, qui desire d'estre esclaircy de la sincerité de nos pensées, pour en estre d'autant plus enclin à nous rendre iustice aux occasions, le credit que vostre rare vertu vous donne entre eux, adiousterà beaucoup d'efficace aux choses que ie represente. A la verité vostre singuliere suffisance, & la parfaite cognoissance que vous auez de ce qui est de nostre profession, n'auoient point besoin d'estre aidées de ma meditation, pour donner de bonnes opinions de nous dans les occurrences. Aussi ne me suis-je nullement proposé de vous instruire en rien de ce qui y peut contribuer; pour ce que vos cognoissances passent bien loin au delà de ces reflexions toutes simples & populaires. Je veux dire



## EPISTRE.

seulement que vostre nom peut donner beaucoup d'accès à cét Ouvrage , vers ceux qu'il est expedient que nous informions plus exactement de nos creances & de nos inclinations , & que la reputation de vostre rare probité est capable de nous mettre bien en l'esprit de ceux qui pourroient avoir esté preuenus de quelques mauuais preiugez par nos aduersaires. Quoy qu'il en soit , il importe que l'on sçache , que comme vous estes absolument de mesme creance avec les Ministres de la Religion que vous professez , dans la doctrine de la Foy , les Ministres sont entierement de mesme opinion avec vous en ce qui est du Politic , & de l'obeïssance que les sujets doiuent à leurs Princes. En l'un il est manifeste que ce n'est pas tant le serment & l'obligation de vos charges , qui vous attachent , vous & ces autres Messieurs qui sont de nostre Religion .

## EPISTRE.

dans les Parlemens , au service de sa  
 Majesté , que le lien de la conscience &  
 le genie de la Foy que nous vous pres-  
 chons , puis que vos sentimens & les  
 nostres y sont conformes. En l'autre il  
 paroist que c'est la cognoissance de la  
 verité , & non aucun interest de no-  
 stre condition , comme quelques-uns se  
 l'imaginent , qui nous affectionne aux  
 dogmes que nous vous annonçons dans  
 la matiere du salut , puis que vous en  
 estes persuadez comme nous , & que vous  
 y perseuerez si constamment, quoy qu'au-  
 cune des raisons du monde ne vous y  
 arreste. Mais quand ie mettray tou-  
 tes ces considerations à part , il me  
 semble que i'ay grande occasion d'ail-  
 leurs de concevoir une confiance bien  
 certaine , que vous prendrez en bonne  
 part ce mien dessein de mettre vostre  
 nom sur le front de ce petit labeur , &  
 que tout le monde l'approuuera , bien

## EPISTRE.

que les autres causes que i'en ay luy  
 fussent entierement incognues. C'est  
 que n'eusse-je point tant de tesmoignages  
 de l'honneur de vostre bonne volonté,  
 vostre exemplaire pieté, vostre sçavoir  
 eminent, connu dedans & dehors le  
 Royaume, & le reste de vos excellen-  
 tes vertus, me conuieroient à donner  
 quelque tesmoignage au public que i'en  
 fais une estime tout à fait extraordi-  
 naire. Et quand les belles & grandes  
 qualitez que Dieu a mises en vous,  
 n'attireroient point si puissamment  
 mes respects, cette tendresse d'affec-  
 tion dont il vous plaist me fauoriser,  
 m'oblige, si ie ne veux estre ingrat, à  
 vous en faire une solennelle reco-  
 gnissance Receuez-là donc, s'il vous  
 plaist, MONSIEUR, du mesme  
 œil duquel vous auez accoustumé de  
 voir son autheur, & continuez de croire,  
 comme vous auez fait depuis que i'ay

## ÉPISTRE.

*le bien d'estre cognu de vous , qu'il n'y  
a personne qui fasse des vœux plus ar-  
dens que i'en fais à Dieu pour vostre  
entiere prosperité , ny qui soit plus in-  
violablement ,*

MONSIEVR,

De Saumur, ce  
iour de Pasques  
1647.

Vostre tres-humble &  
tres - obeissant ser-  
uiteur,  
AMYRAVT. ]



## *ADVERTISSEMENT.*

**C**omme i'appelle ordinairement en cette Apologie ceux de nostre communion, les Reformez, aussi i'employe souuent ces mots de Catholiques Romains, & quelquesfois celuy de Catholiques tout seul, pour signifier ces Messieurs de la communion de Rome. Si l'on prenoit ces termes autrement que comme des noms, par lesquels on designe ces deux communions differentes, & si l'on y auoit égard à la qualité pour laquelle ils ont esté premierement attribuez chacun à son sujet, il y auroit de la contradiction en l'usage de ces deux appellations. Car celle de Reformez signi-



*Aduertissement.*

fi la profession de ceux qui ont repurgé la Religion de ce dont la corruption du temps l'auoit alterée. Et quant à celle de Catholique, elle fut premierement appliquée à l'Eglise Chrestienne, pour la distinguer d'auec la Iudaïque, pource que le Christianisme n'est affecté à aucune particuliere nation, & doit courir par tout l'Vniuers. Mais depuis on s'en est seruy pour distinguer les Orthodoxes d'auec les Sectaires, qui s'estoient separez de la communion de cette Eglise à qui le Symbole auoit, comme il y a apparence, le premier donné ce nom. Ainsi ce seroit mal à propos que i'appellerois les vns Orthodoxes, & les autres Reformez : pource que la Reformation presuppose qu'on a degeneré de l'Orthodoxie, & si elle fust demeurée

*Aduertissement.*

en son entier en l'Eglise, il n'eust pas esté nécessaire de la reformer. Mais deormais ce nom de Catholique a passé en vn tout autre vſage, & ne signifie rien autre chose sinon ceux qui font profession du Christianisme, tel qu'il estoit en l'Europe auant la predication de Luther: comme on employe celuy de Protestans & de Reformez, pour denoter ceux qui le professent tel qu'il est en la communion laquelle s'est separée d'auec Rome. Et n'y a rien de si ordinaire que de voir ainsi passer les noms d'une signification à l'autre, ny rien de si indifferent que leur vſage quand vne fois le temps & la coustume en ont autorisé le changement. l'appelle donc Messieurs de l'Eglise Romaine Catholiques, comme plusieurs honnestes gens d'entre-eux

### *Aduertissement.*

nous nomment ceux de la Religion ; & ne seroit pas raisonnable que ny eux ny moy tirassions auantage de ce respect ou de cette ciuilité , pour le fonds de la Controuerse. Pleust à Dieu que nous ne fussions en dispute que des noms: ceux qui sont de bon sens ont toujours remarqué qu'ils ne font du tout rien aux choses.







# APOLOGIE POVR CEVX DE LA RELIGION.

*Sur les sujets d'auersion que plusieurs  
pensent auoir contre leurs person-  
nes & leur creance.*

---

## DESSEIN DE L'OVVRAGE.

**B**IEN que par la grace de Dieu, & par la bonté de nos Rois, nostre condition soit merueilleusement differente de l'estat auquel estoient les Chrestiens autrefois, lors que Iustin Martyr & Tertullian écriui-  
rent leurs Apologies, si ne laissons nous

pas d'estre necessitez par l'auerfion que beaucoup de gens ont contre nous, d'entrer en quelque iustification de nos deportemens & de nostre creance. Car il est bien vray que nous viuons en paix sous la protection des Edicts de nostre Souuerain, & que la Reine sa mere, depuis qu'elle a le gouuernement de l'Estat entre les mains, a tousiours de sa grace déclaré qu'elle vouloit qu'ils fussent ponctuellement entretenus. Nosseigneurs de son Conseil secondent ordinairement ses bonnes intentions, & nous aurions tort si nous ne recognoissions qu'en diuers lieux la douceur & l'equité des Gouverneurs, & la iustice des Magistrats nous donnent plus de sujet de nous louer d'eux, que de nous plaindre de la seuerité de leur conduite. Comme la Noblesse a d'ordinaire les sentimens éleuez & genereux, il y en a grand nombre de cette condition, qui sans s'arrester à la differēce des religions, estiment l'honneur & la vertu par tout où elle se rencontre. Et generalement en toutes sortes de professions il se trouue par tout d'honnestes gens, que non seulement la diuersité de la creance n'empes-

che pas de viure avec nous ciuilement, mais de la bonne volonté de qui nous pourrions bien nous asseurer dans les occurrences les plus importantes. Mais neantmoins il ne se peut pas nier qu'il ne se rencontre quantité d'occasions, où le traitement que nous receuons de la part de quelques-vns de ceux à qui l'administration des choses publiques a esté commise, porte des marques indubitables de la mauuaise disposition de leurs esprits en nostre endroit. De sorte que les bonnes volonteés de sa Majesté, qui sont comme autant de douces & fauorables influences, qui deuroient se respendre en toutes les parties du Royaume où nous en auons besoin, sont interceptées auant qu'elles viennent iusques à nous, ou au moins tellement alterées & debilitées par la mauuaise constitution des esprits par lesquels elles ont à passer, qu'elles ne produisent pas à beaucoup près tous les effets auxquels elles sont destinées. En effet, soit qu'il s'agisse des choses qui nous ont esté oëstroyées par les Edicts, nous trouuons assez souuent des difficultez tres considerables à les obtenir, & mesmes quelques-

fois des oppositions & des embarras qui nous sont entierement insurmontables. Soit qu'il s'agisse de celles qui peuuent estre communes à tous les sujets du Roy, la difference notable qu'on y met à nostre desauantage entre les Catholiques Romains & nous, en vne infinité de rencontres, est vne preuue trop authentique de la haine que nous portent quelques-uns de ces Messieurs, à qui la puissance souueraine a remis la dispensation de quelque partie de son autorité. Quant à ce qui regarde les peuples en general, comme ils ont accoustumé d'estre plus extremes en toutes choses, & de se laisser emporter à leurs mouuemens avec moins de circonspection, ils descouurent pour la pluspart, où les occasions s'en presentent, vne si mauuaise inclination contre nous, que sans la protection de sa Majesté, & l'autorité des Gouverneurs, & la retenue des Magistrats, nous aurions sans doute beaucoup à souffrir de ce costé là. Or sçauons nous fort bien qu'apres la bonne Prouidence de Dieu, qui tient les cœurs des Grands & des petits en la main, le plus efficace remede que nous puissions appor-



ter à ce mal, despend de nostre patience, & de la tranquillité de nos esprits. Neantmoins, n'estant aucunement à presumer qu'en des hommes en qui l'on void d'ailleurs tant de belles propensions à l'équité, il se rencontrast de si mauuaises dispositions en ce qui nous concerne, s'ils n'estoient imbus de fort sinistres prejuges contre nos personnes, & contre la Religion que nous professons, il est toujours iuste & raisonnable, & mesmes aucuncfois absolument necessaire, que nous taschions de les informer autrement. Et quoy que depuis vn peu plus de cent ans qu'il y a qu'on commence à parler de nous en ce Royaume, nous ayons essayé de le faire par vne infinité d'escrits de differentes façons, si est-ce que le mal ne se guerissant point entierement, & mesmes se renouellant de temps en temps en diuers symptomes, i'ay creu qu'il ne feroit pas inutile que ie contribuasse aussi quelque chose de ma part à le diminuer. Ce n'est pas que ie doie auoir cette opinion de moy que ie puisse produire quelque chose, ou qui n'ait point esté dite par ceux qui nous

ont deuancez , ou qui sortant de ma plume puisse auoir plus d'efficace que la leur ne luy en a peu donner. Il est sorty par le passé tant de beaux traüaux en lumiere , qui pouuoient seruir à ce dessein, soit qu'on y regarde la profondeur du sçauoir , ou l'excellence de l'éloquence, que ce seroit trop de presumption à moy si ie me proposois seulement de les égaler. Mais comme c'est vn precepte de medecine, quand on s'est pris à traiter vn mal, de n'abandonner pas sa methode, encore qu'elle ne produise pas tout l'effet que l'on desire , pourueu qu'elle soit fondée en bonne raison ; aussi est-ce vne pratique de la prudence, de ne desister pas d'inculquer les mesmes choses à des esprits preoccupez, encore qu'on n'y reüssisse pas entierement , pourueu qu'elles soient conformes à la verité , & propres à les desabuser de leurs opinions anticipées. Toignez à cela que les Liures ont leur temps, & que plusieurs qui ont esté bien receus au siecle passé, sont en cestuy-cy quasi peris de la connoissâce des hommes; soit que le changement qui arriue quasi iournellement au langage, nous

dégousté des Escrits en qui nous voyons trop de marques du stile de nos ayeuls, ou qu'il y ait à cette heure quelque air en la façon non seulement de s'exprimer, mais de concevoir les choses mesmes, qui leur donne plus d'agrément & de lumiere qu'elles n'en auoient auparauant. Pour moy, bien que ie ne sois pas de ceux qui se plaisent extremement aux choses nouvelles, & que quand ie ne le dirois pas, i'ay peur que mon elocution ne fasse que trop paroistre que ie ne m'applique pas beaucoup à la lecture des Autheurs qui ont donné à nostre langue la delicatesse & les ornemens dont les esprits polis font maintenant tant de cas; i'espere pourtant dresser cette Apologie de telle sorte, qu'on ne pourra pas dire que ce ne soit qu'une simple repetition de ce que les autres ont déjà mis en auant. Car ce n'est nullement mon intention d'entrer dans l'examen de ces Controuerses de religion qui exercent les Chrestiens depuis vn si long-temps, & qui bien souvent ont esté traittées de telle maniere, qu'elles ont fait vn effet tout contraire à celuy que ie me propose icy: pour ce

que ie desire reconcilier tant que ie pourray les volonteze des hommes à ceux de nostre profession , au lieu que le plus ordinairement ces contestations les irritent.

Et puis , c'est vne mer dont vn dessein de si petite estenduë qu'est le mien , ne scauroit trouuer ny la riue ny le fonds. La subtilité des raisonnemens y surpasse bien souuent la portée des esprits du peuple : la multitude des allegations dont chacun des deux partis a accoustumé d'appuyer son sentiment , requiert plus de temps à les examiner que les occupations des Magistrats ne leur permettent d'y en donner : & enfin , la passion qui se melle partout sous l'apparence du zele , & le desir de vaincre qui l'emporte assez souuent par dessus l'amour de la verité , met en ces disputes tant de tenebres & de confusion , qu'auant que ceux de l'autorité de qui nous dependons ayent peu venir à bout de les demesler , les fascheuses opinions dont ils ont l'esprit saisi , produisent vne infinité d'effets à nostre dommage. Il y pourroit auoir vn moyen de resoudre ces difficultez , qui requerroit beaucoup moins de temps , & dont le succez seroit



incomparablement plus certain & plus favorable. C'est que les principales & plus fondamentales creances du Christianisme nous estant communes à l'Eglise Romaine & à nous, il ne faudroit que voir dans les choses dont nous disputons, ce qui s'accorde avec ces principes, & ce qui ne s'y accorde pas, comme on fait lors qu'il est question de decider ce qui pourroit estre douteux dedans les autres sciences. Car puis que iamais vne verité ne choque l'autre, au lieu que le mensonge souuent se ruine soy-mesme, & ne s'a iuste iamais avec la verité; ce qui se trouueroit contreuenir aux dix Commandemens de Dieu, à la priere de nostre Seigneur, & au Symbole de ses Apostres, deuroit estre tenu sans difficulté pour rejettable, puis que nous receuons pour diuines & veritables ces formules de la creance de tous les Chrestiens. Mais on s'est engagé si auant dans cette autre maniere de disputer par autoritez & par tesmoignages, tant des anciens que des modernes, qu'il n'est pas aisé de s'en retirer. Iay donc intention de monstrier par vne voye beaucoup plus courte, que soit qu'on nous regarde

comme des hommes, & dans les deuoirs  
auxquels nous sommes obligez les vns  
enuers les autres entant que tels; car c'est  
la premiere chose qui doit venir en con-  
sideration; nous ne meritions nullement  
l'auerfion que tant de gens ont contre  
nous. Soit qu'on nous considere comme  
François, & sujets d'un mesme Prince  
auec tous les autres habitans de cét Em-  
pire, il y a quantité de raisons pourquoy  
nos plus grands ennemis deuroient vs-  
er de toute sorte d'equité & de iustice en no-  
stre endroit. Soit enfin qu'on ait esgard à  
la qualité de Chrestiens que nous por-  
tons, on ne nous scauroit haïr pour le  
Christianisme tel que nous le croyons,  
sans pecher contre la loy de Christ, & la  
charité de son Euangile. Or comme mon  
dessein, & mon deuoir, & mon inclina-  
tion encore me portent à deduire tout ce-  
la sans aucune passion, j'espere que ceux  
entre les mains de qui cette Apologie  
tombera, n'en apporteront point non plus  
que moy à lire ce que j'écriray pour la  
iustification de nos Eglises.

## SECTION I.

*Que si on considere ceux de la Religion dans les devoirs auxquels ils sont obligez envers les autres entant qu'hommes , ils ne sont dignes de l'aersion de qui que ce soit.*

Pour commencer par la premiere de ces choses, l'homme a ces deux qualitez qui le distinguent d'avec tous les animaux, qu'il est premierement raisonnable, & puis apres politique; ce qui vient en consequence de la raison: c'est à dire, qu'il use d'intelligence en ce qu'il entreprend de faire, & s'y porte par la connoissance qu'il a de la nature de ses objets; & qu'il est propre à la societé, & destiné par la nature à viure en la compagnie des autres hommes comme luy. On ne scauroit donc raisonnablement rien desirer de nous en cét esgard, pour nous rendre dignes de l'humanité & de la bonne volonté de tout le monde, sinon

qu'en ce qui regarde les sentimens & la creance, nous ne tenions & n'enseignions rien qui destruisse les loix de la vertu morale, de laquelle tous les hommes sont capables par l'usage de la raison, ny qui corrompe cette inclination que nous devons tous auoir à entretenir vne iuste societé avec ceux avec qui nous auons à viure. Et pour ce qui concerne la pratique de ces loix de la vertu, & notamment l'exercice de l'equité & de la iustice, qui est la base & le lien de cette societé: On ne doit non plus requérir de nous, pour estre dignes de l'amitié des autres hommes, sinon que nous conduisions nostre conuersation de sorte qu'on ne puisse nous accuser de faire le contraire de ce que nous enseignons. Or pour ce qui est de nostre creance, quel que soit le reste de la doctrine que nous embrassons en matiere de Religion, tant y a que les enseignemens moraux que nous donnons à ceux de nostre profession pour modele de leur vie, n'ont iamais esté blasmez par nos plus grands & plus enuieuz aduersaires, de heurter le moins du monde contre les principes de la vertu. Nos gens ont

fait des recueils des opiniōs des Casuistes, où ils ont ramassé quantité de choses qui semblent contrarier aux sentimens d'une bonne conscience, & corrompre les semences de l'honnesteté, & de la pudeur, & des autres bonnes qualitez que la nature met en nous. Ces Messieurs de la communion de Rome, qui tiennent le party de l'Vniuersité de Paris contre les Iesuites, ont publié leur Theologie morale, & diuers autres lieux communs de leurs opinions, où ils les flestrissent du blasme d'enseigner vne infinité de choses contre les loix diuines & humaines, & qui ouurent la porte toute large à la fraude, à la perfidie, à la vengeance, à l'auarice, & à la dissolution. Mais quant à nous, quoy que nous ne manquions pas de mauuais amis, qui ne nous espargneroient pas s'ils trouuoient quelque chose à reprendre en nous en cette matiere, si est-ce que iusques à cette heure il ne s'en est trouué aucun qui ait eu assez de hardiesse pour nous imputer rien de tel. Et veritablement on ne le scauroit faire sans vne extreme impudence, & contre toute apparencé de raison. La Parole de Dieu estant de tous



les Liures du monde celuy qui sans comparaiſon eſt le plus propre à former les hommes à toutes choſes dignes de louange, nous l'auons expreſſement tournée en langue vulgaire, & la mettons entre les mains meſmes des petits enfans, afin que toutes ſortes de perſonnes y apprennent de bonne heure en quoy la vraye vertu conſiſte, & quels ſont les vrais motifs qui nous y doiuent porter. Les Predicateurs d'entre nous ſement tous leurs propos particuliers, & toutes leurs actions publiques d'enſeignemens de meſme nature, & bonne partie des leçons qu'ils font dans les Academies, ont cette matiere pour ſujet. Sur tout ils ne concluent iamais leurs predications que par des exhortations à mener vne vie où toutes bonnes qualitez reluiſent, & ne traittent aucune doctrine, pour ſublime qu'elle puiſſe eſtre, ou pour debatue qu'elle ſoit entre les Catholiques & les Reformez, qu'ils ne ramenant aux inſtructions qui ſeruent à mener vne vie honneſte, & d'où ils ne tirent quelques aiguillons capables d'y exciter les affectiōs de leurs auditeurs. Outre la lecture de la parole

de Dieu, & l'usage de la Predication, le monde, par maniere de dire, est remplý de liures que nous auons faits pour expliquer en quoy la vraye vertu est recommandable, quels sont les commandemens que Dieu nous en a donnez: quelles les esperances qu'il propose à ceux qui s'y adonnent: quelles les menaces qu'il fait à ceux qui la mesprisent, & combien la doctrine de l'Euangile a adjousté de poids à ce que la Loy nous en enseignoit auparauant. Et ce que i'ay dit de la vertu morale en general, se peut dire en particulier de l'exercice de la Iustice, de laquelle despend la conseruation de la societé: Car il n'y a deuoirs de maris enuers leurs femmes, ny de femmes enuers leurs maris, ny de peres enuers leurs enfans, ny de bons enfans enuers leurs peres, que nous ne proposons, & que nous ne representions sans cesse à tous ceux qui les doiuent pratiquer. Il n'y a ny humanité & equité des maistres enuers leurs seruiteurs, ny respect & obeissance des seruiteurs à l'endroit des maistres, à quoy on n'induise perpetuellement parmy nous ceux en qui il se rencontre de telles

relations. Il n'y a aucun entre nous, de quelque condition que ce puisse estre, qui soit sujet aux Magistrats, aux Gouverneurs, & generalement à tous ceux en qui il y a quelque degré de superiorité, à qui on n'enjoigne & tres-expressément & continuellement de ne rien oublier de la reuerence & de l'honneur qu'on doit à ceux qui sont en ces charges, & à qui on ne donne à entendre qu'elles sont de l'institution de Dieu. Il n'y a qui que ce soit à qui on ne fasse cognoistre qu'à cause de cette institution, ce ne doit pas seulement estre la crainte de la vengeance, qu'ils ont toute preste en la main contre ceux qui mesprisent leur autorité, mais principalement le mouuement de la conscience, pource que Dieu le veut ainsi, qui nous porte à obeïr à leurs ordonnances, quand l'honneur de Dieu & le salut eternal de l'homme n'y est point interessé. Il n'y a personne entre nous qui porte la qualité de Magistrat, ou en qui la Puissance souveraine ait imprimé quelque caractere de sa grandeur, à qui on ne represente par la parole de Dieu, quelle est la façon dont les Superieurs se doiuent comporter envers



enuers leurs inferieurs, & particuliere-  
ment comment ils doiuent rendre la iu-  
stice vniuersellemēt à tous, sans acception  
de personnes, & sans autre consideration  
que celle de la verité, de l'equité, & du  
droit. Enfin il n'y a ny petit ny grand dans  
nostre profession, qui ait ou commerce ou  
liaison avec vn autre, ou parenté, ou al-  
liance, ou voisinage, ou communication,  
qui ne soit iournellement incité à rendre  
à chacun ce qui luy appartient, & à mettre  
en vsage en toutes choses cette regle de  
charité, de ne point faire à autruy sinon  
ce qu'il voudroit qu'on fist à luy-mesme.  
Et pource que c'est par l'vnion & par la  
bonne intelligence que les societez se  
maintiennent, & qu'au contraire c'est la  
discorde & la diuision qui les perd, il n'y a  
aduertissement qui resonne si souuent en  
nostre bouche, ny qui remplisse si vniuer-  
sellement toutes les actions publiques &  
les entretiens particuliers de ceux qui ont  
la charge de nous enseigner, que celuy de  
conseruer inuiolablement la paix avec ses  
prochains, & de relascher & beaucoup de  
ses passions, & beaucoup de ses interests,  
afin de l'entretenir avec tout le monde. le

diray encore quelque chose d'auantage. Tant s'en faut qu'on ait aucune occasion de haine à l'encontre de nous, comme si nostre creance estoit pour renuerfer ou la iustice, qui soustient la societé, ou les autres vertus morales, qui conuiennent à l'homme entant qu'il est doué de raison, que nos Eglises ont fait certains reglemens, & estably certaines sortes de censures, qui nous obligent à vne plus grande integrité de vie, que les autres n'y sont obligéz par les loix communes sous lesquelles nous viuons. Car les loix publiques n'ont autre esgard sinon à ce que la societé ne soit point manifestement violée, ny par l'adultère, ny par le meurtre, ny par le larcin, ny par les autres crimes esclattans, dont on a tousiours creu que l'impunité tire necessairement apres soy la ruïne de la Republique. Quant aux autres choses ou ny le particulier, ny le public ne semble pas estre si notoirement endommagé, les Magistrats n'ont point accoustumé d'en prendre cognoissance, & quelques-vns mesmes d'entr eux ne font point de difficulté de s'y laisser quelquefois aller : au lieu que nous auons parmy

nous vne Discipline qui deffend les ieux qui sont purement de hazard, comme derogans au respect qu'on doit à la diuine Prouidence, & à l'excellence de l'homme, à qui la prudence & l'industrie a esté donnée pour conduite & pour moderatrice de toutes ses actions. Elle ne souffre ny les comédies, ny les mommeries, ny les danses, pource qu'elle a creu que ce sont choses indignes de la grauité des gens sages, qui peuuent mesme effleurer ou corrompre tout à fait la pudicité de l'vn & de l'autre sexe, & qui au prejudice de ce que chacun doit aux choses de sa vocation, tirent avec elles vne manifeste perte de temps. Elle a mesme reglé iusques à la superfluité des habillemens, comme si c'estoit chose contraire à la modestie, & qui nourrist & fomentast l'inclination à la vanité. Et afin que les reglemens de cette discipline ne demeurent pas inutiles par l'inexecution, nous auons estably des Consistoires, composez des Ministres & des plus sages de ceux de nostre Communion sous la qualité d'Anciens, pour ordonner des reprehensions, des satisfactions, & des peines Ecclesiastiques qu'il faut appliquer à ceux

qui sont tombez en quelque vne de ces fautes, dont les Magistrats ne cognoissent point. Ce qui est pour reduire la vie des Reformez à vne vertu plus exacte & plus circonspecte que ne porte l'education & l'institution des autres, qui n'ont autre regle de leur conduite que la crainte des supplices qui sont infligez par les Loix. Or est-ce sans doute vn fort bel ordre, que les Politiques louent, & qu'ils accompagnent aux plus vtils Constitutions des Republiques les mieux policées, telle qu'estoit à peu pres la Censure entre les Romains.

*Bodin.  
lin. 6. de  
la Rep.  
ch. 1.*

Pour ce qui regarde la pratique de la vertu, quelque creance que l'on tienne au fait de la Religion, il n'y a personne qui ne sçache qu'elle est tousiours bien loin au dessous des loix qu'on fait pour nous y former, & des instructions qu'on nous y donne. Ceux qui en establisent les reglemens estans vuides de passions & d'interest pendant qu'ils y vacquent, n'ont rien qui les empesche de voir en leur naturel l'honesteté des choses louables. Et quãd ils en ont formé en leur entendemẽt la plus belle idee qu'il se peut, ils la representẽt toute



telle qu'ils l'ont cōceuë, de sorte que d'ordinaire il n'y a rien de si beau que les leçons que les Philosophes en font, ny que les constitutions que les Législateurs en ordonnent, ou qui en sont dressées par ceux à qui les Republiques donnent l'intendance des bonnes mœurs. Mais lorsqu'il est question de les reduire à l'usage, tant s'en faut que le commun des hommes, qui n'a pas accoustumé d'esleuer ses pensées si haut, & qui ne se represente pas la forme des belles choses si excellente, responde parfaitement en sa conuersation à toute l'integrité des bonnes loix, que mesmes ces grandes & genereuses ames, que Dieu a faites pour donner des exemples au genre humain, n'égalent pas de leurs actiōs tout ce qu'ils en ont conçu en la pensée. Car quand il faut venir aux choses particulieres où nos interests sont meslez, nos passions ne manquent iamais à s'émouuoir, & c'est merueille si elles ne corrompent la sincerité du iugement que nous faisons de ces belles idées de l'honnesteré & de la iustice, lors que nous les considerons sans esmotion. Il est bien vray que cette inclination que nous auons



naturellement à la société, aideroit beaucoup à nous conduire à la vertu, si nous avions toujours à converser avec des gens qui l'aimassent. Car leurs exhortations nous y porteroient, & comme l'homme se forme volontiers à l'imitation de ce qu'il voit faire continuellement, ainsi que ceux qui se pourmenent au Soleil se colorent sans y penser, nous tirerions sans doute insensiblement, mêmes sans exhortation, une belle teinture de l'honneur, de la continuelle fréquentation des gens de bien, & de la vue des bons exemples. Mais pource qu'il arrive qu'il y a toujours au monde plus grand nombre de vicieux que de vertueux, & qu'outre l'imitation, à laquelle nous sommes enclins, nous avons naturellement une fort violente pente vers le vice; sous quelque belle discipline que les hommes soient élevés, quelques belles institutions que l'on fasse pour leur faire prendre le pli de l'honnêteté & de la vertu, ils se trouvent toujours fort éloignés des préceptes qu'on leur en donne. Neantmoins il n'y a gueres de gens si peu versés en la connaissance des choses passées, ny si peu attentifs à la con-

sideration des presentes, qui ne recognoissent qu'autresfois ceux de nostre profession auoient en cét esgard vn merueilleusement grand aduantage par dessus leurs concitoyens, & que maintenant encore nous n'auons point si fort degeneré que pour cela nous en meritions la haine publique. En la naissance de nos Eglises en ce Royaume, & plusieurs années depuis, il ne s'entendoit entre nous ny blaspheme contre Dieu, ny mesdisance ou iniure contre les hommes. Les propos sales & les chansons lasciuës en estoient bannies absolument; c'estoit chose rare que de voir ceux de nostre Religion frequenter les cabarets, & les autres lieux, ou de berlan, ou de dissolutiõ; & s'il estoit arriué à quelqu'un de mettre le pied en ceux que la paillardise auoit diffamez, on le tenoit cõme vn monstre. La rondeur, l'integrité, la bonne foy, la sincerité estoient choses si ordinaires & si populaires parmy nous, qu'il n'y auoit pas à beaucoup près tāt de loüange & de recommandation à les pratiquer, que d'horreur & d'execration à encourir, si on ne les faisoit pas assez clairement reluire en toute sa vie. La charité

y estoit si exemplaire , notamment où il estoit besoin de soulager les pauvres & les souffreteux , qu'il sembloit quasi qu'on ne possedast rien en particulier , & qu'à l'imitation des premiers Chrestiens , chacun pensast que si Dieu luy auoit donné du bien, il l'en auoit plustost estably dispensateur pour la commodité d'autrui , que seigneur & possesseur pour ses propres auantages. La simplicité des habillemens estoit la marque extérieure de la modestie intérieure du cœur , & généralement toute la conuersation de nos ayeuls estoit pleine d'instruction & d'éducation , mesmes à leurs propres aduersaires. Au commencement à la verité , lors que la rigueur des mauuais traitemens obligeoit nos peres à faire leurs exercices de pieté la nuit, ou en des lieux cachez & reculez de la cognoissance des autres hommes , quelques-vns leur ont imputé d'y commettre des actions qui à peine se feroient entre les barbares. Mais quand on en a voulu prendre cognoissance , ou bien qu'on leur a donné la liberté de paroistre à la veüe du monde , la calomnie mesme a eu quel-

que honte de les en auoir accusez. Et pour eux, outre le tesmoignage de leur bonne conscience, qui leur estoit vn inuincible rempart contre ces horribles accusations, ils se sont consolez en la conformité qu'ils y ont eüe avec les premiers Chrestiens, que les Payens ont autresfois voulu diffamer des mesmes crimes. Maintenant comme personne ne nous met sus de si atroces & de si épouuentables actiõs, aussi aduõions nous franchement que nous ne meritons pas toute la loüange qui est deuë à la vie de nos predecesseurs. Car encore que nous ne le puissions faire sans qu'il nous en reuienne de la honte, si faut-il pourtant recognoistre que nous sommes beaucoup décheus de nostre ancienne pureté, & qu'il ne se void que trop ordinairement parmy nous des exemples de tous les vices qui ont la vogue dans le siecle. Je ne sçay si i'en dois accuser la commune condition de toutes les choses du monde, qui ne se maintiennent iamais constamment en vn estat; ou si nostre frequentation s'estant renduë plus ordinaire & plus familiere avec ceux qui font profession de viure plus licentieusement, no-

stre conuerſation s'eſt alterée par leurs exemples. Tant y a que noſtre lumiere a ſouffert vn grand obſcurciſſement, & que ſi on compare noſtre eſtat preſent avec celui des temps paſſez, peu s'en faut que ie ne die qu'en beaucoup de choſes, & en beaucoup de lieux à peine ſommes nous recognoiſſables. Neantmoins ſi on ne nous compare point avec nos peres, en quoy ſans doute nous auons du deſauantage tant & plus, mais qu'on nous conſidere ſeulement du meſme œil dont on regarde la plus-part de ceux qui ſont en la communion de Rome, il n'y a perſonne ſi peu équitable qui eſtime que noſtre vie nous rende indignes de l'affection des honneſtes gens. Car au moins on n'entend point entre nous ces execrables blaſphemes contre la Diuinité, que nous voyons avec beaucoup de douleur demeurer impunis en diuers lieux, pourueu que ceux qui les commettent au veu & au ſçeu de tout le monde, ie ne diray pas aillent à la Meſſe vne fois l'an, car on ne s'enquiert pas ſ'ils y aſſiſtent, mais ſeulement qu'ils ne viennent point au Preſche avec nous. Et ne pouons aſſez nous eſ-



merueiller que s'il est arriué à quelqu'un de nostre Profession de laisser eschapper quelque parole inconsiderée, qui se puisse mal interpreter contre son intention, comme si elle auoit esté dite au des-honneur de la Bien-heureuse Vierge, ou des autres Saints de Paradis, les Magistrats inferieurs prononcent incontinent allencontre d'eux des iugemens si rigoureux, qu'il faut que les Parlemens les corrigent; & que cependant en la presence mesme de ceux qui sont en autorité, on vomisse impunément contre Dieu & contre nostre Seigneur Iesus des horreurs qui font fremir iusques à ceux qui ne sont pas fort sensibles à ce qui est de leur gloire. S'il y a des débauchez en nostre profession, cōme il n'y en a sans doute que trop, au moins faut-il qu'ils essayent de l'estre en cachette, & que leurs dissolutions ne puissent estre conuaincuës; au lieu que nous en voyons ailleurs qui font trophée de leurs vices, & qui prennent à grande gloire qu'on les tienne pour bons compagnons. S'il y a quelqu'un de nostre nombre que le Magistrat soit obligé de chastier par la feuerité des loix publiques, cela arriue

pourtant assez rarement, quoy qu'il y en a beaucoup qui ne nous sont pas si fauorables, que de vouloir conuiuer à nos fautes, s'il nous arriuoit d'en faire qui fussent dignes de leur chastiment. Il reste encore entre ceux de la Religion quelque chose de cette ancienne charité, que nos peres auoient pour les pauvres, au moins pour ne permettre pas, s'il est possible, que ceux qui sont necessiteux soient obligez de mandier. Si mesmes les pauvres de profession contraire ne trouuoient en nous de l'humanité, nous ne les verrions pas en foule aux portes de nos maisons & dans les entrées de nos Temples; au lieu que si les nostres auoient esté reduits à cette necessité de quester par les maisons, & aux vestibules des Eglises, il y a des lieux où tant s'en faut qu'ils trouuassent les entrailles des hommes ouuertes, que ce seroit beaucoup s'ils se pouuoient retirer sans autre mécontentement que d'estre tout simplement esconduits. Enfin, lors que quelque disette extraordinaire presse ceux qui ont le soin de l'administration des Hospitaux, ils trouuent selon nos facultez, & au de là de nos facultez, nos bourses

ouuertes pour leur soulagement ; au lieu qu'en diuers endroits, s'il y a quelque miserable de nostre profession qui n'ait point de retraite ailleurs, il y a toutes les peines du monde à obtenir qu'il soit recueilly en ces lieux publics, & quand il y est, il n'y a moyen de le garentir de la persecution qu'on y fait à sa conscience. Je sçay bien que cela ne se fait pas vniuersellement par tout, & qu'en quelques-vns nous rencontrons plus de debonnaireté, & ne mets pas cela en auant, ny par forme de plainte contre ceux qui se monstrent plus rigoureux, ny pour offenser l'esprit de personne. Je serois marry que ces propos, qui sont destinez à diminuer la haine que beaucoup de gens ont contre nous, en irritassent aucun par quelque parole inconsidérée ; ie veux seulement dire que la condition des choses humaines estant telle, qu'il n'y a pas moyen de preseruer ny l'une ny l'autre profession de quelque corruption dans les bonnes mœurs, nous ne meritons pas en cét égard d'estre haïs de ceux dont les deportemens n'ont point d'auantage par dessus les nostres. Car quand ie diray que dans l'ordre de la Noblesse, & de ceux

qui frequentent les Cours des Roys, nous auons dans ce peu qui nous en reste des exemples d'une tres-haute & tres-eminentte vertu : que dans ce petit nombre de Magistrats que nous auons dans les Cours Souueraines & inferieures, il y a des personages d'une droiture rare & singuliere, au iugement mesme de leurs ennemis; que dans la condition des Ministres il y a de l'honnesteté, de la circonspection & de la retenue, à laquelle quelques-uns d'entre les Ecclesiastiques ne voudroient pas eux mesmes se comparer; & que parmy ce qu'on appelle le peuple, quoy que celui de nostre professiō ait beaucoup degeneré de la pureté de ses ancestres, si ne sōmes nous pas encore absolument reduits à l'égalité, ie m'assure qu'aucun ne m'accusera d'auoir auancé vne proposition temeraire. On oit encore souuent de la bouche de nos aduersaires des tesmoignages semblables à ceux dont les Chrestiens se vantent dans Tertullien; *Caius Seius est homme de bien, & n'y a rien à redire en luy; sinon qu'il fait profession du Christianisme* : C'est dommage, dit-on, de quoy vn tel est Huguenot; car d'ailleurs c'est vn parfaite-

ment honneste homme. Partant puis que nous ne dissipons point la Republique par nos crimes, que nous ne gastons point nos prochains par les mauuais exemples de nos actions, & que mesme nostre discipline & nos institutions peuuent contribuer quelque chose à la correction des vices qui deshonnorent la vie des hommes, & qui incommodent leur societé, soit pour en arrester le courant, ou pour empescher au moins qu'elle n'en soit entierement inondée, ie conclus que nous deurions recevoir de toutes sortes de personnes plus de preuues de leur bonne volonté, & particulièrement de nos Superieurs vn traitement sans passion, en ce qui est de l'vsage de leur puissance. Tellement que s'ils nous y tiennent quelques rigueurs que les autres n'esprouuent pas, il y a en cela vn assez notable manquement contré les droits communs que la nature & la raison ont establis entre les hommes. Car quant à ce qui est de nos sentimens en la matiere de la Religion, c'est vne chose qui doit estre mise tout à fait à part. Nous verrons cy-dessous, Dieu aydant, que ny pour ce que nous en croyons, ny pour ce que



nous n'en croyons pas, nous ne méritons nullement qu'à cette occasion l'on nous traite moins fauorablement que les autres. Mais quels qu'ils soient, ie dis qu'ils ne doiuent nullement venir en consideration, soit pour nous priuer des bons offices de la commune humanité, ou pour peruertir nostre droict en l'administration de la Iustice. Le premier droict de tous est celuy de la Nature: c'est le fondement sur lequel les autres sont edifiez, & comme la source dont ils decoulent. Le second est celuy de la Police, qui ne doit, s'il est possible, en aucune façon ptejudicier au premier: pour ce que c'est vn droict, c'est à dire vne regle de la iustice & de la vertu, qui ne peut estre violé sans peché; & pour ce encore qu'en le renuersant, le droict de la Police se renuerse aussi luy-mesme, & destruit la base de son establissement. Le troisiéme finalement est celuy de la Religion, qui ne sçauroit subsister si celuy de la Nature & de la Police ne demeurent; car pource que nous sommes hommes auant que d'estre Chrestiens, les sentimens de la Nature precedent en nous les creances de la Foy. Et pource que nous sommes socia-

bles

bles d'une société politique, avant que nous en formions aucune pour les devoirs de la piété, c'est un pervertissement de l'ordre que Dieu a mis entre les choses, que de penser faire œuvre de piété, quand en sa considération on ruine les droits sur lesquels la société politique est établie. Au contraire, qui obéit aux loix de la Nature & de la Police bien & légitimement constituée, se conforme à celles de la Religion, d'autant qu'en la Religion Dieu commande que ces deux premiers droits nous soient absolument inviolables. La Religion veut que les pères à leurs enfans, & les enfans à leurs pères, les supérieurs à leurs inférieurs, & les inférieurs à leurs supérieurs de même, & que les esgaux finalement à leurs esgaux, de voisin à voisin, de citoyen à citoyen, d'amy à amy, & de frere à frere, chacun à cause de ces relations, & sans en estre destourné par aucune autre considération, rende tous les devoirs auxquels les loix de l'humanité, & celles de la société nous obligent. Dans les offices de la charité & de la beneficence, qui ne sont pas si exactement obligatoires que ceux de la justice & du droit, l'Apostre saint Paul ordonne aux

Chrestiens de faire du bien à tous, mais principalement aux domestiques de la foy. Pource qu'estant la question de donner à autrui ce qui nous appartient & non à luy, celuy avec qui nous n'auons autre communion que celle de la Nature & de la Police, ne le doit pas plaindre si nous faisons plus de consideration d'un autre avec qui, outre la Nature & la Police, nous auons encore cette estroite liaison qui nous conjoint en vne mesme Religion. Car puis que ce sont ces relations qui nous obligent à les gratifier de nos biens-faits, quand il les faudra mettre en comparaison, celuy en qui nous les verrons toutes conjointement, sera sans doute preferable à vn autre en qui nous n'en verrons sinon quelques-vnes. Mais en l'administration de la Iustice, il'en va tout autrement; car pour ce qu'il s'agit de rendre à autrui ce qui luy appartient, & non à nous, nulles autres relations n'y doiuent estre considerées. En la distribution des offices de la charité, quiconque prefere les domestiques de la foy à ceux qui ne le sont pas, suit la disposition de la volonté de Dieu, qui a plus mis en cettuy-cy qu'en cettuy-là de ces raisons & de ces motifs

qui la doiuent exciter en nous. En la dispensation des deuoirs de la iustice & du droict, quiconque met deuant ses yeux autre considération que celle de rendre à chacun ce qui luy appartient, fait directement contre la disposition de la volonté de Dieu, qui auoit ordonné qu'un tel, quelque profession qu'il fust en matiere de Religion, ou quelque autre deffaut qui fust en sa personne d'ailleurs, jouïst ou de telle chose, ou de telle liberté, par les loix de la Nature & de la Police. Et puis que Dieu, qui est plus zelateur de sa gloire, & qui sçait mieux ce qui la peut auancer que nous, a tellement conduit les choses par sa Prouidence, qu'en suiuant l'ordre des loix de la Nature & de la Police, desquelles il est auteur, il a laissé la jouïssance de diuerses choses, & l'usage de diuerses libertez aux ennemis de sa verité, c'est passion, & precipitation, & temerité à nous que de les leur vouloir oster, iusques à ce que par la mesme Prouidence il ait changé l'ordre de ces loix, ou de la Police, ou de la Nature. En effet l'Apostre ne veut pas que la difference de Religion donne de legitime occasion à la dissolution des mariages, ny à ceux que ce lien à conjoincts sujet



de se prouer mutuellement des deuoirs  
aufquels ils sont obligez. Et si le mesme  
Apostre oblige les Chrestiens de son temps  
à prier Dieu pour les Roys, pour les Gou-  
uerneurs, pour les Magistrats, & genera-  
lement pour tous les hommes, pource que  
l'auantage qu'ils auoient d'estre Chre-  
stiens, au lieu que les autres ne l'estoient  
pas, & que d'entr'eux il y en auoit plu-  
sieurs horriblement perdus & infames, ne  
les exemptoit pas de l'obligation du droit  
politique, qui faisoit qu'ils composoient  
vn mesme Estar; il est certes à presumer  
que si les Roys, & les Gouverneurs, & les  
Magistrats, & la plus grãde partie des peup-  
les eussent esté Chrestiens de son temps,  
il n'eust pas permis nō plus que le Christia-  
nisme leur eust esté vn pretexte d'abuser  
de leur authorité & de leur nombre à l'op-  
pression de ceux qui n'auoient encore pū  
cognoistre la verité de Iesus-Christ. Com-  
me encore que deux nations soient de Re-  
ligion differente, si est-ce que le zelé de la  
Chrestienne ne la doit pas porter à violer à  
l'égard de l'autre le droit des gens, pour-  
ce que c'est vne loy commune que le con-  
sentement des peuples a establie entr'eux;  
encore que deux personnes soient dans le



Christianisme d'une profession toute opposée, le zele de la Catholique ne la doit point porter à l'esgard de la Reformée à enfreindre les droicts de leur société, que la Nature, & l'autorité du Souverain, ou leur commun consentement a establis entr'elles de mesme. Et veritablement ie ne puis que ie ne louë icy le iugement de Monsieur de Silhon, l'un des bons politiques de nostre temps, qui dit que ce fut iustement que Ladislas Roy de Hongrie, perdit la bataille & la vie à Varnes, pource qu'à la suggestion du Legat du Pape il auoit rompu la foy qu'il auoit donnée à Amurat Empereur des Turcs, & que cét infidele auoit raison, en la chaleur du combat, d'appeller Iesus-Christ à venger la perfidie de ceux qui faisoient profession de son Nom, dont ils auoient interposé l'autorité en la paix qu'ils auoient iurée. Or quelque difference qu'il y a en matiere de créace entre les Catholiques Romains & les Reformez, si ne peut-elle estre si grande qu'elle est entre les Chrestiens & les Turcs, ou les autres infideles. Et si le Pape n'a point la puissance de dispenser du serment par lequel on a ratifié la paix avec les Mécreans, il n'y a point de raison que

la passion particuliere de quelques-vns les dispense de nous rendre le droit qui nous est acquis par des Edicts & par des loix si solennellement publiées.

---

## SECTION II.

*Que si on considere ceux de la Religion dans les devoirs auxquels ils sont obligez envers le Roy & l'Estat entant que François, ils ne sont point dignes de l'auersion de qui que ce soit.*

**Q**uant à la seconde façon en laquelle nous pouuons estre confiderez, c'est à sçauoir entant que nous sommes François, nous ne sommes certes non plus dignes de la mauuaise volonté de nos concitoyens, soit à l'esgard de ce que nous sommes à l'Estat en general, soit à l'esgard de ce que nous deuons estre entiers nostre Prince; car pour ce qui est de l'Estat, si nous estiôs ou Mores, ou Gots, ou Vandales, ou quelqu'autre nation estrangere de cette sorte, qui fust venuë en France pour occuper le pays à force d'armes, & en reduire en seruitude les naturels habitans, & que la constitution des choses ayant changé,

nous fussions deuenus plus foibles en nombre , & incapables de nous deffendre contre la nation originaire , on pourroit aucunement excuser ses ressentimens. Le mauuais traitement que nous en receurions pourroit mesme estre coloré de cette raison d'Etat , que pour nous oster l'humeur de Conquerans , il nous faudroit tenir bas , afin qu'avec le pouuoir & l'esperance de reüssir , nous perdissions aussi l'enuie de rien entreprendre. Si nous estions originaires du pays , & que les Catholiques Romains fussent estrangers , qui nous eussent subiuguez & asseruis de bonne guerre , on pourroit dire s'ils nous traitoient vn peu rigoureusement , qu'ils vseroient en quelque façon du droit des gens , qui donne cet auantage aux victorieux , & que la prudence ne permet pas qu'on laisse tant soit peu leuer la teste aux vaincus , de peur que le courage ne leur reuienne. Quoy que la plus sage Politique du monde , qui est celle des anciens Romains , en vsoit ordinairement autrement ; car ou bien ils incorporoient avec eux en vne mesme nation celles qu'ils auoient vaincues , en leur donnant les mesmes priui-

legés, & le mesme rang au gouuernement de leur Estat; ou bien au moins ils les traittoient avec toute sorte d'équité & de douceur, & les empeschoient ainsi de regretter leur fortune precedente. Pour ce qu'ils sçauoient que ceux qui sont contents de leur condition, n'en desirent point vne meilleure; & qu'au contraire les mécontentemens que l'on donne à des gens vaincus, les rendent indubitablement desireux de nouveautez, & enclins à toutes sortes de partis qui leur presentent de meilleures esperances. C'est pourquoy quand ils demanderent à ceux de Priuerne, qui s'estoient rebellez contr'eux, & qu'ils auoient ramenez à la raison par la voye des armes, quelle ils se deuoient attendre que pourroit estre la paix s'ils la leur donnoient; & que ceux de Priuerne eurent respondu; *fidelle & perpetuelle, si vous nous la donnez bonne; mais de peu de durée, si vous nous la donnez mauuaise*, ainsi qu'ils estoient magnanimes, ils approuuerent cette generosité. Et leur raison fut qu'il n'y auoit nulle apparence qu'il se rencontrast ny peuple, ny homme, qui n'estant pas content de sa con-



dition , la supportast sinon autant de temps qu'il y seroit contraint , & qu'il ne s'en pourroit pas procurer vne plus douce & plus raisonnable. Mais quelles que soient toutes ces considerations,elles n'ont point de lieu en ce qui nous concerne. Car nous sommes , comme chacun sçait , originaires du Pays, ainsi que les autres : & s'il y en a quelques-vns d'entre nous qui soient venus des pays estrangers, ou bien ils sont en extremement petit nombre , ou ils sont sortis de Nations avec lesquelles la nostre a tousiours eu de si estroittes alliances , que quand ils ont mis le pied en France , ils ont esté tenus pour François,ou bien il y a si long-temps que leurs ancestres sont habitez parmy nous , & ils sont entez dans le corps de la Nation de si longue-main , qu'il ne reste plus de memoire de leur extraction , ny plus de marque de la distinction de leur origine. Or tout le monde sçait qu'il est naturel aux hommes de tirer occasion de là de s'entr'aimer & de s'entrefauoriser,& que si l'amour de la Patrie s'estend iusques aux costaux , & aux riuieres , & aux campagnes de nostre habitation, les affections qu'elle engendre doiuent se porter plus



directement sur les hommes mesmes, puis que ce sont eux, qui à proprement parler, sont la Patrie & l'État, beaucoup plus que les choses insensibles & inanimées. Ajoutez à cela que nos parentez & nos alliances sont telles en tout le Royaume, qu'il n'y a aucune famille de nostre profession qui ne soit meslée avec d'autres qui n'en sont pas. Car quand nos ancestres l'ont premierement embrassée, la separation s'est faite de telle sorte, que non seulement il n'y a eu parenté qui n'ait eu des familles de son sang & de ses alliances en l'un & l'autre party, mais mesmes qu'il y a eu quantité de maisons particulieres partagées, le pere se trouvant d'une religion, & la mere d'une autre, & les enfans pareillement. Depuis, ou bien les Catholiques ont tellement continué de se ranger du costé des Reformez, ou les Reformez en changeant d'avis sont tellement retournez en la communion des Catholiques, ou enfin les mariages se sont tellement bigarrez entr'eux, que leurs familles s'entretiennent par une infinité d'attachemens & d'alliances. Ce qui deuroit non seulement beaucoup diminuer de cette auersion, que la diuersité des opi-

nions au fait de la Religion engendre dedans nos esprits, mais mesmes y produire des affections dignes des plus beaux & plus loüables sentimens de la Nature. De plus, encore que le nombre que nous faisons n'est pas à comparer à celuy de profession contraire, si n'est-il pas si petit ny si contemptible pourtant, qu'on n'en doive faire consideration en l'Estat: Car la grandeur & la force des Empires consiste principalement en la multitude des hommes; c'est là que sont leurs ressources quand il leur arriue quelques notables accidens; c'est ce qui les rend considerables à leurs voisins, & redoutables à leurs ennemis; c'est en vn mot ce qui les rend capables, & de soustenir les grâdes guerres, lors qu'on les attaque chez eux, & d'entreprendre au dehors des conquestes & vtiles & glorieuses. Or est-il vray qu'en quelques Provinces de ce Royaume, comme est la Provence, la Bretagne, le Berry, la Bourgogne, la Picardie, & la Champagne, il y a fort peu de Reformez en comparaison des autres. Mais aussi n'ignore-t'on pas que le Poictou, & la Xainctonge, & la haute & la basse Guyenne, le Bearn, le Languedoc, les Seuenes, le Dauphiné, &

quelques autres Prouinces en sont tellement semées, sans compter ce qu'il y en a en l'Isle de France, en Normandie, & en tous les autres lieux où ils sont espars, qu'ils font vne partie fort considerable de ce grand corps. Tellement qu'encore qu'ils n'y tiennent pas le lieu que la teste tient au corps humain, si est-ce que comme la teste a soin des parties inferieures, la bonté & la sagesse de nos Rois a creu qu'elle deuoit pouruoir à nostre conseruation par l'autorité des loix publiques. Or les parties qui sont au dessous de la teste, s'entr'assistent respectiuelement; de sorte que celles qui en sont les plus prochaines, & qui seruent à l'esgard des autres, ainsi que de canaux pour y porter les esprits, ne les arrestent pas en passant, pour ce que de la perclusion, ou de la foiblesse de quelques-vns de ses membres, le corps demeureroit incommodé. Ceux donc qui tiennent en ce Royaume le gouuernement & la puissance sous l'autorité de sa Majesté, & generalement tous ceux avec qui nous viuons, sont obligez par l'affection qu'ils portent à l'Estat, de ne nous empescher point l'effet des bonnes volontez de nostre Prince, & de nous affection-

net comme composans avec eux vn mesme corps, dont la conseruation & la felicité despend de la bonne vnion de ses parties. Et veritablement nos plus grands aduersaires mesmes ne peuuent pas reuoyer en doute, que selon le nombre que nous y faisons, & les emplois que nostre propre inclination où la puissance publique nous y donne, nous ne contribuyons au bien de ce grand Empire, tout ce que nous y pouuons apporter d'ornement & d'vtilité. Les payfans, qui sont en grand nombre de nostre profession dans les Provinces, dont i'ay fait mention cy-dessus, y cultiuent la terre, & fournissent par ce moyen à la nourriture de ceux qui les gouernent, & aux necessitez de l'Estat. Les artisans n'y sont point inferieurs aux autres en toutes sortes d'ouurages, & n'y a guere de professions de cette nature, où nous n'en ayons tousiours eu quelques-uns fort excellens. Les Marchands qui sont par tout, & notamment dans les Ports de mer, fournissent les villes des commoditez des Pays estranges, transportent chez nos voisins les choses dont nous abondons, & par le moyen de ce commerce deschargent le Royaume de ce qui



luy pefe, l'accommodent de ce dont il a befoin, & mefmes y attirent l'argent, dont nous manquerions autrement par faute de mines. Les gens de lettres n'y reüiffifent point fi mal, qu'on ne voye fortir d'entre nous des hommes eloquens pour le Barreau, de bons Medecins pour les villes, & de rares lumieres en toutes fciences, & femble mefme qu'en la belle litterature, & en la cognoiffance de l'antiquité, les Cafaubons, les Scaligers. & les Saumaifes l'ayent emporté pardeffus tous ceux qui s'en font mezlez depuis longtemps. La Nobleffe, & tous ceux que la generofité de leurs inclinations attire à fuiure les armes, ne font pas en fi petit nombre dans les armées, qu'ils ne s'y rendent confiderables, & ils s'y acquittent de leur deuoir de telle forte, qu'ils s'y font signalez en de tres-grandes & tres-importantes occasions. Et c'est chofe aucunement eſtrange, que quelquefois à l'heure que les pauvres artisans ont bien de la peine à furmonter la haine que l'on porte à la Religion qu'ils profeffent, pour auoir habitation dans les villes, & s'eſtablir dans les Maiftrifes de leurs meſtiers : le Roy met yne bonne partie des forces & de la



seureté de son Estat entre les mains de Generaux d'armée qui sont de mesme profession. Ainsi au Conseil de sa Majesté, l'aersion qu'on peut auoir contre nostre creance, n'empesche pas que le bon-heur, & la conduite, & le couragé, ne puissent esleuer les hommes aux grandes charges de la Couronne, & à de si glorieux emplois: & dedans les Prouinces en diuers endroits, elle empesche que l'industrie, & l'adresse, & l'intelligence dans les plus petits arts, n'y puissent promouuoir les sujets de sa Majesté, pour l'vtilité du public, & pour le soustien de leurs familles. Enfin generalement en toutes les necessitez du Royaume, s'il y a quelque chose à faire, nous la faisons selon nostre puissance aussi alaigrement que ceux qui sont beaucoup plus fauorisez que nous, & s'il y en a quelque autre à souffrir, nous la portons pour le moins aussi patiemment que les autres, bien qu'on ne nous espargne nullement en la distribution du faix, & que la pluspart du temps les proportions n'y sont nullement gardées. Il y a donc certes quelque sujet d'estonnement que toutes ces consideratiōs ne sont point capables de contrebalancer vn peu cette

violente passion que quelques-vns ont contre nous. Si c'estoient les Moines, & les gens particulièrement destinez à la deuotion, de qui dependist l'exécution des volonte de sa Majesté en ce qui nous concerne ; cela ne deuroit pas estre trouué si estrange comme il est. Ces Messieurs sont d'ordinaire si preoccupez, & se laissent tellement transporter au zele qu'ils ont pour l'auancement de leurs dogmes, & pour l'establissement de l'autorité de leurs charges, que nostre doctrine attaque particulièrement, qu'il n'y a rien de merueilleux s'ils s'emporent en cette occurrence. Ioint que leur condition ne les appellant pas au gouuernement, ils ne peuuent pas si bien sçauoir quel temperament la bonne & sage Politique, & les raisons de la Iustice & du Public, doiuent apporter à l'ardeur de ce zele dont il faut que des gens de leur robbe fassent profession de brusler. Mais quant à ceux qui sont nourris dans le monde, & esleuez dans les charges, dont nostre religion n'entame aucunement l'autorité, & à qui l'experience des choses a deu faire comprendre qu'il y a bien de la difference entre les regles du gouuernement d'un Cloître,

tre, & celles de l'administration de la Justice, selon les loix d'un grand Estat, c'est véritablement vne chose digne de quelque admiration, qu'il s'en trouue que la passion de la Religion destourne si loin du droit chemin de l'équité, qu'ils suivent assez consciencieusement en autres rencontres.

Si on nous considère à l'égard de ce que nous devons estre envers nostre Prince, nos consciences nous rendent témoignage que nos ames sont si remplies du respect, de la reuerence, & de l'affection que nous auons à sa personne, & du zele & de la ialousie que nous auons pour sa gloire & pour sa grandeur, que nous ne pouuons nous persuader qu'il y ait aucun qui nous surpasse en cette louange. Et i'estime que nos plus grands ennemis ne la contestent pas. Car encore que depuis que nous auons commencé de paroistre en cet Estat, il y ait eu des confusions estranges; & que quelques-vns de nos Rois, à la sollicitation de nos ennemis, ayent employé tout ce qu'ils auoient de puissance pour nous exterminer, iusques là que sous leur nom il s'y est fait contre nous des executions capables de mettre les moins

impatiens au desespoir, si est-ce que par la grace de Dieu aucun de nous ne s'est encore jamais trouué meslé dans les conseils des execrables attentats qu'on a commis contre leurs personnes. Et si nostre Nation a receu quelque deshonneur de la production de ces monstres qui ont si traitreusement violé leur sacrée Majesté, nostre communion au moins est exempte de la honte & de l'infamie de leur education. Il est vray que quelques-vns nous ont soupçonné, & mesmes ouuertement accusez d'estre ennemis de la royauté, & d'auoir eu quelque dessein, ou de changer la forme du gouuernement de l'Estat, ou au moins de nous y vouloir cantonner en quelque lieu, pour nous former en République. Et ceux qui veulent croire que nous auons eu cette malheureuse intention, pensent en auoir quelque preuue dans les guerres qui se sont faites en ce Royaume du temps de nos Peres & du nostre. Quelques-vns mesmes nous obiectent que les affaires qui se passent maintenant en Angleterre, descouurent assez quel est en cela le genie de nostre Religio. Mais certainement quelque malheur qui soit arriué à ceux de nostre communion,



d'estre ou forcez, ou obligez, ou portez par quelque consideratiō que ç'ait esté, à prendre les armes pour la liberté de leurs consciences, c'est à grand tort qu'on nous impute d'aüoir eu de si pernicieuses pensées, & c'est avec beaucoup de douleur que nous en voyons l'accusation imprimée en tant d'endroits. Mais i'estime neantmoins qu'ils n'y a point de Iuges equitables deuant qui nous plaidions cette cause, qui ne nous en enuoyent pleinement iustificiez. Je ne veux nullement entreprendre la defense de la prise des armes cōtre son Prince, pour quelque cause que ce puisse estre. Iesçay qu'il y a des Iurifconsultes & des Politiques, des Theologiens & des Casuistes, qui ont debattu cette question de telle sorte, qu'ou bien ils l'ont laissée indecise, ou bien ils ont trop fauorisé ceux qui veulent limiter l'autorité de la Royauté. Mais bien que plusieurs gens de toutes professions estiment la defense de la religion que l'on croit vraye, & la liberté de la conscience à la professer, la moins illegitime de toutes les causes qu'on peut alleguer pour la iustificatiō de cette actiō, i'ay tousiours creu pourtant qu'il conuient beaucoup mieux à la nature de l'Euangile;



& à la pratique de l'Eglise ancienne, de n'auoir recours à autres armes qu'à la patience, aux larmes, & aux prieres, en attendant qu'il plaise à Dieu changer le cœur des Rois, & donner par quelque autre voye repos & liberté à ses seruiteurs. Et à toutes les fois que ie repasse les yeux de l'esprit dessus l'histoire de nos Peres, ie ne puis que ie ne régrette tres-sensiblement qu'ils n'ayent couronné tant d'autres belles vertus dont ils nous ont laissé les exemples, de l'imitation des premiers Chrestiens, en cette inuincible patience qu'ils monstrent sous les persecutions des Empereurs. Car ils eussent ainsi retranché toute occasion à ceux qui cherchoient de quoy diffamer leur profession; & eussent, comme i'estime, plus glorieusement auancé la cognoissance de la verité par l'admiration de leur vertu & de leur constance, qu'ils ne l'ont defendue auantageusement par la force de leurs armes. Toutesfois, encore qu'à mon aduis leur action ne soit pas de la nature de celles qu'on doit louer; car on ne loue sinon celles en qui la vertu paroist eminente: encore qu'elle ne soit pas absolument à iustifier; pource qu'on ne iustifie sinon

celles qui s'accordent tout à fait aux loix, au lieu que celle-cy ne se rapporte pas parfaitement aux commandemens de l'Evangile; ie m'assure qu'on me supportera si ie dis, que s'il y en a aucune de cette nature qui puisse estre excusée, ou supportée, ou pardonnée benignement, c'est celle que nos ançestres ont faite en cette occurrence. Chacun sçait la violence des Edicts, & des persecutions qui ont esté faites contre eux au commencement. Les prisons, les gibets, les feux, les plus insupportables supplices qui se puisent imaginer, y ont esté employez assez long-temps sans aucune misericorde. Les bourreaux ont eu quelquesfois horreur de leurs tourmēs, & quoy que les peuples fussent extrêmement animez à l'encontre d'eux, si ont-ils eu assez souvent de la compassion de leurs souffrances. Quand donc nonobstant la dureté de ces traitemens, ils ne laisserent pas de multiplier de telle façon, qu'en beaucoup de lieux ils eussent bien peu se defendre si la patience leur eust eschappé, pour chercher quelques moyens de se garentir des extremitez ausquelles on les mettoit, & non certes attenter aux loix de l'Estat, & à la forme de son gouvernement; car

C'est chose à laquelle ils n'ont iamais deu penser, mais empescher seulement que les conseillers de ces inhumanitez n'abusassent de l'autorité des Rois à leur entiere destruction, eussent-ils rien fait en cela qu'on n'ait accoustumé d'excuser charitablement en toutes rencontres? Y a-t'il sorte de respect dont la violation ne soit favorablement interpretée, quand ellè ne procede que du desir de la conseruatiõ de la vie en vne extreme & ineuitable necessité? Et de ceux qui sont les plus seucres à condamner cette impatiēce de nos ayeuls, y en a-t'il aucun qui se peust vanter de monstrier autant de moderation qu'ils ont fait, s'il auoit esté mis à des espreuues aussi rigoureuses? Neantmoins pendant que dura le regne de François I. & de Henry second, lors qu'on ne pouuoit accuser ny la foiblesse, ny le bas aage de ces deux grāds Rois, & que grands & petits demeuroiēt en leur obeissance, & en l'obseruatiõ de l'ordre public, il ne s'est iamais veu que nos Peres ayent rien opposé à la seuerité de leurs Edicts, sinon vne insurmontable patience. Depuis, le nom de l'autorité souueraine estant deuolu à des Princes à qui l'âge n'auoit pas encore permis d'ap-

prendre l'art de regner, & toute leur puissance estant effectiuemēt tombée entre les mains de gens, dont l'aggrandissement extraordinaire estoit en charge aux Grāds de l'Estat, & suspect aux Princes du sang, & à la Maison Royale mesme, ces ialousies & ces soupçons partagerent manifestement & le Royaume & la Cour. Tellement qu'y en ayant plusieurs qui pour des interets beaucoup moindres que ceux de la conscience ou de la vie, se dispenserent de ce respect qu'on accuse ceux de la Religion de n'auoir pas rendu alors, ce ne seroit pas chose bien estrange quand ils se seroient trouuez enveloppez dans vne faute, dont estoient coupables tant de gens qui n'auoient pas à beaucoup pres telle occasion de la faire qu'eux. Mais encore peut-on dire icy diuerſes choses fort considerables pour leur descharge. La premiere est, qu'ils n'en sont iamais venus à prendre les armes d'un commun consentement; de sorte qu'on puisse attribuer cette action au general de ceux de la Religion, ny mesme à vne partie fort considerable de leur corps, iusques à ce qu'ils ont pensé estre tout apparemmēt fondez en droit de le faire, pour conseruer avec leur vie & leur religion la

majesté des loix publiques, & l'autorité du Souuerain. Car ils ne les prirent qu'après le fait de Vassi, qui estoit vne infraction toute ouuerte de l'Edict de Ianuier, lequel auoit esté fait en leur faueur par le Roy, de l'aduis de la Reyne sa mere Regēte de l'Estat, & de ceux qui ont accoustumé d'auoir quelque voix & quelque credit dās le gouuernement pendant la minorité du Prince. Quand donc ils virent que l'autorité du Souuerain ne leur pouuoit estre vne assez seure sauuegarde contre la violence des particuliers, & qu'à ce desir naturel de la conseruation de leur vie, qu'ils voyoiēt autrement exposée à la fureur de leurs ennemis, se ioignit encore cette consideration, que ce seroit faire seruice & au Roy & à l'Estat que d'entreprendre la defense de ses loix, ils ne firent plus de scrupule d'vne chose contre laquelle leur conscience auoit resisté iusques alors. Car quant à ce qui est de l'entreprise d'Amboise, & de cette petite guerre si sage & si bien reglée que le Sieur de Mouuās entreprit en Dauphiné, outre qu'il y auoit autant ou plus de raisons politiques qui agissoient en ces rencontres, que de causes de religion, ce sont faits de particuliers, dont il ne faut



point accuser nos Eglises en general , & qu'on ne doit nullement imputer aux inclinations que leur creance leur auoit données. Mouuans essaya bien d'attirer les Prouinces voisines à son exemple ; mais aucune ne le voulut suiure , & luy-mesme de son instinct mit incontinent les armes bas , laissant plustost dedans les esprits des hommes vne singuliere admiration de sa moderation & de sa continence en vne chose qui d'ordinaire en garde si peu , qu vne mauuaise impression de son attentat ; car à peine void-on rien de si retenu ny de si regulier maintenant en pleine paix, que furent ces petits mouuemens comme les histoires les nous rapportent. Quant à l'affaire d'Amboise, on sçait assez que c'estoient des Princes qui se seruoient de la Renaudie , & qui luy faisoient joier le jeu, beaucoup plustost pour l'interest de leur grandeur , que pour la consideration de la conscience. Mais quoy qu'il en soit, & de quelques motifs qu'on y ait esté porté, il se trouue encore des lettres de Calvin mesme qui improuuent tant & plus cette conspiration. Ce qui monstre qu'il s'en a beaucoup fallu que tous ceux de la Religion y ayent trempé , estant à presu-

mer qu'il n'y auoit personne alors dont la plus-part fuiuit plustost les conseils & les mouuemens, que de ce grand personnage. Et de fait, il est imaginable qu'elle eust peu estre si secrette si elle eust esté communiquée à tant de gens qu'il y en auoit alors de nostre profession: & celuy mesme qui la descouurit en estoit, & il a ce tesmoignage dans l'histoire de Monsieur de Thou, qu'il le fit par pur & simple mouuement de sa conscience. La seconde chose qu'on peut dire est, que quand tous ceux de la Religion prirent les armes en ce Royaume en l'an mil cinq soixante-deux, les affaires politiques & celles de la conscience se trouuerent alors si meslées; & la querelle entre la Maison de Bourbon & celle de Guise éclatta de telle façon, qu'encore que la Religion fust le pretexte de la guerre, si est-ce qu'à l'esgard des Grands & de quelques-vns de la Noblesse, la vraye cause en estoit en grande partie dans vne ialousie d'Estat. Or en ce qu'il y auoit de Religion, ceux de nostre profession auoient au moins cét auantage, qu'outre la couleur apparente de iustice qui se voyoit en la deffense d'un Edict enfraint si violemment, ils auoient pour chefs des

Princes du sang, dont la consideration a toujours esté tres-singuliere en ce Royaume. Quant à ce qu'il y auoit de politique, ils soultenoient la cause des enfans de la Maison, contre ceux qu'on disoit vouloir se rendre possesseur de la Couronne, & dont quelque temps apres les deportemens ne iustificerent que trop les soupçons qu'on en auoit eus; car cette querelle, depuis la premiere guerre, iusques à l'entiere extinction de la Ligue, qui ne fut qu'environ trente cinq ans apres, a esté comme vne fièvre continuë, qui a eu quelquesfois ses remises à la verité, mais dont le Corps de l'Estat ne fut iamais bien net pourtant, & qui ayant tousiours son siege en mesmes parties & en mesmes humeurs, s'est renouuellée de temps en temps par de fort furieux symptomes. La troisieme chose finalement est, que dès aussi tost qu'on a donné aux Princes de la Religion, vne partie du contentement qu'ils desiroient, & à ceux qui les suiuiroient à la guerre, la seureté de leurs vies, & la liberté de leurs consciences, avec quelque exercice de leur pieté, ils ont incontinent quitté les armes, & mesme assez souuent abandonné des occasions auantageuses, ou d'a-

uancer leurs desseins, s'ils en eussent eu d'autres que moderées & dignes de bons François, ou d'asseurer leur condition, & la rendre moins sujette aux effets de la mauuaise volonté de leurs aduersaires; car ils ont rendu de bonne foy les places qu'ils auoiēt occupées, & sont eux-mesmes allez les premiers assieger celles qu'ils auoient esté contrains de mettre entre les mains des estrangers, cōme ils firent le Haure de Grace; aimant mieux qu'on les accusast de peu de precaution en leurs affaires, & de peu de gratitude enuers ceux qui les auoient assiste, que de faute d'affection à leur pays, ou de fidelité à leur Prince. Et veritablement c'est chose tout à fait hors d'apparence que nos Peres ayent eu aucune pensée de Republicains, puis qu'ils ne faisoient la guerre que sous les enseignes des Princes du sang, qui auoient vn trop notable interest en la conseruation de la Monarchie, pour fauoriser de leur autorité & de leur conduite le dessein de la renuerfer. En effet, par vne extraordinaire grace de Dieu leurs enfans sont maintenant dessus le Throsne & tout à l'entour, & ny à aucun de la naissance de ceux de qui se font nos Roys, dont les peres ou

les ayeuls n'ayent dans les tempestes de l'Estat, esté heureusement conseruez au milieu de nos Eglises. Certainement on a enseuely la memoire des Liguës qui se sont faites pour exclure de la succession au Royaume ceux que la Loy de l'Estat y appelloit, sous pretexte qu'ils n'estoient pas Catholiques. On ne se souuient plus des Barricades & des conspirations qui ont esté faites contre les Princes desia regnans, sous ombre qu'ils ne nous persecutoient pas assez cruellement au gré de nos ennemis. On a perdu la souuenance des menées & des monopoles qui se sont faits pour transporter la couronne aux estrangers, pource que le legitime heritier, quoy qu'il eult laissé nostre communion, estoit soupçonné ne l'auoir pas fait de bon cœur, & n'estoit pas encore bien avec Rome. Et nous ne trouuons nullement estrange que ceux qui ont esté coupables de ces actions, quand ils s'en sont repentis, ny que leurs enfans, quand ils ont esté bons François, ayent esté traitez aussi fauorablement que si iamais ces choses n'estoient arriuéés; car il n'est pas raisonnable que la memoire des fautes demeure à perpetuité, ny qu'elles imprimant pour tousiours des flestris-



fautes ineffaçables. Il y a quelques fois quelque mauuaife constellation qui regne defus vne nation , ou pour mieux dire quelque esprit de tumulte & de sedition , quelque demon ennemy de la societé du genre humain , qui charme les entendemens des hommes de ses illusions, & qui se melle dans leurs passions , & les porte à des fureurs dont ils ont les premiers horreur quand ils sont reuenus à eux-mesmes. Alors ce n'est ny iustice ny-humanité que de leur reprocher leurs trāsports, non plus qu'à des phrenetiques les leurs , quand ils retournent en couruallescence. Pourquoi donc nous accuseroit-on encore maintenant d'estre issus de peres ennemis de la Royauté , pource que l'impatience des tourmens , & notamment l'horreur des massacres , les a fait recourir aux armes, non pour auoir des Roys de leur Religion, non pour refuser l'obeïssance à ceux qui en professoient vne contraire ; mais simplement pour tascher à se garentir de l'oppression , de laquelle tout aussi-tost qu'ils ont pensé estre à couuert sous les Edits de paix, il se sont deportez des voyes de fait, & se sont d'eux-mesmes rāgez aux termes d'une entiere obeïssance ? En vn

môt, cette parole qu'on attribué à la Reyne Catherine de Medicis, leur est vne entiere iustification; qu'il ne se falloir pas dōner beaucoup de peine des guerres des Huguenots, ny craindre qu'elles tirassent d'elles-mesmes à quelque mauuaise consequence pour la France. D'autant que pour opiniastrément & furieusement qu'ils y semblaissent acharnez, on leur feroit quand on voudroit tomber les armes des mains, pourueu qu'on leur donnast leur saoul de presches.

Pour ce qui regarde les guerres de nos temps, où nos Eglises ont eu quelque part, il y faut bien distinguer les mouuemens de quelques Grands, & peut estre encore les inclinations de quelque ville en particulier, d'auec le general de ceux de nostre profession en ce Royaume. Si quelques Seigneurs y ont esté menez d'ambition & de desir de paroistre à la teste d'un parti considerable, c'est vn peché de leurs personnes, qui ne doit point estre autrement attribué aux peuples de nôtre communion, sinon qu'ils n'ont pas esté assez circonspects pour se donner garde de l'artifice de ceux qui se seruēt assez souuēt du pretexte de la religion & du bien public;

pour satisfaire à leurs passions particulieres. S'il y a eu quelque ville capable de cette mutine & criminelle pensée, de secouer l'autorité de la Monarchie, & de donner la naissance à vn nouuel Estat dans l'Estat, c'est vn crime qui est demeuré dedans l'enceinte de ses murailles, & tant s'en faut que le reste de ceux de la religion qui sont esendus dans le Royaume, en ayent esté ou complices ou corrompus, qu'ils peuuent protester en bonne conscience qu'il n'est iamais venu à leur cognoissance, & que s'ils en eussent sçeu quelque chose, ils l'eussent eu en horreur. Et si on ne veut croire à la sincere protestation qu'ils font de leur entiere innocence, au moins certes peut-on bien adjouster quelque foy à la voix de leur interest. En quelle ame tant soit peu sensée peut tomber cette imagination, que tant de Noblesse de la Religion, qui tient toute sa grandeur de la Monarchie, & qui ne resplendit sinõ des rayons de la royauté, eust voulu abandonner les esperances de la Cour, & ses terres & ses maisons, en tant de Prouinces où elle est dispersée, pour s'en aller dépendre du caprice d'un peuple seditieux & turbulent, comme  
dedans

dedans les republiques ils le font ordinairement ? Car qui ne sçait que les peuples qui se pensent estre les maistres de leurs loix & de leur conduite, passent incontinent de la liberté à la licence ; & de la licence à l'oppression de tout ce qui paroist auoir quelque qualité eminente, & quelque caractere de grandeur ? Quelle apparence que ceux d'entre nous qui sont en quelque degré dans les Parlemens & dans les places de Iudicature, cōme il y en auoit assez bon nombre alors, prissent plaisir à laisser leurs offices & leurs dignitez, & à abandonner leurs biens à la confiscation, pour s'en aller estre simples bourgeois d'une Republique populaire ? Car qui ne sçait encor que non seulement tout y est réduit à l'egalité, mais que les anciens & originaires habitans y pretendent tousiours auoir quelque droit d'estre priuilegiez dās le gouuernemēt & dans les charges ? Enfin generalement parlant nous tient-on capables de cette fureur, que pour le contentemēt que nous aurions de voir vne ville de nostre profession formée en Republique à cent lieuës de nous, nous nous priuassions de la protection des Edicts du Roi, sous laquelle seule nous viuons, & nous exposas-



sions à son indignation, à la haine de ses officiers, & à la rage des peuples ? Car de nous proposer de nous y retirer quant à nous, pour jouir de cette imaginaire liberté, les heritages que plusieurs de nous possèdent en diuers endroits, nos affaires qui nous tiennent attachez en vne infinité de contrées, & les inclinations que chacun a pour l'habitation de son pays, ne nous en empeschassent-elles point, quelle ville de celles qu'on peut auoir soupçonnées de vouloir se soustraire à la Royauté, seroit capable de contenir la centiesme partie de ce que nous sommes, par dessus les naturels habitans, qu'on ne s'y estouffast les vns les autres : Où est-ce que cinq ou six cens Ministres y trouueroient leurs emplois, & tant de milliers de marchands, d'artisans, & de payfans, leur trafic, & l'exercice de leurs arts, & leur labourage ? Où logeroit-on tant de vieillards, tant de femmes, & tant d'enfans, & de quoy pourroit-on fournir à leur nourriture ? Quant à ce que quelques-vns ont mis en auant l'exemple des Prouinces du Pays-bas, ce n'est pas bien prendre les choses. Nous ne pretendons nullement enuers nostre Souuerain les droicts que ces peuples ont



pensé auoir à l'endroit des Ducs de Brabant , des Comtes de Hollande , que la France , & tout le reste des Puissances de l'Europe, qui ne dependent point de l'Espagne , a assez ouuertement ratifiez , par l'assistance qu'on a donnée à leur souleuement & à leurs armes. La proximité des villes ne nous pouuoit pas donner la commodité de nous joindre , comme elle a fait aux Hollandois. La nature du pays n'eust pas permis que nous eussions pû soutenir la puissance d'un Roy de France , comme ils ont fait celle d'Espagne , esloignez qu'ils estoient du siege de son empire, & retranchez si auantageusement entre leurs mers & leurs canaux. Enfin , ny la terre, ny la mer ne nous eust pû permettre d'entretenir pour nostre conseruation les correspondances qu'ils ont euës. Si donc il y en a eu quelques-vns d'entre nous qui ayent pris les armes pour la defense des villes que le feu Roy de glorieuse memoire a voulu tirer d'entre nos mains , & si ceux qui sont demeurez en leurs maisons ont eu quelques tacites inclinations à desirer des succez contraires à ceux que nous auons veus, il ne le faut imputer qu'à la crainte que la plus-part de

nous ont eüe, que si les euenemēs estoient contrairés à leurs souhaits, on ne leur ostast ce qu'ils estiment plus que la vie, & qu'ils ne fussent contraints d'aller chercher la liberré de prier Dieu selon leur Religion chez les estrangers. Je sçay qu'il s'en est trouué qui ont eu quelque peur de ces épouuantables executions, qui ont fait desirer à nos peres des villes de seureté. Mais bien que la crainte soit vne passion fort innocente, & que l'impression que fait vne Saint-Barthelemy soit si profonde, qu'il faut plus d'un siecle pour l'effacer, si deuoiennent-ils auoir beaucoup meilleure opinion de nos temps, & ne croire pas que nostre nation pût commettre deux fois des barbaries si contreuenantes à son genie. Quant à cette autre apprehension, d'estre contraints de vider le Royaume si on vouloit auoir la liberté de l'exercice de sa Religion, ie laisse à iuger à ceux qui sont plus prudens & plus entendus aux choses du monde, s'il y auoit de l'apparence que nous nous en deussions laisser preuenir. Certes ce que nous en craignons, nos ennemis l'esperoient, & c'estoit la voix commune du peuple. Ce qui est vne preuue bien manifeste que nostre

crainte n'estoit pas tout à fait sans fondement, & qu'encore que ce ne fust nullement le dessein du Roy, les choses pourtant, à les considerer en elles mesmes, en presentent les apparences. Or si vne telle crainte, bien ou mal fondée, peut fournir quelque excuse à de semblables mouuemens, ie m'en rapporte à l'equité de ceux qui scauent combien la conscience, la Religion, la liberté, le bien, la vie, la douceur de la patrie, & les autres choses semblables, sont capables de causer de viues & de violentes émotions en l'esprit humain. Car pour si profondement qu'on ait imbu les sentimens de la pieté, si est ce qu'en telles occasions il est extrêmement mal aisé de ne se laisser point emporter aux inclinations de la Nature. Mais en tout cas, & quelque iugement qu'on fasse de cette action, car encore n'est-ce nullement mon dessein que de la deffendre, aucun de ceux de la Religion n'a eu de plus mauvaises intentions que celle-là, si vous en exceptez, comme j'ay dit, ou l'ambition de quelques Grands, ou, comme quelques-uns ont estimé, la folie d'une seule ville. Encore croy-je certes qu'il n'en faut excepter ny ville, ny Grand, & que tous vni-

uérſellement ont eſté preoccupez de la meſme crainte. Aſſeurément aucun ne ſe fuſt iamais laiſſé aller à ce qu'on a tant de fois depuis appellé de ce nom de rebellion, ſi on euſt pû auoir aſſez de foy pour croire, comme nous le voyons, que la Prouidence de Dieu, & la clemence de nos Roys, euſſent deu eſtre des dignes aſſez puiſſantes pour arreſter les torrens de maux qui ſembloient menacer toutes nos Eglises; car n'ayant point ny de preuue certaine, ni de raiſon ſeulement apparemment concluante, que qui que ce ſoit ait eu de ſi mauuais & de ſi pernicieux deſſeins, ce n'eſt ny iuſtice ny charité de deferer, aux mauuais ſoupçôs, ou aux ouuerres accusations de perſonnes notoirement animées. Je voy, comme i'ay deſia dit, que quelques-vns prennent occaſion de ce qui ſe paſſe en Angleterre, pour décrier generally noltre profeſſion, comme ſi d'elle meſme elle nous donnoit quelque mauuiſe volonté contre les Monarques. Et bien que la Nature ait ſeparé l'Angleterre d'auec la France d'une mer, & que la langue & les inclinations nous eſloignent encore plus des Anglois & de leur communication, que ne fait l'Ocean meſme, ſi

est-ce que pource que nous iomme's de  
mesme Religion, il y a des gens si peu  
equitables, qu'ils ne laissent pas de s'ima-  
giner que nous auons quelque secrette in-  
telligence de desir & de sentiment avec les  
Parlementaires. Il seroit peut-estre à de-  
siner que les hommes de condition priuée  
s'attachassent tellement aux choses de leur  
vocation, qu'ils n'eussent pas le loisir de  
s'enquerir du gouuernement des Estats, ni  
des nouuelles des affaires estrangeres.  
Mais puis qu'on ne scauroit l'empescher, &  
que mesmes du consentement de l'ordre  
public on informe vniuersellement tout le  
monde des plus importantes affaires de  
l'Europe, au moins en ce qui est des plus  
notables euenemēs, il n'y a pas moyen de  
faire que les speculatifs ne raisonnent sur  
les occurrēces du temps, ny mesmes qu'ils  
ne s'y interessent en quelque façon, cha-  
cun selon la passion qui le gouuernē. Car  
il est naturel aux hommes en toutes sortes  
de contentions de se determiner de quel-  
que costé, & mesmes dedans le jeu, où les  
spectateurs n'ont point de part, la moindre  
chose du monde est capable d'encliner  
leurs affections, & de leur faire souhaiter  
sans interest l'auantage à l'une des parties



plûtost qu'à l'autre. Ou donc soit que la Religion ou l'Estat engage leurs inclinatio<sup>s</sup>, il n'est pas de merueilles s'ils y portent aussi leurs vœux, & si dans la conuersation ils en donnent quelque tesmoignage. En cette guerre d'entre les Venitiens & le Turc, Catholiques Romains & Reformez ont tous vn mesme sentiment, pource que leur interest est commun contre l'ennemy du Christianisme; mais si la prosperité des mecre<sup>as</sup> apportoit quelque notable affoiblissement au party Reformé, ie ne doute nullement que les Catholiques zelez n'en receussent du contément: cômé il s'en pourroit trouuer quelques-vns entre les Protestans qui ne seroi<sup>ent</sup> pas fort marris de leurs progrès, s'ils estoient cause de quelque notable déchet à la puissance de Rome. Ce n'est pas que ni les vns ni les autres aiment le Turc; mais c'est que quelquefois la passio<sup>n</sup> maistrise les hommes tellem<sup>ent</sup>, qu'ils pensent gagner ce que leurs aduersaires perdent. A n'en point mentir c'est vne puissante inclination que le zeile de Religio<sup>n</sup>, & qui porte souuent les hōmes à des choses bien estranges. Vniuersellement tous ceux de nostre profession en ce Royaume souhaitent ardemment toute sorte de prosperité

aux armes de sa Majesté, & auancement tant qu'ils peuuent de leurs vœux, ses victoires & ses conquestes. La nature les y oblige, & le sentiment de bons François; & pource que si les progresz n'auancement point leur religion, au moins n'en reçoit elle aucune diminution, il ne faut nullement craindre que cet interest diuertisse leurs affections, ny qu'il leur donne d'autres pensées. Mais entre les Catholiques Romains la constitution des esprits n'est pas si absolument vniforme. Il y en a plusieurs qui sçachant bien que nos Rois ne sont pas moins affectiōnez à la Religion Romaine que leurs ennemis, ont dans les affaires du temps mesme passion que nous, & qui pour cette raison se portent aux occasions avec mesme courage. Quelques autres soupçonnent & craignent aucunement qu'enfin de cette ligue que la France a faite avec diuers Potentats Protestans, & de l'abbaisement de la puissance d'Espagne, la Religion Romaine ne reçoie quelque detrimēt. Neantmoins pource que l'affection au seruice de leur Prince preuaut en eux, & que la crainte d'un mal incertain & à venir, ne le doit pas emporter sur la consideration d'un deuoir certain & present,

ils ne laissent pas de seruir le Roy coura-  
geusement & fidelement, en remettant  
les euenemens futurs à la diuine Proui-  
dence. De mesme que d'entre les nostres  
il s'en est trouué quelques-vns qui ont  
seruy le feu Roy contre la Rochelle &  
Montauban, pource que leur vocation les  
y appelloit, & qu'ils croyoient que c'estoit  
à Dieu, & non à eux à prendre le soin de la  
conseruation de ses Eglises. Mais il y en a  
quelques autres, & nous en voyons tous  
les iours qui ne se peuuent empescher de  
tesmoigner qu'ils ont du regret & de la  
douleur de la prosperité des armes du  
Roy, pource qu'ils s'imaginent que la Re-  
ligion Romaine, & les interests de l'Es-  
pagne ont vne si estroite connexion, qu'ils  
sont entierement inseparables. Ils dimi-  
nuent autant qu'ils peuuent nos bons suc-  
cez, & enflent au contraire ceux de l'Es-  
pagne. Ils recueillent avec auidité les  
mauuais bruits qui se fement contre l'E-  
stat, & respandent avec contentement les  
nouuelles des disgraces qui nous arriuent.  
Ils censurent à toute rencontre le Gouer-  
nement present, & si quelqu'un de nos  
desseins ne reüssit pas, ils en triomphent.  
Si le Cardinal d'Osat liu. 3. lett. 87. a bien

dit du Pape Clement huitiesme, qu'en-  
core qu'il n'eust aucune mauuaise affection en-  
uers le Roy, ny aucun amour vers le Roy  
d'Espagne, & que d'ailleurs il eust l'ame bon-  
ne, neantmoins la haine qu'il portoit à la Rey-  
ne Elisabeth, & aux autres heretiques d'An-  
gleterre, le transportoit si auant, qu'il se lais-  
soit eschapper de la bouche des maximes perni-  
cieuses, & indignes de tout homme de bien;  
ceux-là ne doiuent pas trouuer mauuais  
que ie die qu'ils sont indignes qu'on les  
tienne pour bons François, puis que leurs  
imaginations, & ce zele sans science qu'ils  
ont pour leur Religion, esteignent en eux  
celuy qu'ils doiuent auoir pour la gloire  
de leur Pays, & pour la grandeur de leur  
Prince. Et toutesfois non seulement on ne  
les chastie pas, non seulement cette pas-  
sion ne leur nuit point dans leurs affaires  
particulieres, s'ils ont quelque chose ou à  
faire ou à obtenir qui depende de l'autho-  
rité des Magistrats: mais il y en a qui les  
en aiment d'autant mieux, & qui les en  
escoutent d'autant plus volontiers, qu'à  
leur aduis estre bon François est vne  
moindre qualité que d'estre zelé Catholi-  
que. Puis donc que iusques icy nostre Roy  
n'a point declaré qu'il prist aucune part

aux affaires d'Angleterre , & qu'il laisse cette querelle de ses voisins à demesler entre ceux qui y ont interest , quel grand crime y auroit-il quand quelques-vns d'entre nous fauoriseroient de leurs sentimens interieurs l'un de ces partis plustost que l'autre ? Car qui peut ignorer que s'il y en a quelques-vns qui le font, c'est le zele de leur Religion , & non les considerations de l'Estat, ou la forme du gouvernement qui les y inuite ? Si le bruit qui s'est espandu par tout, que le Roy de la Grand' Bretagne a eu dessein d'y changer la Religion, est faux , il n'y en a pas vn d'entre nous qui se soucie des priuileges du Parlement , ny qui ne vist fort volontiers ce Prince en toute splendeur & en toute authorité dessus son throsne. S'il est vray qu'il ait eu cette intention ; comme nous auons autrefois blasme la Ligue de ce qu'elle s'est souleuee contre le Roy Henry troisieme, & la Sorbonne, de ce qu'elle declara que ses sujets estoient quittes du serment de fidelité , il est de la iustice & de la raison que nous blasmons pareillement les Anglois , qui se sont souleuez contre leur Souuerain , si le droit de la Royauté est en Angleterre tel qu'il est en



France. Mais c'est ce que les Anglois ne disent pas, & dequoy quant à nous nous ne iugeons pas, & nous contentons d'auoir en toutes ces choses les mouuemens & les inclinations que nostre Religion nous ordonne. Car voicy la regle generale qu'elle nous prescrit en ces matieres. C'est que d'un costé la Religion Chrestienne n'estant pas destinée à donner la forme aux gouuernemens des Empires, mais estant obligée de les laisser chacun en la constitution en laquelle elle les rencontre quand elle se plante au milieu d'eux, il est du deuoir des Chrestiens de rendre en toutes les choses qui regardent la vie ciuile, vne pleine & entiere obeïssance aux loix & à la forme de l'Estat où la prouidence de Dieu les fait habiter. Et si le Souuerain Magistrat, qui a la puissance absoluë entre les mains, entreprend quelque chose au fait de la Religion, qui choque l'honneur de Iesus-Christ, & l'esperance du salut, i'ay desia dit qu'il conuient incomparablemēt mieux aux Chrestiens, d'imiter les Apostres de nostre Seigneur, & ceux qui les ont suiuis immediatement, qui à la verité nous ont appris qu'il n'est pas iuste & raisonnable d'obeir aux hom-

mes pluſtoſt qu'à Dieu , mais qui ne nous ont pourtant point laiſſé d'exemple d'autre reſiſtance aux violences qu'on leur faiſoit , ſinon celuy d'une inſurmontable patience. D'autre coſté cette meſme Religion n'oſtant point aux peuples libres l'uſage de leur liberté , ny à ceux dont la ſujettion eſt temperée de quelques droits & de quelques priuileges, la iuſtice de leur deſenſe ſi on les veut aſſeruir abſolument; il eſt encore du deuoir des meſmes Chreſtiens de ne iuger point temerairement des entrepriſes & des actions de leurs voiſins, principalement quand on ne ſçait pas bien les loix ſur leſquelles leur Eſtat ou leur Republique eſt fondée. Car il n'y a paſſeulement au monde des Monarchies, des Ariſtocraties, & des Democraties toutes pures, mais auſſi des gouuernemens meſlez. Il y en a qui ſont compoſez en partie de Monarchie & en partie des deux autres, comme celle de Sparte autrefois. Il y en a d'autres qui ſont meſlez en partie d'Ariſtocratie, & en partie de Democratie, comme Rome l'a eſté long-temps. Il y en a d'autres où la Monarchie & l'Ariſtocratie ſont iointes enſemble, comme en Polongne maintenant. Les Monar-

chies toutes pures ne le sont pas d'une  
mesme façon pourtant. Car autre est celle  
de ce Royaume, & autre celle du Turc,  
& peut estre encore autre celle de l'Es-  
pagne. Et enfin il y a une si grande variété  
en la constitution des Estats, qu'à peine  
s'en trouvera-t'il deux qui soient entière-  
ment semblables. Il n'y a donc rien qui  
empesche que chacun en obeïssant en  
conscience à la puissance souveraine, telle  
qu'il la trouve estable dedans son Pays,  
n'ait quelque liberté de iugement & d'in-  
clinations sur les occurrences des Pays  
estrangez, selon la cognoissance qu'il en  
peut avoir, & selon qu'il s'imagine y avoir  
quelque espece d'interest par la consien-  
ce. Partant si telle est de tout temps la for-  
me du gouvernement de l'Angleterre,  
que l'autorité royale y soit aucunement  
limitée & modérée par celle d'un Parle-  
ment, un bon François qui demeurera re-  
ligieusement & inviolablement en cette  
pensée, de respecter la Monarchie, telle  
qu'elle est en ce Royaume, c'est à dire ab-  
soluë & sans limitation, ne laissera pas de  
juger qu'il est iuste & raisonnable qu'en  
Angleterre elle soit bornée par les an-  
ciennes loix de l'Estat, & que le Parlement

fait bien d'y vouloir ramener le Roy, s'il a veritablement trop entrepris sur les droits & libertez de son peuple: Car les plus grands & les plus absolus Monarques mesmes ont fait gloire de maintenir la liberté des Republiques populaires, & de chastier les tyrans qui les ont voulu afferuir iniustement, & comme il leur conuient tres-bien d'estre extrêmement ialous de leur autorité, pource qu'elle vient de Dieu, aussi est-il souuerainement digne de leur iustice & de leur grandeur; de ne permettre pas qu'aucun estende la sienne plus loin que Dieu ne luy a donnée. Et c'est ce qui a fait que nos Rois, qui pource qu'ils sont absolument Souuerains en leur Royaume, n'ont pas voulu souffrir qu'il y eust aucune puissance qui arrestast tant soit peu la leur, ont neantmoins soutenu l'vnion des Prouinces des Pays bas contre l'Espagnol, pource qu'ils ont creu qu'il y auoit rendu sa domination plus independante & plus rigoureuse que ne souffroient les Loix du Pays, & les droits que les anciens Seigneurs des lieux y auoient laissez à leurs peuples. C'est pour la mesme raison qu'ils ont diuerses fois entrepris la defense des priuileges des villes Imperiales

riales contre l'ambition des Empereurs : c'est pour cela qu'ils ont pris Geneue en leur protection contre les pretensions du Duc de Sauoye : c'est pour cela que de fraische datte ils ont rendu la main aux Catalans, dont le Roy d'Espagne opprimoit les coustumes & les libertez : & pource qu'ils ne font rien en ces occasions, sinon selon la iustice & le droit, ils ne craignent pas que leurs sujets tirent quelque humeur de rebellion de la contagion de ces exemples. Partant tandis que les affaires de la France n'ont rien de commun avec celles d'Angleterre, il demeure en la liberté des sujets du Roy de fauoriser de leurs inclinations l'un ou l'autre des deux partis, chacun selon que la Religion dont il fait profession, ou la cognoissance qu'il a de la nature du gouuernement de cette Isle, determine ses affections. Si le Roy s'estoit déclaré pour l'un ou pour l'autre des contendans, d'autant qu'il n'est pas de la vocation des sujets de s'enquerir des volontez de leurs Souuerains, & qu'ils doiuent tenir pour bien & legitiment fait, ce qu'ils font dans leurs Conseils avec connoissance de cause, en remettant à Dieu le soin de la conseruation de la Religion, il



feroit du deuoir de tous les bons François de porter leurs affections où leur Prince porteroit ses armes. Car comme nous ne pouuons souffrir que le zele de la Religion Catholique Romaine en aueugle tellement quelques-vns, qu'ils ne voyent les prosperitez de la France qu'à contre-cœur, pource qu'ils s'imaginent qu'elles sont enfin pour causer du dommage à Rome : ainsi ne pouuons nous approuuer que le zele de la Religion Reformée soit si puissant en l'esprit de ceux qui en font profession, que de les rendre mescontens des bons succez des armes de sa Majesté, quand il les employe où le bien de son Estat, la iustice de la cause de ses voisins, & l'interest de ses alliez l'appelle.

---

### SECTION III.

*Que si on considere ceux de la Religion en qualité de Chrestiens, ils ne meritent l'auersion de qui que ce soit. Et premierement à l'esgard des creances qu'on leur impute contre verité.*

**R**Este le troisieme esgard auquel on nous peut considerer, c'est à sçauoir,

tant que nous sommes Chrestiens. Et cette matiere nous doit tenir vn peu plus long-temps que les precedentes, pource que les accusations qu'on y fait contre nous sont en plus grand nombre, & qu'au fond c'est tout le fondement de l'auersion qu'on a pour nous. Car le reste que i'ay cy-dessus examiné, quelque apparence dont on tasche de le reuestir, n'a du tout point de realité, non pas mesme au iugement de nos plus grands ennemis, s'ils vouloient dire franchement ce qu'ils en pensent en conscience. Il nous faut donc voir ce qu'on nous accuse de croire, & que nous ne croyons pas pourtant: ce qu'on voudroit que nous creussions, mais que nous ne pouuons nous persuader, & à cause dequoy on nous veut du mal: & enfin, ce que nous croyons effectiuement, & sur quoy la pratique de nostre pieté est fondée; pour sçauoir si, comme on le pretend, nous meritions à cette occasion la haine de Dieu & des hommes.

Pour ce qui est de ce qu'on nous accuse de croire, & que nous ne croyons nullement, ie n'en produiray que peu d'exemples seulement, dont le premier sera cette vieille accusation, que nous sommes en-

nemis des bonnes œuvres, sous ombre que nous ne croyons pas qu'elles meritent deuant Dieu, ny que ce soit par elles que nous obtenons nostre iustification en son iugement. Certainement ce que i'ay dit cy-dessus de la façon de laquelle nous vi- uons, & particulièrement de celle de la- quelle on nous exhorte continuellement à bien viure, nous absout assez de cette im- putation. Car comment sommes nous en- nemis des bonnes œuvres, si nous exhor- tons sans cesse le monde à s'y estudier, & si nous essayons d'en faire resplendir toute nostre vie? Il est vray que ce n'est pas en vertu de leur merite que nous esperons obtenir la iouissance du salut; & est vray encore que quand nous nous disposons à comparoistre deuant le tribunal de Dieu, ce n'est nullement sur nos bonnes actions que nous fondons l'esperance d'estre iusti- fiez en sa presence. Mais de cela il ne s'en- suit pas pourtant que nous ne fassions au- cune estime des bonnes actions. Nous auons accoustumé d'enseigner que la pie- té enuers Dieu, & la charité que nous de- uons auoir pour les hommes, sont choses si excellentes en elles mesmes, & si con- uenables à la dignité de nostre nature,

que quand Dieu ne les nous auroit point plus expressement commandées que parce que la Nature nous en apprend , & quand il n'y auroit attaché ny aucune promesse de recompense , ny aucune menace de punition , si est-ce que nous desurions nous y adonner avec vne affection tres-sincere & tres-ardente. Quand donc nous aurions cette opinion que la pieté & la vertu n'auroient point de certaine relation au Royaume des Cieux , & qu'elles ne porteroient avec elles aucune considerable vtilité pour nous y faire paruenir, nous en ferions pourtant plus de cas, ainsi que ne font ceux qui ne les considerent sinon entant qu'ils esperent qu'elles leur produiront quelque fruit de remuneratiō. Pource que chacun peut sçauoir par sa propre experience, que les choses auxquelles nous ne nous portons sinon entant qu'elles sont propres pour nous obtenir vne certaine fin , sont en nostre opinion moins à priser que la fin mesme. Ceux donc qui n'estiment les bonnes œuures sinon pource que Dieu les recompensera de la felicité , estiment sans doute la felicité plus qu'ils ne font les bonnes œuures : au lieu que quant à nous nous les aimons à

cause de leur propre dignité, & les trou-  
uons plus dignes de nos affections que  
n'est cette felicité qu'on s'y propose pour  
salaire. Car la felicité est ce qui nous fait  
heureux, & la pieté & la charité est ce qui  
nous fait gens de bien. Or aimer mieùx  
estre heureux qu'homme de bien, est vne  
marque indubitable qu'on ne recognoist  
pas assez que c'est que d'estre homme de  
bien, ny combien se proposer de le deue-  
nir est vn objet qui merite vne constante  
& vehemente application de toutes les  
puissances de nos ames. De plus, c'est à  
grand tort qu'on nous accuse de croire que  
les bonnes œuvres n'ont point de relation  
au salut. Outre leur excellence naturelle,  
à cause de laquelle on les doit souueraine-  
ment priser, l'amour que nous auons pour  
elles naist en grãde partie en nous de celle  
que nous portons à nostre propre felicité.  
Parce que nous regardons nostre salut, ou  
bien cōme vne chose de laquelle le droit  
nous est desia acquis par la mort de nostre  
Seigneur, ou comme vne chose de laquel-  
le, bien que le droit nous en soit acquis,  
nous ne sommes pourtant point encore  
venus en iouissance. Car autre chose sans  
doute est le droit de posseder vn iour quel-



que bien, & autre l'actuelle possession du bien mesme. Quand donc nous le considerons en cette premiere façon, nous sommes ravis en admiration de la bonté de Dieu, & de la charité inenarrable de son Fils, en ce que le Pere le nous a voulu donner, & en ce que le Fils s'est volontairement donné à nous, & s'est abandonné à la mort pour nous rachepter, & nous acquérir la vie eternelle. Or il n'est pas possible que nous soyons ravis en admiration de ce bien-fait, ny que nous l'estimions comme il faut, que le ressentimēt que nous en auons ne remplisse nos ames de dilection enuers Dieu, & d'une amour ardente & inuiolable enuers son Vnique. Comment donc pourrions nous les aimer à cette occasion avec tant d'ardeur, sans disposer toutes les facultez de nos esprits à rendre obeïssance à leurs commandemens? Y a-t'il aucun plus puissant attrait, ny aucun plus ferme lien pour nous attirer & pour nous attacher aux volontez de ceux à qui nous deuons obeïr, que celui d'une affection violente? Certes c'est là le mouuemēt qui porte les Saints qui sont au Ciel, & qui nous portera lors que nous y serons receuillis, à mener vne vie eternellement

saincte & immaculée. Car nous n'y serons pas gens de bien afin d'obtenir le Royaume des Cieux, pource que nous l'aurons desia; ny mesmes pour le nous conseruer à perpetuité, pource qu'il n'y aura plus de peril de le perdre. Mais nous serons gens de bien, par vn merueilleusement vif & permanent sentiment d'obligation, pource que nous aurons obtenu cette incomparable felicité, par vn don qui ne se pourra iamais reuoquer, & par vne tout à fait incomprehensible misericorde. Or ie ne pense pas qu'il y ait personne qui doie trouuer mauuais que nous soyons excitez à aimer Dieu par la gratitude que nous auons de son amour en nostre endroit, & par les mesmes motifs qui y induisent si puissamment les bien-heureux Saincts de Paradis, à proportion de la cognoissance qu'eux & nous auons de la charité qu'il nous a portée.

Quand nous regardons l'eternelle felicité comme vne chose dont nous ne sommes pas encore en possession, le desir que nous auons d'y paruenir nous fait faire sur les bonnes œuures deux reflexions principales. L'vne est qu'encore que Dieu nous ait déclaré par sa Parole que c'est en la

seule consideration de la mort de son Fils qu'il nous promet le salut, & que nostre conscience nous tesmoigne qu'il a liuré son Fils à la mort pour nous avant que nous fissions de bonnes œuvres, & qu'il nous eust pû considerer comme en ayant fait, si est-ce que cette mesme Parole, & ces mesmes mouuemens de nostre conscience nous apprennent, qu'il n'est pas raisonnable qu'il execute cette promesse enuers ceux qui par leur mesconnoissance se rendront indignes de son salut. Puis que si nous en joüissions desia, & que nous vinsions à le méconnoître, il seroit iuste qu'il le nous ostant, il est iuste pareillement qu'il ne le nous donne pas, si nous nous montrons ingrats à la faueur qu'il nous a faite de nous en donner le droit par la grace de ses promesses. Cependant toute nostre recognoissance gist en amour & en respect, & les preuues indubitables de l'amour & du respect consistent en l'obeissance aux commandemens de Dieu, & en l'exercice des bonnes œuvres. Ainsi nous nous y appliquons, non pas comme à des moyens par lesquels nous puissions obtenir le droit de paruenir au salut; car nous l'auons desia en la mort de Nostre Sei-

gneur Iesus, à laquelle Dieu nous a donné de croire : mais comme à des choses dont le mespris nous en feroit déchoir, & empescheroit l'execution des promesses que Dieu nous en a données. Telles sont donc nos inclinations en cét égard que doiuent estre celle des bons enfans, & qui ne doiuent pas estre blasimées en nous, puis qu'en eux on les estime loüables. Ils ne sont pas enfans, pource qu'ils sont honnestes gens, & dans l'obeïssance qu'ils rendent à leurs peres ils ne se proposent nullement pour but l'acquisition du droict de leur heredité. Ils sont enfans pource que leurs peres les ont engendrez, & ont le droict de venir quelque iour à leur heredité, d'autant qu'ils sont leurs enfans, & que telle est la disposition des loix, & l'institution de la Nature. Si donc quand ils deuiennent honnestes gens puis apres, ils y font quelque consideration de l'esperance de l'heredité, c'est afin seulement que leurs débauches, & leurs mauuais comportements ne portent pas l'indignation de leurs peres à les priuer du droict de succeder à leurs biens, lequel leur auoit esté acquis par la naissance. Il est bien vray que nous ne sommes pas enfans de Dieu de nostre na-



ture, & ne le deuenons sinon par la grace de l'adoption. Mais comme les enfans ont à leurs peres toute l'obligation de ce qu'ils les ont engendrez, nous auons pareillement à Dieu toute l'obligation de ce qu'il nous a adoptez. Et comme l'honneur qu'il luy a pleu de nous faire de nous adopter en son vniue, nous donne le mesme droit à l'heritage celeste, que la naissance donne aux enfans pour l'heredité de leurs perens; la grace de l'Esprit qui accompagne cette adoption engendre en nous les mesmes affections que la nature produit dans les bons enfans, lors qu'il s'agist de l'obeïssance & du respect qu'il faut qu'ils portent à leurs peres. L'autre reflexion est, que de toutes les choses que Dieu aime, il n'en aime aucune à l'esgal de la sainteté; & toutes les autres qu'il aime, il ne les aime sinon autant qu'elles en sont participantes, ou qu'elles y peuuent seruir. Et la raison en est que de toutes les choses auxquelles il a mis quelque empreinte de sa diuinité, il n'y en a aucune autre qu'elle qui la represente à l'esgard de ce qu'elle possede de plus venerable & de plus glorieux. Toutes choses, en ce qu'elles sont, portent quelque ressemblance de son exi-



ftence. Les vents & les tremblemens de terre, & la puiffance des flots de la mer, ont quelque ombre de fa vertu. La fermeté des rochers, la durée des elemens, & l'incorruptibilité des cieux, semblent eftre vn crayon obscur de l'immutabilité de fon effence. Dans la gloire & dans l'autorité des Monarques il a rendu vifible en la terre quelque rayon de fa Majesté. Mais quant à fa pureté, à fa iustice, à fa misericorde, & à la bonté inenarrable de fes inclinatioſ & de fes penſées, en quoy confifte fans contredit la plus belle merueille de fon eftre, & le couronnement de fes autres proprietéz, il n'y a que la ſaincteté de la creature intelligente & raifonnable en qui on en voye la reſplendeur. A raiſon de quoy auffi il n'y a qu'elle proprement qui ſoit dite auoir eſté faite à ſon image. Quāt à nous, il nous a aimez à la verité dès auant que nous fuſſions ſaincts; mais c'a eſté pour nous rendre ſaincts, qu'il a déployé deſſus nous ſes admirables miſericordes; car il nous a racheptez pour nous amener à la ſanctification, & pour reparer en nous la reſſemblance de ſes vertus, dont le peché auoit gaſté tous les traits & tous les lineamens en nos ames. Mais depuis

qu'il nous a sanctifiez, il nous aime à cette occasion, & ne peut contempler en nous cette belle idée de sa diuinité, qu'il ne nous affectionne merueilleusement à cause d'elle. Comme les bons peres aiment sans doute leurs enfans auant qu'ils voyent paroistre en eux aucune lumiere de vertu : mais leurs affections se redoublent à mesure qu'ils apperçoient qu'en croissant ils se forment peu à peu par leur education, & s'auancent de iour en iour en l'amour des choses loüables. Or est-ce l'inclination naturelle de l'amour que de bien faire à ce que l'on aime ; & comme dans les choses pesantes à peine sçauroit-on distinguer entre la pesanteur & la propension au mouuement contre-bas, l'amour & l'inclination à vouloir & à faire du bien, quand on en a le moyen, ou ne font qu'une mesme chose absolument, ou si elles en font deux, elles sont inseparables. De sorte qu'il ne se peut faire que Dieu nous embrassant de ses affections à cause de l'image de sa sainteté qui reluit en nous, il ne nous vueille faire du bien : & puis estant puissant comme il est, il ne le veut point de la façon, qu'indubitablement il ne le fasse. Nostre sainteté donc, & les bonnes

œuvres qui en dependent ne nous acquièrent pas le droit de la jouissance de la félicité, puis que Dieu le nous a donné gratuitement lors qu'ils nous a adoptez pour estre du nombre de ses enfans : mais elles attirent ses affections, comme celles d'un bon pere, pour executer par inclination d'amour enuers nostre sanctification, les promesses qu'il nous auoit desia faites de pure gratification, & à l'accomplissement desquelles il estoit desia porté comme fidele & veritable. Ainsi plus nous sommes gens de bien, plus deuons nous estre persuadez que Dieu nous aime cordialement: & plus nous sommes asseurez que nous sommes aimez de luy, plus auons nous de certitude de ses fauorables inclinations à nous donner la jouissance de son Royaume. Comme au reciproque plus nous desirons ardemment cette immortelle félicité, plus soigneusement cherchons nous les moyens de nous persuader fermement que nous l'obtiendrons. Puis donc que l'assurance de la dilection de Dieu enuers nous en est vn indubitable argument, & que nostre sanctification produit cette dilection à proportion de ce qu'elle est grande & lumineuse, & qu'elle represente ex-

cellemment la sainteté laquelle est en Dieu, il n'y a personne qui ne comprenne aisément qu'autant que nous auons de soin de nostre salut, autant faut-il necessairement que nous soyons embrasés de l'amour des bonnes œuures. Et neantmoins pour tout cela nous ne croyons nullement ny que nous soyons iustifiez à cause d'elles deuant Dieu, ny qu'elles soient aucunement meritoires de son Royaume; & cela ne doit sembler estrange à qui que ce soit, puis que nostre conscience ne nous permet pas de nous persuader l'un, & que nostre modestie nous oblige à esloigner de nous toute opinion de l'autre. Je dis premiere-ment que nostre conscience ne nous permet pas de nous figurer que nous puissions estre iustifiez deuant Dieu par le moyen de nos bonnes actions; car estre iustifié deuant Dieu, c'est estre absous en son iugement. Or nous sçauons que si Dieu nous examine tant soit peu rigoureusement par nos œuures, ils ne trouuera nullement le sujet de prononcer pour nous sentence d'absolution. Pource qu'auant que nous fussions venus à la cognoissance, nous pechions continuellement contre luy: ce qui aggrauoit iournellement la

malediction dans laquelle nous sommes naturellement par la corruption originelle. Tellement qu'à l'esgard de tout ce temps-là nous ne pouuons pretendre autre iustification qu'en la remission de nos pechez. Depuis que nous le cognoissons, quelques bonnes œuvres que nous ayons faites, nous en auons tant fait de mauuaises, & il y a tant de deffauts mesmes dans les bonnes dont nous nous vantons, que si nous presumions d'estre iustifiez de cette façon, nous nous trouuerions trop esloignez de nos esperances. S'il y en a quelques-vns entre les Catholiques Romains qui ayent cette bonne opinion d'eux-mesmes, qu'ils n'ayent iamais commis de peché, & qu'ils ne pechent du tout point encor, c'est à eux à aduiser comment ils soustiendront quelque iour vne proposition si hardie deuant le throsne de Dieu, & comment ils la pourront accorder avec leur propre Patenostre. Pour nous, nous aimons mieux nous confesser pecheurs deuant nostre Seigneur, & auoir à sa misericorde toute l'obligation de nostre salut, que de nous mettre en vn inéuitable peril de remporter vne eternelle confusion de sa presence. Et veritablement ie ne puis  
que



que ie ne me plaigne icy du peu d'équité de ceux qui nous haïssent à cause de cette creance. Nostre conscience nous rend témoignage de nostre fidelité enuers nos Roys; & l'Escripture & l'experience conuainquent vniuersellement tout le monde d'une infinité de pechez commis contre Dieu. S'il est arriué à nos peres & à nous de faire quelque chose qui ait dépleu à nos Souuerains, ce n'a point esté par faute d'affection à leurs personnes, ny de respect à leur autorité, mais par des mouuemens qu'ils ont eux-mesmes excusé; au lieu que les pechez que tous les hommes commettent en si grand nombre, procedent de l'affection de la chair, *qui est inimitié contre Dieu.* Hors ces actions auxquelles ou la souffrance, ou la crainte de la persecution nous a portez trois ou quatre fois seulement, on ne sçauroit nous oster cette louange que nous n'ayons rendu quelques bons seruices à l'Estat, & que nous n'ayons vescu conformément à ses loix: au lieu que tous les iours tous les hommes pechent contre Dieu, & transgressent ses commandemens en mille & mille rencontres. Et neantmoins par tout où on parle de nous dans les Escripts politiques &

dans les productions du temps, on n'entend rien autre chose que ces mots de *faction*, de *rebellion*, de *reuelie*; au lieu que dans les liures de Theologie, où il est question de Dieu, on ne parle que de bonnes œuvres & de satisfactions. Si nous nous estions vantez de pouuoir soustenir nos actions deuant le Conseil de nos Roys contre ceux qui les flestrissent de cestitres si odieux, & de n'auoir besoin d'autre chose que de leur iustice pour en estre iustifiez, on nous accuseroit de presumption & de quelque espeece d'impudence, pour ne recognoistre pas assez combien nous auons eu besoin de leur support: au lieu qu'en la controuerse de la iustification des hommes deuant Dieu, ils ne parlent que de leurs propres iustices, & s'appuyent dessus elles pour comparoistre en son iugement. Bien que, comme ie l'ay dit, nous soyons originaires du pays, & nez sujets de nostre Prince, nos ennemis disent pourtant que nous ne subsistons en ce Royaume que de sa grace seulement, pource que par nos fautes, qu'ils veulent estre si criminelles, nous aurions meritè d'en estre expulsez: & cependant, bien que les hommes soient naturellement estran-

gers du Royaume des Cieux , & que tous les iours ils commettent quelque chose qui les en deuroit rendre indignes, on veut pourtant qu'il leur soit donné en vertu de leurs iustices, & comme vne recompensé deuë à leurs bônes actions. Certes ou bien qu'ils ne nous fassent pas si criminels deuant nos Roys, ou bien qu'ils confessent qu'ils ne le sont pas moins enuers Dieu ; & s'ils veulent qae nous recognoissions que c'est de la pure bonté de nos Souuerains que nous subsistons en cét Estat avec la liberte dont nous y joiuïssons , qu'ils ne fassent point aussi de leur costé difficulté de confesser que s'ils joiuissent quelque iour de la felicité du Ciel , ce sera de pure misericorde. I'ay dit que nostre modestie nous deffend de croire que nos œuures puissent meriter le salut. En effect, nous voyons que les peres ne peuuent souffrir que leurs enfans se glorifient en leur presence qu'ils leur soient redeuables de quoy que ce soit. Or nous sommes enfans de Dieu , & nous luy auons sans doute plus d'obligation que nous n'en pouuons auoir à ceux qui nous ont engendrez. Et nous voyons que les Princes ne peuuent non plus endurer que leurs sujets appellent ce

qu'ils font pour eux autrement que du nom de service auquel la naissance les oblige. Or nous sommes beaucoup moins à l'égard de Dieu, que les sujets ne sont à l'égard des Princes. Et enfin, nous voyons que les Cardinaux mesmes, dont la dignité est si eminente, se recognoissent tellement inferieurs à ceux de qui ils sont nez sujets, qu'ils ne croient pas que leurs services puissent iamaïs égaler leurs obligations, ny les en acquitter envers eux, notamment quand à leur faueur & par leur recommandation ils ont esté esleuez à ce degré si prochain de la Majesté Pontificale. Car de cette modeste recognoissance de l'insuffisance de leurs actions à recognoistre ce bien-fait, nous auons des preuues tres-belles & tres-expresses dans les lettres des Cardinaux d'Offat & du Perron au Roy Henry le Grand de glorieuse memoire. Or s'ils le disent en sincerité, nous auons beaucoup plus de sujet d'estre humbles en comparoissant deuant Dieu, qu'ils n'ont d'estre modestes envers les hommes. S'ils le disent seulement par compliment, quant à nous nous estimons qu'on nous peut bien souffrir parler ainsi à Dieu en verité, & nous sentir effe-

etiuellement autant & plus tenus à sa bonté, qu'ils ont fait semblant de l'estre à celle de leur Prince. Si, dis-je, ils ont pensé qu'ils pouuoient bien tesmoigner la gratitude de leurs esprits aux grands Roys par des paroles excessiues, & qui surpassent la mesure de leurs gratifications, nous croyons qu'on ne nous doit point vouloir de mal si nous estimons que la Maiesté du Roy des Roys, de qui tous les Roys mesmes & les Papes sont nez suiets, & la grandeur de ses biens-faits en nostre endroit, excedent beaucoup tout ce que les hommes peuuent ou faire ou dire pour en représenter le ressentiment, & qu'elles sont bien loin au delà de toutes leurs ciuilités & de toutes leurs hyperboles. En vn mot, on ne peut trouuer estrange que nous suiuiions cette belle maxime du Cardinal Bellarmin, qui apres auoir longtemps disputé de l'estime des bonnes actions, & du moyen d'obtenir la iustification, pose pour chose decisiue, liu. 5. de Iustif. chap. 7. *qu'à cause de l'incertitude de nostre propre iustice, & du peril de vaine gloire, dans lequel on pourroit tomber, c'est le plus seur en toute maniere de mettre toute sa fiance en la seule misericorde & be-*



*nignité de Dieu.* Car qui nous pourroit blâmer de nous tenir au plus certain, & de ne vouloir rien hazarder en chose de telle importance ?

Ce que ie viens de dire des bonnes œuvres, & de l'estime que nous en faisons, pourroit satisfaire à cette autre imputation, que nous croyons la predestination de telle sorte, que quelque chose que l'on fasse, soit que l'on croye en Iesus-Christ, ou qu'on n'y croye pas, soit qu'on fasse de bonnes œuvres, ou bien qu'on n'en fasse pas, on ne laissera pas d'estre sauué, si on est prédestiné pour cela, ou de tomber en damnation, si par la reprobation on est destiné à mort éternelle. Car il y en a qui ne font point de difficulté de nous accuser d'enseigner ce dogme hautement, & c'est vn des moyens qu'on employe dans les predications pour rendre nostre profession odieuse. Certainement puis que nous croyons les bonnes œuvres absolument necessaires à salut, de quelque façon que nous estimions que nous sommes prédestinez, nostre creance est que nostre predestination ne nous amenera pas à salut sans les bonnes œuvres. Neantmoins afin d'oster tout scrupule de l'est-

prit de ceux qui voudront s'en éclaircir; voyons s'il y peut auoir rien de plus raisonnable que nostre doctrine & nostre pratique en cette matiere. Quand on nous presche l'Euangile pour nous offrir le salut en Iesus-Christ, on ne manque iamais de nous dire qu'il n'y a pas moyen d'en estre effectiuement participant, sinon en croyant en ce Redempteur. Alors nous ne nous enquerons nullement si nous sommes predestinez ou non, & ne nous mettons nullement en peine des secrets de Dieu, ny des Arrests qu'il a donnez de toute eternité pour le salut & pour la condamnation des hommes. Nous nous disposons seulement à croire en celuy qui nous est offert pour Sauueur; puis que quelle que soit la Predestination de Dieu, il est impossible d'estre participant du salut dont il est auteur, sinon en l'embrassant par vne foy viue & profonde. On ne peut donc pas dire que nous ayons cette creance, que soit qu'on croye, soit qu'on ne croye pas, on fera sauué pourueu qu'on y soit predestiné, puis que nous tenons qu'absolument il n'y a point de salut en Iesus-Christ sinon pour ceux qui croient. Après cela, lors qu'on nous pres-

che qu'il faut croire, on ne manque jamais de nous expliquer nettement quelle doit estre cette foy, & de nous dire qu'il est necessaire qu'elle soit accompagnée d'une serieuse repentance. Car faire seulement profession exterieure du Christianisme, n'est pas croire, selon nous : non pas mesmes auoir en l'entendement quelque legere teinture de la verité de ses dogmes. Croire en nostre Theologie, est estre si viuement & si profondement persuadé des veritez de l'Euangile de Iesus-Christ, que cette persuasion maistrise toutes les autres ; & qu'elle fasse telle impression dedans les volonteés & les affections, qu'elle les détourne de leurs mauuaises inclinations ; & qu'elle les regenere. Alors nous ne pensons point encore à la predestination, & ne nous enquerons nullement de ce que Dieu peut auoir ordonné de toute éternité pour nous, ny pour le reste des autres hommes. Nous examinons seulement nos consciences pour sçauoir si nous croyons de la façon, & nous disposons à ne nous y abuser pas, de peur qu'au lieu de la verité & de la solidité de la foy, nous n'en ayons embrassé que l'ombre. Partant quelle

que soit ou la predestination ou la reprobation, nous croyons que la foy non seulement est necessaire à salut, mais vne foy qui se caracterise nettement, & qui se distingue de la vaine imagination de la foy par vne sincere & ardente affection aux bonnes œuvres. De plus, lors qu'on nous presche qu'il faut croire de la façon, on ne manque iamais d'y adjouster qu'il faut perseverer en cette foy, & dans les bonnes œuvres qui la marquent & qui l'accompagnent. Pource que le salut n'est pas promis à ceux qui croiront simplement, mais qui persevereront en la foy & en la sanctification, & qui demeureront victorieux iusques à la fin de toutes les tentations qui les attaquent. Et alors encore nous n'estimons pas qu'il soit necessaire de penser à la predestination; seulement resueillons nous nos entendemens à cet aduertissement, & autant que nous pouuons nous nous excitons nous mesmes à recevoir l'impression de l'Euangile bien auant, pour estre capables de resister, en cas que quelque tentation nous assaille. Ainsi nous croyons encore que la perseverance est necessaire, quelle que soit la predestination, & quels que puissent estre sur cette



matiere les sentimens des Docteurs de nostre communion, tant y a que rien n'est capable d'arracher cette persuasion de nos consciences. Enfin, on ne nous exhorte point à la perseuerance qu'on ne nous enseigne quant& quant quels sont les moyēs de l'obtenir. Car quant à la foy, pource qu'elle consiste en la cognoissance & en la persuasion des veritez Euangeliques, on nous dit que le moyen de la conseruer est de lire & d'escouter; & de mediter soigneusement la parole de Dieu, qui l'a premierement engendrée. Quant à la sanctification, d'autant qu'elle consiste en la haine du vice & en l'amour de la vertu, & que ces auersions & ces affections se conseruent par l'attentive consideration de la nature de leurs objets, par l'accoustumance de faire les choses bonnes, & de s'abstenir des mauuaises, par l'imitation des bons exemples, par esuiter les vicieuses conuersations, par la crainte de la peine qui suit le peché, par l'esperance de la remuneration que Dieu a misericordieusement promise aux bonnes œuures; & sur tout par la contemplatiō de la Croix de Christ & de sa Resurrection, dont l'vne nous fournit le modele de la mortification de



nos affections , & l'autre le patron & le motif de reffusciter en nouvelle vie , on nous met continuellement toutes ces choses deuant les yeux , pour fomenten en nous la fainteté que nostre conuerfion à Christ y a commencée. A quoy on ne manque iamais d'adjofter que la foy & la sanctification venant de Dieu , c'est à luy qu'il se faut adresser pour obtenir la grace par la vertu de laquelle elles soient conseruées en nous , & de nous exhorter à cette occasion de veiller avec assiduité à la priere. Et afin de nous y exciter d'autant plus viuement , on nous aduertit que nous auons à faire à vne infinité d'ennemis , qui nous obligent à vne souueraine vigilance de nostre part , & qui nous rendent vne particuliere assistance de la grace de Dieu neceffaire. Le peché que nous portons naturellement en nos affections ; le monde qui nous amorce par ses voluptez , ou qui nous estonne par ses persecutions ; le malin qui nous dresse mille pieges , & qui nous attaque de mille tentations , nous font perpetuellement rameneurs , afin que nous nous tenions sur nos gardes. Là nous ne pensons point encore à la Predestination , & quelle qu'elle soit,

nous taschons d'esueille toutes les puissances de nos esprits, & pour embrasser toutes les occasions de nous auancer en la pieté & en la vertu, & pour fuir toutes celles qui sont capables de nous en destourner, & pour demander à nostie Seigneur qu'il nous donne le pouuoir de le faire. Pourquoi donc nous accuse-t'on de croire que la Predestination est si puissante en ce qui est du salut & de la condamnation, que sans auoir esgard ny à bien ny à mal elle y fait tout toute seule? Il est bien vray certes premierement, que nous sommes asseurez qu'en vertu de cette predestination nous obtiendrons indubitablement la vie eternelle. Mais pour ce qui est de la creance de la Predestination, puis que c'est vn poinct de la Foy, que S. Paul enseigne tres-ouuertement, où il faut renoncer au nom de Chrestien, où il faut aduoüer qu'il y en a vne. A la verité la maniere de l'interpreter est differente entre les Catholiques Romains & les Reformez. Mais cela nedoit pas estre trouué fort merueilleux, puis que les Catholiques ne s'en accordent pas absolument entr'eux mesmes. Tant y a qu'il y a vne predestination de quelques-uns à salut, & que pour estre bon Chre-

stien il le faut ainsi croire. Or puis qu'il y en a vne, on ne doit point trouuer mauvais que nous nous estimions estre du nombre de ceux qui sont predestinez, puis que nous trouuons en nous les marques & les effets par lesquels la Predestination se reuele. Car puis que nous croyons en Iesus-Christ, & que nous nous adonnons tant que nous pouuons aux œuures de sanctification, & que l'experience nous fait voir que beaucoup d'autres n'y croyēt pas, & qu'ils se laissent emporter au peché à l'abandon, il faut necessairement ou que cette difference vienne de nous, ou que Dieu nous ait fait en cela quelque grace, laquelle il n'a pas faite aux autres. Or est-ce là où on commence à nous parler de la Predestination, lors qu'il est question de sçauoir d'où vient cette difference. Car on nous enseigne que de nature nous ne sommes pas meilleurs que les autres, & par consequent, puis que nous croyōs, & que tant d'autres ne croyēt pas, il faut que Dieu nous ait traittez inegalement. Et cette inegalité consiste en ce que Dieu nous ayant présenté exterieurement à tous vn commun Redempteur par la predication, & nous ayant fait

exhorter les vns & les autres à le receuoir avec foy & repentance, il s'est contenté de cette grace commune & exterieure enuers ceux-là, au lieu qu'enuers nous il en a desployé vne interieure & particuliere. D'où est venu qu'au lieu que les autres ont par leur malice reietté le Redempteur qui leur a esté offert, nous l'auons quant à nous receu par la grace que Dieu nous a faite. Pour ce donc que Dieu ne prend pas les conseils de ce qu'il doit faire de iour à iour, & que comme dit l'Escripture, *de tout temps toutes ses œuvres luy sont cogneuës*, il faut necessairement que de toute eternité il ait ordonné de mettre cette distinction entre les autres & nous, & c'est en cette eternelle ordonnance que la Predestination consiste. Iusques là il n'est pas possible que nostre creance choque l'esprit de personne qui soit tant soit peu raisonnable. Car quoy? Trouuera-t'on maiuais que nous donnions à Dieu toute la loüange de ce que nous croyons, & de ce que nous nous repentons de nos pechez, au lieu que les autres s'endurcissent en leur incredulité & en leur impenitence? Certes ce seroit estre trop presomptueux que de vouloir rauir cette gloire à Dieu pour se l'attri-

buer à foy-mefme. Ceux de l'Eglife Romaine mefmes , fur cette prefupposition qu'ils font dans la voye de falut, & que nous n'y fommes pas, rendent fans doute graces à Dieu de ce qu'il les y a mis plûtoft que nous, & ainfi rendent tefmoignage à cette maxime de nostre profeflion, que c'eft la mifericorde de Dieu qui met cette diftinction entre les hommes. Ou bien fe scandalifera-t'on de ce que nous difons que ce que Dieu execute maintenant en nous, il l'a ordonné de toute eternité? Ce feroit aller contre la parole de Dieu & contre la raifon, & raur à Dieu la loüange de fa prefcience. Ou finalement eftimera-t'on que cette doctrine nous rende plus nonchalans en ce qui eft de nostre falut? Nullement. Car puis que tandis qu'on nous exhorte à la foy, à la repentance, à la fanctification, ny nous ne penfons point à la predeftination, ny on ne nous donne point d'occafion d'y penfer, elle ne peut trauerfer l'efficace des exhortations qu'on nous adrefse. Quand nous venons à y penfer, puis que nous ne cognoiffons nostre predeftination que par fes effets, & que fes effets confiftent en foy & en fanctification, à mefure que nous defirons



d'estre du nombre des predestinez, à mesme mesure faut-il que nous taschions d'auoir la foy & la sanctification, qui en sont les seules marques. Enfin, quand nous les auons trouuées en nous, & que par ce moyen nous auons cognu que nous sommes predestinez, tant s'en faut que nous en prenions occasion de relascher quelque chose de l'ardeur que nous deuons auoir à la pieté, qu'au contraire, plus la grace de Dieu a esté speciale en nostre endroit, plus nous en sentons nous obligez de luy en rendre nos recognoissances. Pour ce qui est de cette persuasion que nous auons d'obtenir asseurément le salut en vertu de cette predestination, voicy comment on nous en instruit. On nous dit que puis que les hommes sont naturellemēt aussi mauuais les vns que les autres, ce que Dieu nous a fait vne grace si particuliere, ne vient pas de quelque merite qui fust en nous. Il faut que ce soit de sa pure & libre volonté, & d'une faueur speciale qu'il nous a portée, sans que nous l'y ayons inuité, qu'il nous ait ainsi gratifiez. Et le Cardinal Bellarmin est entierement de ce sentiment, & ne veut pas que l'election & la predestination de quelques-vns soit  
fondée

fondée sur aucune preuision ou prescience de leurs œuvres. Ce qui nous donne occasion de raisonner de cette façon. Puis que Dieu n'a point eu d'autre motif que sa pure volonté qui l'ait induit à nous auantager plus que les autres en cet esgard, il n'y peut auoir de raison pourquoy il ne nous conserue pas la foy, laquelle il nous a donnée. Pourquoi changeroit-il d'aduis en vne chose dont la resolution n'a point dependu d'ailleurs que de son bon plaisir seulement ? De plus, la foy & la repentance sont des qualitez souuerainement belles en elles mesmes, & capables à merueille d'attirer ses affections. Si donc il nous a tant aimez que de les nous vouloir communiquer du temps que nous ne les auions pas, comment ne nous aimeroit-il point apres qu'il nous les a communiquées ? Et si l'amour qu'il nous a porté auant qu'il y eust rien en nous qui l'y inuitast, l'a peu exciter à nous orner de si excellentes qualitez, son amour, qui s'est redoublé depuis qu'il les a veuës en nous, ne le porteroit-il point à les conseruer apres les y auoir mises ? Enfin il ne nous les a données qu'afin de nous conduire à salut : Car le salut est la fin, la foy

est le moyen par lequel il nous y amene. Puis donc qu'il s'est proposé cette fin là premierement, & qu'il a eu si fort à cœur de nous y faire paruenir que de nous en donner de tels & de si certains moyens, qui est-ce qui peut interuenir qui l'empesche de se proposer tousiours le mesme but, & par consequent d'employer aussi tousiours les moyens qui nous y conduisent? Sur ces raisonnemens qui sont tirez de la parole de Dieu, & que diuers beaux passages authorisent, nous fondons cette esperance, qu'asseurement Dieu nous sauuera, & qu'il ne se presentera aucun obstacle à l'accomplissement de ce beau dessein, qu'il ne surmonte. Or comme chacun peut voir que ces raisonnemens tournent à la gloire de la sagesse & de la bonté de Dieu, & qu'ils conuiennent merueilleusemēt bien à la fermeté invariable de sa nature & de ses conseils, aussi ne peut-on pas dire qu'ils nous rendent negligens en ce qui est des choses qui sont necessaires pour nostre salut. Et ie m'emerueille, ou qu'on se le puisse imaginer, ou qu'on nous le puisse reprocher, veu qu'en l'Eglise Romaine on a des creances à qui on pourroit imputer de semblables consequences. Le Pape croit

qu'il ne peut errer dans les matieres de la foy. Ceux qui font des sentimens de la Sorbonne attribuent cette prerogative au Concile. Soit au Concile, soit au Pape qu'appartiennent le privilege de l'infalibilité, tant y a que tous ceux de cette communion tiennent constamment qu'il a esté donné à l'Eglise. Si cela est, c'est vne certaine predestination de Dieu, par laquelle il a ordonné de preserver son Eglise de toute erreur en la foy, & de l'illuminer eternellement de la cognoissance de sa verité. Quand donc il est question de vuider quelque controuerse en la Religion, cette creance rend-elle les Papes ou les Conciles, moins diligens à bien examiner la Parole de Dieu, & la tradition des anciens, & à se bien garder de la finesse de Satan, & de la sophisterie des heretiques? On y croit que l'Eglise est imperissable, & que Dieu la garantira de ses ennemis iusques à la fin. Cela vient encore sans doute de quelque predestination de Dieu, qui a resolu de mener la Nasseille qu'ils appellent de S. Pierre, à bon port, & de la sauver de tous naufrages. Cette creance donc empesche-t'elle que ceux qui sont au gouvernail n'employent toutes sortes de

moyens propres pour la conseruation; ou imprime-t'elle en leur esprit vne si profonde securité, qu'ils ne se mettent point en peine du salut de leur vaisseau, & qu'ils le laissent aller à l'abandon entre les bancs & contre les roches? Comme donc ils ne considerent pas cette predestination de Dieu à l'esgard de l'intallibilité de l'Eglise, & de son indefectibilité, comme on parle, ainsi qu'une occasion de securité & de negligence en ce qui regarde l'employ des moyens, mais seulement comme vn accouragement à les employer & soigneusement & ioyeusement, avec vne esperance indubitable d'un auantageux succez; ainsi ne considerons nous nullement cette predestination en ce qui est de nostre salut, comme vn sujet de nous y comporter nonchalamment, mais plustost comme vn motif d'y trauailler avec grand soin & grande consolation aussi, sçachant qu'il en reüssira vn euenement fauorable. Autre donc est la predestination par laquelle Dieu a resolu de produire luy-mesme quelque euenement sans l'entremise d'aucuns moyens, ou au moins par l'entremise de certains moyens sur lesquels il ne nous donne point de



commandemens : & autre la predestination qu'il n'exécute que par le moyen de nos actions , dont il nous a luy-mesme donné les commandemens & les regles. Là nous pouuons bien demeurer les bras croisez , & attendre pour exemple que l'eclipse du Soleil, ou arriue , ou se passe, sans y rien contribuer de nostre part. Car ny nostre mouuement , ny nostre repos ne la hasteront , ny la retarderont pas d'une minute. Icy c'est vne pure frenesie que de negliger de faire ce qui nous y est commandé , & neantmoins en esperer l'accomplissement , puis que cette sorte de predestination ne s'accomplit point sinon par l'exécution des commandemens que Dieu nous y donne. Partant comme le mespris des moyens qui empesche l'euement , est vne preuue indubitable qu'il n'auoit point esté preordonné ; ainsi le legitime employ des moyens est vn certain argument de la predestination de l'euement mesme. Et comme celuy qui se croit predestiné à viure , & neantmoins ne veut pas manger , est à demy furieux ; celuy qui mange & qui boit , & qui fait les fonctions d'un homme viuant, s'il ne croit auoir esté predestiné à viure par ce moyen

là, n'a pas la ceruelle en bonne assiette.

Le troisieme exemple sera pris de ce qu'on nous impute de ne croire pas le franc arbitre, & par ce moyen de dépouiller l'homme de sa nature, d'oster à ses actions la qualité de bonnes & de mauuaises, & de donner ainsi matiere d'accuser Dieu d'impertinence quand il les remunere, & d'injustice quand il les punit. Pource que ce qui n'est ny bon ny mauuais, ne peut estre vn sujet capable de loüange, ny de blasme, de supplice ny de remuneration. Certainement, si nous enseignions tout cela disertement, ce seroit non seulement vn grand erreur en la Religion, mais vne doctrine pernicieuse à la vie ciuile. Car ce seroit autant que si nous ostions la difference qui est naturellement entre le vice & la vertu; ce qui sans doute apporteroit vne horrible confusion aux choses du monde. Mais iusques icy aucun n'a esté si peu soigneux de la reputation de sa pudeur, que d'oser nous en accuser; seulement on dit que ce que nous enseignons en la matiere du franc-arbitre, tire necessairement ces mauuaises doctrines en consequence. Or quand ainsi seroit, il ne seroit pourtant pas raisonnable de nous imputer

les consequences de nos dogmes, si nous ne les recognoissons & ne les aduouions pas ; car il y a peu d'erreurs dont on ne puisse tirer de fort dangereuses conclusions, si on veut vn peu subtilement raisonner ; & il y a fort peu de gens qui ne tiennent quelques-vnes de ces erreurs dont vn subtil raisonnement peut deduire des conclusions pernicieuses. De sorte qu'il n'y auroit quasi homme au monde qui ne deust & haïr son prochain, & estre hay reciproquement de luy, si nous voulions suivre trop loin les consequences des opinions les vns des autres. Il suffit donc que nous rejettons celles qu'on veut tirer de nos sentimens, & que ce que nous croyons en cette matiere, ne produise aucun mauuais effet au prejudice de la Religion, ny au dommage de la vie ciuile. Or que nostre creance ne produise rien de tel, c'est chose claire par l'experience ; car elle ne peut gaster la pieté ny les mœurs de ceux qui ont des opinions contraires aux nostres, puis qu'ils ont & les consequences & les principes dont ils estiment qu'elles naissent en abominatiō & en horreur. Et quant à nous, tant s'en faut qu'elles soient pour corrompre nos inclinations, & pour esteindre

en nos esprits l'amour & l'estime de la vertu, que nous les auons encore en plus grande horreur que nos aduersaires, que nous soustenons qu'elles ne decoulent nullement de nostre doctrine, & que de ces mesmes principes dont quelques-vns essayent de deduire ces damnables conclusions, nous faisons sortir des enseignemens tres-efficacieux, & des exhortations tres-viues pour induire les hommes à la pieté. En effet, quoy que l'on die de nos sentimens en cette matiere, tant y a qu'en nos actions nous ne pretendons pas estre comme des troncs de bois, ou comme des pierres, dont le mouuement naturel de haut en bas, ne peut nullement estre compté entre les choses moralement bonnes ou mauuaises. Nous auons des sens exterieurs, par lesquels nous cognoissons les objets qui se presentent deuant nous, & des appetits interieurs qui nous portent vers ces objets, ou bien qui nous en retirent, apres que nous les auons cognus dignes de nostre auersion ou de nostre agréement. Nous ne pretendons pas mesmes agir à la façon des animaux destituez de la raison, dont tous les mouuemens & les appetits sont

brutes , quoy qu'ils procedent de quelque cognoissance des objets exterieurs , autant que les sens & la faculté de l'imagination leur en donne. Pource que cette cognoissance qui naist des sens exterieurs & de l'imagination seulement , ne peut pas atteindre iusques au discernement des qualitez & des circonstances qui font que les actions sont morales, c'est à dire , bonnes ou mauuaises , & dignes de peine ou de remuneration. Nous auons tous par la grace de Dieu la raison & l'intelligence, faculté naturellement capable de iuger des relations qui donnent aux actions humaines la qualité de vice ou de vertu. Et comme ainsi soit que c'est le propre de l'intelligence, de ne tirer pas ses actions à coup perdu, mais de s'y proposer vne certaine fin, comme vn blanc où elle vise, & que toutes les fins que nous pouuons nous proposer sont ou dans l'honnesteté des choses loüables, ou dans le contentement qui naist des choses delectables, ou dans l'vtilité de celles qui peuuent profiter, nous ne faisons aucune action avec intelligence, que nous ne nous mettions deuant les yeux quelqu'vne de ces trois fins. De plus, toute intelligence qui se



propose vne certaine fin, ayant encore ce propre de la Nature de iuger des moyens qui sont bons pour y paruenir, & quand il s'en presente plusieurs, de faire le choix de ceux qu'elle estime les meilleurs, & de les preferer aux autres, nous ne nous proposons iamais de telles fins en nos actions, que nous ne consultations pareillement sur les moyens, & que de cette consultation nous ne formions la resolution d'agir ou de n'agir pas, conformément à la nature tant de la fin & des moyens, que de l'intelligence qui se la propose & qui les gouverne. Enfin toutes les actions de cette nature procedant de la volonté, & ce que l'on fait du mouuement de sa volonté ne pouuant estre imputé à contrainte ny à violence, soit bien ou mal que nous faisons, nous nous y portons volontairement, & n'attribuons aucune de nos actions à chose quelconque qui soit tellement au dehors de nous, qu'elle nous y force. Iusques-là nous recognoissons vn franc arbitre, & on ne peut raisonnablement nous accuser de rien croire, ny de rien enseigner autrement. Cela donc sans aucune difficulté suffisant pour rendre nos actions dignes de blasme & de punition, ou de

remuneration & de loüange, peut-on iustement demander de nous dauantage? Certainement quand il est question d'aller plus auant, & de sçauoir quelle fin nous sommes capables de nous mettre deuant les yeux, nous disons que nous sommes de nostre nature si mauuais & si corrompus en nos passions, que nous ne nous proposons iamais, fors l'Vtile & le Delectable, sinon que Dieu nous fasse la grace d'appercevoir l'excellence de l'Honneste, & qu'il nous donne de nous y porter. Encore nous trompons nous tousiours au iugement que nous faisons du delectable & de l'vtile, & ne le constituons sinon dans les choses qui plaisent à nos mauuaises passions, iusques à ce que Dieu nous illumine, pour sçauoir bien discerner la solidité de la verité d'avec la vanité des apparences. Puis donc qu'il ne nous arriue iamais d'en bien iuger de nous mesmes, sans la preuention & l'assistance de la grace de nostre Seigneur, il faut qu'il y ait naturellement en nous quelque chose qui nous en rende incapables, & qui nous oste, non le franc arbitre mesme, car nous ne le pouuons perdre sinon en perdant la raison & la volonté, mais le bon vsage du franc

arbitre en ce qui est du bien & du mal; car ce qui est ainsi vniuersel & en toutes personnes & en tous temps, doit auoir vne cause necessaire & determinée, & c'est ce qu'on appelle le peché originel, dont toutes les puissances de nos ames sont infectées. Si cette doctrine-là nous priue de la bonne grace de nos superieurs & de nos concitoyens, il y a certes matiere de s'en estonner, pour ces trois raisons principales. La premiere est, qu'elle donne à Dieu la louange toute entiere de tout le bien qui est en nous & que nous faisons. Or y a-t'il sans doute moins de peril à donner à Dieu vn peu plus de louange qu'il ne faut, qu'à en donner beaucoup moins qu'il ne faut à l'homme. Quant nous attribuerions à Dieu quelque partie de la louange qui nous appartiendrait (ce que nous ne faisons nullement pourtant) nous ne croirions pas en deuoir encourir la reprehension de personne. Assurément si ce qu'il y a de Dieu, & ce qu'il y a de l'homme en nos actions, est si mal-aisé à diuiser, qu'il soit comme impossible de le partager que l'vn ou l'autre n'y perde, il est sans doute plus raisonnable de tout rapporter à la gloire de Dieu, de qui nous tenons tout,

qu'à nous, qui n'auons rien de nous-mesmes. La seconde est, qu'en cela nous suivons precisément les décisions que l'Eglise a faites contre les Pelagiens & Semi-pelagiens, qui ont voulu donner plus qu'il ne faut au franc arbitre de l'homme. Et qui considerera bien la doctrine de saint Augustin en cette matiere, trouuera qu'elle est entierement conforme à la nostre, & qu'il a combattu Pelagius & ses sectateurs des mesmes armes dont nous nous servons maintenant. Or seroit-ce chose bien estrange qu'on nous haïst à cause d'un sentiment en faueur de qui l'Eglise a notoirement prononcé, & qui a esté constamment tenu par ce grand Saint, dont le nom & la memoire est en benediction en l'Eglise. La troisieme est finalement, qu'il y a vne infinité d'honnestes gens en la communion de Rome, qui sont en cela de mesme opinion avec nous, qu'on nommoit cy-deuant dans les Escoles Predeterminans, & que depuis quelques temps on appelle Iansenistes. Et on ne peut pas dire que nous en vueillions faire accroire au monde lors que nous parlons ainsi; car les escrits qu'on fait contr'eux les accusent si hautemēt d'estre Calvinistes en ce point,

qu'il ne se peut reuoquer en doute. Le seul liure que le Iesuite Petau a composé touchant le franc arbitre depuis peu, en fait foy à tout le monde. Or iusques à cette heure on les a supportez doucement, & Rome mesme ne s'estoit point meflée de ce differend, ou au moins n'auoit ouuertement fauorisé aucun des partis contendans, iusques à il y a fort peu, que le Pape de maintenant, s'est, à ce qu'on dit, déclaré pour les Anti-Iansenistes. Ce seroit donc certes passion si on auoit de l'a-uerfion contre nous à l'occasion d'une chose que la communion de Rome n'a point encor decidée formellement, & qui n'empesche pas qu'on ne tienne pour fort honnestes gens & pour bons Chrestiens ceux qui y ont des sentimens tout à fait conformes aux nostres.

Le quatriefme exemple sera pris de cette accusation si atroce, que nous faisons Dieu auteur de peché. Ce qui veritablement seroit digne de beaucoup d'horreur, s'il estoit aussi veritable, que beaucoup de gens le nous imputent hardiment. Or d'abord il y a de la peine à conceuoir comment cette accusation s'accorde avec la precedente; car ie ne diray pas que si nous



ruinons absolument le franc arbitre, dont l'usage est nécessaire pour faire que nos actions portent iustement la qualité de vertu ou de péché, nous osons aussi tout péché de la conuersation des hommes, & que Dieu ne peut estre auteur d'une chose qui n'est point. Je diray seulement que si, comme nous le faisons, nous attribuons à Dieu toute la gloire des bonnes actions que nous produisons, & si, comme on nous en accuse, nous le faisons encor auteur de toutes les mauuaises, il faut qu'il y ait vne merueilleuse bizarrerie en nos opinions, & que nous ayons bien peu d'entendement de ne recognoistre pas quelle extravagance il y auroit d'attribuer également à Dieu tout le bien & tout le mal qui se trouueroit dans les actions des hommes. Outre qu'ainsi nous ne laisserions à la creature ny loüange ny blasme de bien & de mal, le zele que nous auons d'un costé à la gloire du Createur, feroit de l'autre choqué bien rudement & bien manifestement par la mauuaise opinion que nous aurions de la sainteté de sa prouidence: Mais veritablement on a grand tort de nous attribuer des sentimens que non seulement nous rejettons comme faux, mais

que nous auons en execration comme abominables. Tant s'en faut que nous soyons coupables de ce crime, qu'au contraire, nous mettons constamment & vniuersellement cette distinction entre le bien & le mal de nos actions, que nous attribuons absolument le bien à Dieu, comme à la seule cause dont il peut estre produit; & quant au mal, nous le donnons entierement à l'homme & au malin, qui en font la seule origine. Or encore que cette question, que c'est que la Prouidence de Dieu fait ou ne fait pas en la productiõ des mauuaises actions, soit arduë d'elle-mesme, & de longue discussion, & qu'en accusations si calomnieuses, qu'on ne soustient d'aucunes preuues, il suffit de nier le crime pour en estre iustificié, ie ne laisseray pas de dire icy deux ou trois choses pour nostre deffense. Premièrement, il ne nous est iamaïs tombé dans la pensée, que Dieu par quelque operation interieure de sa Prouidence, mette au cœur des hommes de mal faire, ny qu'il y incite le moins du monde leurs affectiõs. C'est dans la conuoitise, & dans la corruption de nostre nature qu'est le germe du peché, qui s'excite & qui bourgeonne de luy-mesme, & qui  
respand

respand en nos pensées, en nos actions, & en nos paroles tout le vice qui y est. Ce que la Prouidence de Dieu fait en cela, est de gouverner tellement quant à l'exterieur, l'administration des objets qui sont capables d'exciter les affections & les conuositives, qu'ils se presentent à propos deuant les facultez & les esmeuent, lors qu'il est question de l'execution de quelque arrest de sa Prouidence, où les pechez des hommes doiuent interuenir. Comme ç'a esté cette diuine conduite & du Pere & du Fils, qui a fait que le Seigneur s'est trouué à point nommé deuant les yeux de Iudas, des Pharisiens, & de Pilate, pour esmouuoir en chacun d'eux les passions auxquelles ils estoient enclins, & de l'émotion desquelles dependoit la crucifixion du Sauueur du monde. Car il n'est point besoin d'instiller ny l'auarice, ny l'enuie, ny la cruauté dans l'esprit des hommes, à ce qu'ils soient induits à faire des actions conuenables à la nature de ces vices, lors que les occasions s'en presenteront; la corruption qui est en eux tous dès le ventre, les rend d'eux-mesmes assez enuieux, & assez cruels. Il ne faut que leur faire voir, ou quelque notable somme

d'argent, ou quelque eminente vertu qui offusque leur reputation, & qui abbaisse leur puissance, ou quelque autre tel objet sur lequel ils puissent contenter la barbarie de leurs passions. Et comme si vous approchez vne matiere souuerainement combustible de la flamme, incontinent le feu s'y prend, la seule presence des choses capables d'exciter ces passions, les allume incontinent. Pour ce qui est de l'intérieur, l'efficace de la Prouidence consiste principalement en ce que les pensées des hommes estans fort errantes & vagabondes, & la varieté des objets qui se presentent à eux les faisans assez souuent flotter irresolus entre diuers mauuaises actions, elle fait par des moyens secrets & tout à fait imperceptibles à nostre intelligence, qu'ils se determinent plustost à vne chose qu'à l'autre, pour seruir sans y penser au dessein lequel Dieu s'estoit formé. Ce qui fait qu'encore qu'il ne contribuë du tout rien à la naissance de ces mauuaises pensées, & que toute son operation se déploye à les gouverner seulement, l'euenement qui s'en ensuit luy est attribué comme s'il en estoit la cause. A quoy contribuë beaucoup ce que Satan ne pouuant rien entre-

prendre dessus les hommes, sinon autant que Dieu luy permet, aussi-tost que Dieu luy a lasché la bride, il court & vole dedans leurs esprits, & y embrase les passions qui n'y estoient déjà que trop enflammées d'elles-mesmes. Apres cela, de quelque façon qu'on explique cette matiere, car la difficulté fait prendre diuerses routes à ceux qui se meslent de l'interpreter tant en l'vne qu'en l'autre communion, tant y a que nous n'auons iamais parlé de ce que Dieu y fait en termes si precis, & qui semblent tant faire dependre les manuaises actions des hommes de l'operation de la main de Dieu, que l'Escripture n'en employe de beaucoup plus emphatiques, & qui deuroient donner beaucoup plus de sujet de scandale, s'il y auoit quelque chose en l'Escripture dont on se deust scandaliser; car elle ne se contente pas de dire en ce qui est de la crucifixiõ de nostre Seigneur, que les Iuifs qui l'ont mis à mort n'ont rien fait sinon ce que *la main & le conseil de Dieu auoient déterminé se deuoir faire*, Act. 4. 8. mais elle enseigne disertement que c'est Dieu qui a *endurci le cœur de Pharaõ* contre ses propres commandemens, Exod. 7. 3. que c'est luy qui a *fait* qu'Absalon a commis



inceste avec les concubines de Daud, afin de le punir de ses pechez, 2. Sam. 12. 11. 12. que c'est *luy qui enuoye efficace d'erreur en ceux qui n'ont point receu la dilection de verité, afin qu'ils croient à mensonge.* 2. Theff. 11. 10. 11. & choses semblables. Comme donc la bonne opinion qu'on a de la sainteté de l'Ecriture & de la diuinité de son inspiration, fait qu'on se porte à expliquer ces endroits de telle sorte, qu'on y trouue enfin que la conduite de nostre Seigneur y demeure exempte de blasme; la charité Chrestienne deuroit porter ceux qui lisent les escrits de nos gens sur cette matiere, à les exposer fauorablement, s'ils y trouuoient quelque chose qui de prime abord ne fust pas à leur contentement. Car c'est bien vn effet de nostre pieté que de tascher d'applanir dans les Escritures les passages qui s'y rencontrent vn peu difficiles ou scabreux; mais c'est vn grand defaut de charité, & vne procedure qui tesmoigne de la passion beaucoup, que de condamner comme criminel dans les liures de nos gens, ce qu'on trouue moyen de iustifier pleinement dans ceux des Prophetes & des Apostres. Finalement, il n'y a dans ces diuins auteurs & dans les no-

stres expression si dure en cette matiere, ny si capable de donner de l'alarme à l'esprit humain, qu'il ne s'en trouue de pareilles & de plus fortes encore dans les escrits des autheurs les plus illustres de la communion de Rome. Car, ie vous prie, que peut-on rencontrer en nos gens qui soit au delà de ces paroles du Cardinal Bellarmin au second de ses liures de la Perte de la Grace, chap. 13. *Pour ce qui est de l'inceste d'Absalon, Dieu est dit auoir fait ce mal-là, non entant que c'estoit vne peine pour Dauid. Car encore que ce fust vn mal qu'Absalon pechast, ce que Dieu ne vouloit point, mais le deffendoit; c'estoit pourtant vn bien que Dauid fust puny; ce que Dieu a voulu & l'a fait.* Item au chap. 16. *Non seulement Dieu delaisse les pecheurs quand il les abandonne aux desirs de leurs cœurs, mais aussi quand il tourne & gouuerne, & ordonne si admirablement les mauuaises volontez, lesquelles il n'a pas faites, mais n'a pas ignoré quelles seroient telles, que malgré qu'ellos en ayent, elles luy seruent: c'est à dire, à l'execution de ses desseins.* Ailleurs il dit que Dieu les regit, & les gouuerne, & qu'il les tord, ou flechit, & mesmes avec quelque espece de violence, (car le mot *torquet* signifie tout cela)

operant en elles inuisiblement, tellement qu'elles s'adressent plustost à vn mal qu'à l'autre par la prouidence de Dieu. Il est vray qu'il dit que ce n'est pas *positiuement*, qu'il le fait, mais *permissiuement* seulement, & qu'il explique cela par la comparaison d'un chasseur duquel on dit qu'il a poussé son chien sur le lieure, quoy qu'il n'ait fait que lascher la leſſe dont il le tenoit arresté. Mais outre que l'emphase de ces mots monstre qu'en cette *permission*, il y a quelque efficace *positive*, il dit que mesmes *positiuement* Dieu encline les volonteſ des meschans plustost à vn mal qu'à l'autre, quoy que ce soit *occasionnellement & moralement*, c'est à dire, en leur mettant en l'esprit quelques pensées bonnes en elles mesmes, mais dont ils abusent à mal. Puis donc que nous faisons également profession d'auoir en detestation que Dieu soit l'auteur des pechez des hommes, & que nous nous exprimons en termes qui sont esgalement capables, en les prenant trop à la rigueur, de faire soupçonner quelque chose de tel pourtant, quelle apparence de raison y peut-il auoir que les Docteurs Romains soient neantmoins receus à nous accuser continuellement, & que quant à

nous on ne vueille pas donner vne oreille à nos deffenses : Ou de quelle iustice peut-on colorer ce procedé, que l'on recompense des dignitez les plus eminentes de l'Eglise de Rome ceux de sa communion qui parlent ainsi, & qu'à ces pauvres Reformez, qui ne disent du tout rien de pis, on fasse sentir tant d'effets d'une animosité comme implacable?

---

## SECTION IV.

*Que si on considere ceux de la Religion à l'esgard des choses qu'ils ne croient pas, ils ne meritent point d'auersion. Et premierement touchant l'inuocation des Saints, l'adoration des Images, & le Purgatoire.*

**V**iennent maintenant à estre considerer les principaux chefs des choses que nous ne croyons pas, ou que nous ne pratiquons pas en matiere de Religion. Car ie ne veux parcourir que les plus notables, ne doutant pas que si i'y puis donner quelque satisfaction à ceux qui nous

veulent du mal , ils ne se portent d'eux mesmes à iuger équitablement & fauorablement du reste. Le premier que ie proposeray est l'inuocation des Saints, que nous ne croyons pas estre permise à l'Eglise , & qu'à cette occasion nous ne pratiquons point entre nous. Surquoy certes il y a sujet de s'estonner comment on le trouue si mauuais. A la verité si nous le faisons pource que nous fussions ennemis des Saints & de la Vierge Bien-heureuse, quoy que la chose ne fust pas blasmable en elle-mesme , nous n'en pourrions pourtant nullement ny iustifier , ny mesmes excuser le motif. Mais Dieu & les hommes nous sont tesmoins, quelques calomnies qui se sement parmy le vulgaire , & à quelques excez qu'on s'emporte quelquesfois dans le zele des predications, que nous estimons les Saints Bien-heureux, que nous admirons leurs vertus , que nous imitons leurs exemples, & sur tout , que nous auons de la glorieuse Mere de Nostre Seigneur, toutes les plus hautes & les plus auantageuses opinions que l'on peut auoir d'une personne purement humaine. Nos écrits publics en font foy , nos propos en attestent



en toutes occasions, & nos prédications, au moindre sujet qui nous en est présenté, resonnēt magnifiquemēt de leurs loüāges. De sorte que si nous ne les inuoquons pas, il le faut simplement attribuer à vn pieux & religieux mouuement de nos consciences. Or y a-t'il certes diuerses considerations pour lesquelles ceux avec qui nous viuons nous y doiuent estre plus equitables; car pour ne dire point icy que tout tel mouuement de conscience procede de quelque reuerence enuers la Diuinité, tout le monde aduouë que nous n'auons point de commandement en l'Ecriture d'inuoquer autre que Dieu. Et de fait le Concile de Trente ne dit pas que ce soit vne chose necessaire, mais *bonne & utile* seulement, que d'inuoquer les Saints qui regnent avec nostre Seigneur. De sorte qu'on ne nous peut accuser de rebellion contre Dieu, ny de desobeyssance à ses commandemens en cet esgard. Or si l'Apostre S. Paul dit qu'il faut supporter charitablement ceux qui n'osent manger de quelque espece de viande, pource qu'ils se figurent qu'elle est defenduë, encore qu'elle ne le soit pas, il nous supporteroit sans doute beaucoup plus doucement encore

s'il viuoit , estant icy question d'une chose qui quand elle ne seroit pas defendue de Dieu , nous est fort suspecte pourtant , & qui est d'incomparablement plus grande importance. Apres cela , ce qui augmente nostre soupçon , c'est que ny dedans le Vieil ny dedans le Nouveau Testament nous n'en voyons aucun exemple. Car tout ce qu'on en veut tirer pour iustifier le contraire , est si friuole , que peu s'en faut que ceux mesmes qui l'alleguent n'en ayent honte. En effet , pour ce qui est du Vieux Testament , puis qu'en l'Eglise Romaine on croit que ny les Patriarches , ny les Prophetes , ny les autres Saints de ces temps-là , n'ont point esté recueillis en Paradis sinon à l'aduenemēt du Messie , c'eust esté lors chose bien impertinente que de les vouloir inuoker. Pour ce qui est du Nouveau , les plus passionnez disputeurs n'y en trouuent pas la moindre trace. Or ce qu'il n'y a point de commandement d'inuoker les Saints , est vn argument indubitable de l'inutilité de la chose en soy. Si elle pouuoit seruir à la gloire de Dieu & à nostre salut , tres-assurément Dieu la nous eust commandée. Mais ce qu'il n'y en a point d'exemple , est vne tres-violen-

re presumption qu'il y a quelque chose de vicieux en cette deuotion, n'estant nullement à presupposer que nous soyons plus aduisez ou plus deuotieux que ces Saints à qui l'on defere cét honneur, pour inuenter en matiere de pieté quelque nouveauté qui ne leur ait point esté cognüe. Il est vray que le Concile de Trente couche icy magnifiquement de la coustume de l'Eglise Catholique & Apostolique, & qu'il en rappelle l'origine de la plus lointaine antiquité. Mais apres quinze cens ans qu'il y a que les Apostres sont morts, les traces de ces traditions nous paroissent si confuses, & la iactance de ceux qui se vantent de les nous monstrier dans les escrits des anciens Historiens & des Peres, est ou si peu fondée en bons tesmoignages, ou mesmes contredite si fortement par ceux que nous alleguons, que nous ne voyons aucune apparence de raison de nous refoudre là dessus à vne chose de telle importance. En effet, i'estime que cecy nous doit iustifier deuant tout le monde. Il faut necessairement que l'inuocation qu'on adresse à ces benistes creatures qui sont au Ciel, soit vn seruice religieux qu'on leur rende comme à des mediateurs & in-

tercesseurs entre Dieu & nous , & vn honneur qui leur soit deu à cause de cette charge , ou que ce soit seulement vn effet de la communion des Saints , qui nous fait implorer l'assistance des prieres de nos amis dans les necessitez qui nous pressent. Si c'est le premier , il me semble qu'il n'y a personne qui entende que c'est de raison , qui n'aduouë que nous en auons beaucoup de nourrir de si fortes auersions pour ce culte : Car quant à honorer le Createur d'vn seruice religieux , c'est chose que nous deurions faire quand il ne le nous auroit pas commandé , pource que l'excel- lence & l'immensité de sa nature , l'estre qu'il nous a donné , la prouidence par laquelle il nous gouuerne , & les autres bien- faits que nous auons receus de luy , l'exi- gent de nous clairement. Mais honorer vne simple creature d'vn seruice reli- gieux , est chose que nos consciences ne peuuent gagner sur elles mesmes , sans vn commandement tres-exprés & tres- euident ; & quand elles verroient quelque chose de tel , il seroit bien malaisé que la qualité de leur objet ne les fist beaucoup hesiter auant qu'elles y condescendissent ; car le seruice religieux est comme l'amour

coniugal, ainſi que l'Ecriture enſeigne. Or tant ſ'en faut qu'une femme chaſte communique cet amour à autre qu'à ſon mary, ſans ſon conſentement bien expreſ, que meſmes quand il le luy ordonneroit, la nature de la choſe la porteroit à ſ'eſtimer diſpenſée de l'obeiſſance. Ioignez à cela que la charge de mediateur & d'interceſſeur eſt en l'Ecriture attribuée à Ieſus-Chriſt excluſiuement à tout autre. *Il y a, dit l'Apoſtre 1. Tim. 2. 5. vn ſeul Dieu & vn ſeul Mediateur entre Dieu & les hommes, à ſçauoir Ieſus-Chriſt.* Or ie veux qu'on allegue icy de ſubtiles diſtinctions de Mediateur d'interceſſion & de mediateur de redemption, & autres telles qu'il vous plaira, tant y a que cela ne nous oſte pas les ſcrupules de la conſcience. Les termes de l'Apoſtre, comme il eſt manifeſte, ſont diſerts; ces diſtinctions ſont de l'inuention de l'eſprit humain, & fondées ſur certaines ſuppoſitions dont nous ne voyons aucune trace en l'Ecriture. Je vous prie, en vne choſe dont nous n'auons point de commandement, dont nous ne voyons aucun exemple, où il y a tant d'apparence que la chaſteté de la conſcience, & la pureté de l'amour que nous deuons à Dieu eſt



violée, & où la gloire de la charge de nostre Mediateur est communiquée à autrui, où trouueray-ie de quoy suffisamment authoriser ces distinctions, pour me deliurer de l'apprehension que i'ay de blesser le seruice de mon Dieu, & le salut de mon ame? Dans les choses humaines, c'est vn precepte de prudence que nul ne transgresse à moins que d'estre quasi tenu pour insensé, de ne se porter iamais à faire chose quelconque sans nécessité, ou sans quelque vtilité souverainement considerable, quand il y a dans l'action quelque notable peril. Ou donc ie ne voy nulle nécessité d'inuoquer les Saints, car il n'y en a point de commandement, ou ie ne voy point d'euidente vtilité; car puis que le Fils unique de Dieu est mon intercesseur, ie me puis fort bien passer de l'intercession de tous les Saints & de tous les Anges, ou le danger est si manifeste de choquer l'honneur de mon Createur, & la gloire de mon Redempteur, ou finalement ie cours risque de la perte de mon salut; de quel chastiment ne feroit point digne ma temerité, ou quel supplice ne meriteroit point mon irreligion, si ie passois par dessus toutes ces considerations par inaduertance,

ou par complaisance ? Si l'on prend cette inuocation seulement comme vn effet de la communion des Saints, les scrupules que nous en auons ne sont pas moins considerables : Car premierement nous la voyons pratiquer en l'Eglise Romaine comme vn seruice religieux. On y prie les Saints tout de mesme que la Trinité : & comme l'air & la façon exterieure de le faire est toute semblable au seruice religieux que l'on presente à Iesus-Christ, aussi voyons nous que la deuotion & les mouuemens du cœur ne different aucunement de ceux qu'on espend en la presence du Redempteur, quand on s'adresse à sa personne : pource que l'inuocation est vne dependance de l'adoration, on n'y nie pas qu'on ne puisse & qu'on ne doie adorer les Saints & la Mere de Iesus-Christ, seulement on cherche quelques degrez d'adoration subalternes & quelque peu moins esleuez, pour ne les esgaler pas tout à fait au Sauueur du monde. On distingue entre l'adoration de *latrie*, & celle qui n'en est pas ; on subdiuise encore cette-cy, pour ne mettre pas les Saints & la Vierge bien-heureuse en mesme rang, en assignant à ceux-là la *dulie* tout simple-

ment, au lieu qu'on estime celle-cy digne de l'*hyperdulie*. Mais quoy qu'il en soit, latrie, *dulie*, *hyperdulie*, ce sont cultes religieux, qui different seulement de quelques degrez entr'eux; ce qui scandalise tout à fait nos consciences; car il nous semble que comme la difference des degrez au culte, induit bien necessairement la difference des degres en l'excellence de l'objet, de sorte que les perfections des Saints n'égalent pas celles de la Vierge, & que celles de la Vierge ne vont pas au pair de Iesus-Christ, ainsi la conformité en la nature du culte, induit pareillement la conformité de la nature de l'objet; de sorte que ce sont des Dieux & des Redempteurs à qui on adresse cette inuocation, mais d'une dignité inferieure à nostre Seigneur, & à la Diuinité eternelle de son Pere. On ne craint pas mesmes de dire qu'ils sont *Dieux & Redempteurs*, quoy que ce ne soit qu'en quelque façon & par participation, comme Bellarmin les appelle. Comment donc pourrions nous considerer cette inuocation comme vn simple effet de la communion des Saints, & comment y pourrions nous participer sans crainte de polluer nos consciences? Puis  
apres

apres en cette communion que les Saincts & fideles ont entr'eux , nous implorons bien l'assistance des prieres de ceux à qui nous pouuons parler, si nous nous rencontrons en mesme lieu avec eux. Si l'interualle des lieux qui nous separent, n'empesche pas le commerce & la communication , nous le pouuons faire par lettres. Mais quant à prier ceux qui sont si esloignez de nous, qu'ils ne peuuent ny entendre nostre voix , ny receuoir de nos lettres, ny estre informez par aucun autre moyen de nos inclinations & de nos necessitez , c'est ce que nous ne pensons pas qu'aucun des Catholiques pratique. Ceux donc qui inuoquent les Saincts, s'imaginent qu'ils sont entendus d'eux, & qu'ils cognoissent leurs necessitez & les mouuemens de leurs consciences. Or comment cela se peut-il sans leur attribuer ce qui ne conuient qu'à la seule diuinité, c'est à sçauoir vne cognoissance infinie? Je sçay bien encore qu'on allegue icy beaucoup de distinctiōs ingenieuses. Mais comme quand il est question d'yser d'une drogue bien dāgereuse, apres diuerses precautions, & diuerses preparations, le meilleur, & le plus salutaire est de n'en prendre

du tout point, pource que la moindre petite omission en tant de circonspectiōs, est capable de faire que vous vous empoisonnez, au lieu de prendre d'un bon remede: ainsi en vne action de cette sorte, apres toutes ces subtilitez, le plus seur & le plus expedient est de ne la faire du tout point, pource que si vous vous y trompez, l'erreur y est pernicieuse. En effet, surquoy pouuons nous fonder aucune certitude de cette persuation, que les Saints qui sont en Paradis nous entendent? Quel enseignement en auons nous en la Parole de Dieu, quel exemple dans les experiences des choses humaines? Quel raisonnement tiré ou de la nature ou de l'estenduë de leur felicité est capable de nous en rendre certains? Quels Anges enuoyez des Cieux nous en ont iamais rendu tesmoignage? Et si ie ne suis point assure d'estre escouté de celuy que i'appelle à mon secours, à quoy faire rempliray-je la terre & les Cieux des clameurs de mes litanies? Enfin, soit qu'on considere l'inuocation des Saints comme vn culte religieux, n'ayant point de commandement de la pratiquer, nous ne sçauons si c'est chose agreable à Dieu. Or Saint Paul dit que faire vne



action sans ſçauoir ſi elle eſt agreable à Dieu ou non, & pecher, c'eſt vne meſme choſe. Soit qu'on la conſidere ſeulement comme vn effet de la communion des Saints, n'ayant aucune certitude qu'ils entendent nos oraiſons, la ſageſſe ny la pieté ne nous permet pas de faire des actions de cette nature à la volée. Si ie m'eſtois propoſé de diſputer de la Religion, ie m'arreſterois dauantage à reſoudre tout ce que l'on met en auant ſur cette matiere, & monſtrerois que tout ce qu'on a accouſtumé d'alleguer pour donner couleur à cette partie du ſeruiſſe de l'Egliſe Romaine, eſt ſans ſolide fondement. Et ſi cét eſcrit eſtoit entrepris proprement & principalement à deſſein de conuertir à noſtre profeſſion ceux qui en ſont eſloignez, ie me mettrois en deuoir de prouuer bien fortement que c'eſt vne pratique qui ne s'accorde nullement avec le genie de la Religion Chreſtienne. Mais pource que ie n'ay deſſein ſinon de diminuer l'aueuſion que tant de gens ont contre nous, il me ſuffit de dire que là où deux choſes qui nous doiuent eſtre en ſi ſouueraine recommandation, la gloire de noſtre grand Dieu, & noſtre ſalut eternal, nous empeſ-

chent seules sans autre consideration d'approuver & de pratiquer ce culte en nostre Communion , nous meritions plustost loüange d'estre circonspects , & si l'on le veut ainsi, scrupuleux, par des motifs si importants , que non pas l'indignation de ceux à qui nostre creance est odieuse.

Le second point est celuy de l'adoration des images, sur lequel y a encore beaucoup plus de sujet de s'estonner que nostre creance & nostre pratique nous puisse attirer la haine de nos concitoyens ; car non seulement nous n'auons dans la Parole de Dieu, ny aucun precepte , ny aucun exemple de les venerer , mais nous auons & des commandemens tres-precis, & des exemples tres-autentiques qui le nous defendent. La defense en est tres-expresse en ces paroles du second commandement de la Loy. *Tu ne te feras aucune image taillée , ny ressemblance des choses qui sont là haut au Ciel , ny icy bas en la terre , tu ne te prosternerás point deuant elles , & ne les seruiras point.* Et en celle-cy du quatriesme Chapitre du Deuteronomie. *Vous prendrez bien garde sur vos ames , ( car vous n'avez veu ressemblance aucune au iour que nostre Dieu a parlé à vous*

en Oreb du milieu du feu : ) De peur que vous ne vous corrompiez , & ne vous fassiez quelque image taillée , ou ressemblance qui vous represente chose quelconque , qui soit effigie de masle ou de femelle , ou effigie d'aucune beste qui soit en la terre , ou effigie d'aucun oiseau ayant aïse qui vole par les Cieux. Et cela est repeté & dans le mesme Chapitre & en mille autres endroits. Les exemples en sont en ce que ç'a esté la constante & invariable pratique des Iuifs , de n'auoir aucune representation de chose viuante qui peust le moins du monde attirer leur deuotion , & en ce que les premiers Chrestiens y ont encore eu plus d'aersion qu'eux , & s'en sont gardez avec vne souueraine diligence. Il est bien certain que ceux qui ont introduit la coustume de mettre des images en l'Eglise , & de les y honorer , ont apporté tout ce qu'ils ont peu de subtilité , pour nous faire croire que Dieu ne nous l'a pas defendu. Tantost on y distingue entre *idole* & *image* , & representatiõ de choses qui *sont* , & de celles qui *ne sont point* Tantost on va chercher la forme des Cherubins dedans le Sanctuaire dessus l'Arche , & dās les courtines dont le Tabernacle estoit couuert. Tantost on dit que ce cõmande-

ment estoit ceremonial & legal , & que nous n'y sommes plus astreints sous l'E-uangile de Iesus Christ. Tantost on employe quelque autre artifice pour nous rendre la transgression de ce commandement moins scandaleuse & moins estrange. Mais on ne sçauroit tant faire pourtant , que cela nous deliure des pensées que cette sorte de deuotion iette dedans nos esprits ; car quelle apparence que les Chrestiens de maintenant entendent mieux ces commandemens que les Iuifs , à qui ils ont esté donnez par Moyse mesme , pour estre la regle de leur pieté , ny que les premiers Chrestiens qui auoient receu le Christianisme de la bouche des Saints Apostres ? Ou qui a donné le pouuoir aux Chrestiens de ces derniers temps d'interpreter les loix de Dieu, que les Iuifs & les premiers Chrestiens ont receuës & executées tout simplement , sans entreprendre de les glosier d'aucune exposition telle qu'est celle dont à cette heure on les enserue ? Et s'il se trouue que ces interpretations ne soient pas selon le sens du Legislatteur , qui nous garantira de la malediction que ces loix denoncent à ceux qui les violent ? J'ay desia dit que ie ne veux

nullement entrer icy dans la Controuer-  
se : mais cela n'empeschera pas que ie ne  
mette icy en auant les precautions sous  
lesquelles le Cardinal Bellarmin veut que  
les images soient venerées, afin de voir  
s'il y a raison de nous vouloir du mal,  
pource que nous n'y pouuons consentir. Il  
apporte donc premierement au second li-  
ure qu'il a escrit de cette matiere, trois di-  
stinctions qu'il estime prealables à la deci-  
sion de la question, & à la reconciliation  
des diuerfes opinions des Docteurs Ca-  
tholiques Romains; puis apres il met en  
auant quatre ou cinq propositions, dans  
lesquelles il comprend toutes les regles de  
la deuotion des Chrestiens en cet esgard.  
Il distingue entré les choses qui se peuent  
honorer *de par elles mesmes*, comme le Roy,  
& celles qui ne s'honorent sinon *par acci-  
dent* seulement; comme la pourpre dont  
il est vestu. Item, entre les choses qui se  
peuent honorer *à cause d'elles mesmes*,  
comme sont celles qui sont saintes & sa-  
crées de leur nature; & celles qui se pe-  
uent honorer *à cause de certaines autres*, com-  
me les signes des choses sacrées, à cause de  
la ressemblance qu'ils ont avec elles. En-  
fin, entre les choses qui se peuent hono-



rer *proprement*, comme quand on fait de l'honneur à vn mort, que l'on porte effectivement dans la pompe de ses funeraill-les: & celles qui se peuuent honorer *im-  
proprement*, comme quand on fait de l'hon-  
neur à vne image de cire qui represente le  
mort, dont le corps est en quelque lieu ail-  
leurs. Ces propositions sont: *Que les images  
de Christ & des Saincts doiuent estre véné-  
rées, non pas seulement par accident, ny im-  
proprement, mais de par elles mesmes, & pro-  
prement, tellement que la veneration qu'on leur  
rend se termine en elles, entant qu'elles sont  
considérées en elles mesmes, & non pas seule-  
ment entant qu'elles suppleent à l'absence de  
l'original qu'elles representent. En apres: Que  
pour ce qui regarde la facon de parler de cette  
matiere, notamment dans les predications qui  
se font au peuple, il ne faut pas dire qu'aucunes  
images doiuent estre adorées de l'adoration de la-  
trie, qui est celle qu'on doit à la diuinité,  
mais au contraire, il faut dire qu'il ne les faut  
pas ainsi adorer. Neantmoins il adjouste en  
troisiesme lieu; Que pour ce qui est de la cho-  
se mesme, on peut accorder que les images peu-  
uent estre honorées ou seruies *improprement* ou  
par accident, du mesme genre de culte dont l'o-  
riginal mesme doit estre honoré ou seruy. Ce*

qui est vne merueilleuse maniere de prescher, que non seulement on cele au peuple la verité, mais qu'on luy presche le contraire; car proprement ou improprement, par elles-mesmes ou par accident, tant y a qu'elles peuuent estre honorées du culte deub à la diuinité, si ce sont images de la Diuinité mesme. Ce donc qui se peut & qui se doit faire en leur esgard, pourquoy ne se doit-il pas dire? Ou pourquoy enseignera-t'on au peuple le contraire de ce qu'il faut qu'il pratique? Il dit de plus, afin que personne ne s'y trompe; *Que l'image ne doit pas estre adorée par elle mesme & proprement, du mesme culte duquel on honore l'original, & partant qu'il ne faut adorer aucune image par elle mesme & proprement, du culte que l'on nomme de latrie.* Finalement il conclud, *Que le culte qui par soy-mesme & proprement est deub aux images est vn certain culte imparfait, qui se rapporte analogiquement & reductiucment à la mesme espece du culte qui est deu à son original.* Qu'on me die vn peu icy au nom de Dieu, comment nous pourrions faire entendre au peuple toutes ces distinctions, de *par soy* & *par accident*, & *d'à cause de soy*, & *d'à cause d'une autre chose*, de *proprement* & *d'impro-*

ment, d'analogiquement & reductiuelement, & ce que luy est opposé, de direct & de propre, de culte parfait, & de culte imparfait, dont l'un est deub à l'original, & l'autre à la copie? Qu'on me die encore au nom de Nostre Seigneur, quand nous aurons desployé toute l'adressée de nos esprits à l'interpreter au peuple, & que Dieu luy aura donné plus de capacité que d'ordinaire il n'en a pour le comprendre, lors qu'il faudra effectiuelement se prosterner deuant les images, comment & luy & nous pourrons nous garder en nos esprits toutes ces distinctions, & comment pourrons-nous si bien partager les mouuemens de nostre deuotion, que nous ne soyons point sujets à nous y mesprendre? Car si par vn mesme acte de mon entendement i'honore l'image & son original, comment pourra estre mon adoration directe & reflexiue, propre & analogique par soy & par accident, propre & impropre, terminée en l'image & relative à l'original, de latrie & non de latrie tout ensemble? Et s'il faut que cela se fasse par diuers actes de mon esprit, qui se succedent les vns aux autres, comment pourray-je si bien en determiner les mouuemens, que quand i'adoreray l'image de

Iesus-Christ proprement & à cause d'elle-même, de cette sorte de culte qui luy conuient, ie ne fasse aucune reflexion sur son original, de peur de l'honorer d'un culte inferieur à sa dignité ? Puis quand ie l'adoreray par accident, improprement & reflexiuement à son original seulement, comment pourray je si bien faire que mon ame ne s'attache nullement à elle pourtant, de peur de luy rendre l'honneur qui ne conuient qu'à la Diuinité même ? Ou est l'homme viuant qui ait sçeu si bien mesurer les operations de son esprit, & notamment en vne chose si ardente & si vehemente que doit estre la deuotion, que de ne confondre point ces idées ? Cependant le moindre peché en cela est mortel, la moindre inconsideration qui s'y commet, est vn adultere de l'ame : mais pour n'entrer pas plus auant dans cette dispute, ie me contenteray icy d'une consideration, qui, ie m'asseure, nous exemptera de blâme enuers toutes personnes raisonnables. Ceux de la bonne volonté de qui nous auons le plus de besoin en diuerses occasions, sont les Iuges & les Magistrats, à qui est commise l'administration de la Iustice en ce qui nous regarde. Et la Loy, selon

laquelle ils nous doiuent iuger , sont les Edicts de nos Roys, & generalement toutes les constitutions qui ont esté faites en faueur de nos Eglises. Je voudrois donc qu'ils me supportassent en la hardiesse que ie prendrois de leur demander , en cas qu'ils y eust quelque article dedans les Edicts par lequel quelque chose nous fust aussi clairement defenduë, que l'vsage des Images en matiere de pieté est deffendu à tous les hommes par la Loy de Dieu, s'ils nous receuroient à excepter contre la defense par des distinctions & des interpretations semblables à celles qu'on apporte à ce commandement. Certes tout ce que nous pourrions attendre d'eux de plus moderé seroit, que ce n'est pas à nous à interpreter les Loix, mais à celuy qui les a faites, & que si on nous donne la liberté d'eluder par nos distinctions la volonté du Souuerain, nous auons assez d'inuention & de subtilité pour le faire : en vn mot, qu'il se faut tenir aux termes precis de la Loy, & la pratiquer exactement sans toutes ces chicaneries. Et là dessus on nous feroit incontinent des deffenses qui couperoient dans la racine toutes nos specula-



tions, & qui tireroient apres elles des chastimens bien rigoureux, si nous auions la hardiesse de rien entreprendre allencontre. Nous supplions donc ces Messieurs par la charité de Nostre Seigneur, qu'ils ne nous vueillent point de mal de ce que nous ne faisons point enuers Dieu, ce qu'ils ne pourroient souffrir que nous fissions enuers eux, & si nous redoutons encore plus la feuerité de ses iugemens, que nous ne faisons la leur en de telles occurrences. Comme tant s'en faut qu'ils nous blasmassent d'estre religieux obseruateurs de la Loy de nostre Prince, & timides à l'interpreter, qu'au contraire ils nous en loïeroient, & iugeroient nostre modestie digne de recommandation ; ils ne nous doiuent point sçauoir mauuais gré de ce que nous sommes scrupuleux en ce qui est de l'observation des loix du Souuerain iuge du monde ; car la Majesté des Roys qui est imprimée dans leurs loix, est à respecter tant & plus ; mais la Majesté du grand Dieu, dont il a mis l'emprainte en ses commandemens, l'est sans contredit beaucoup dauantage.

On pourroit icy douter si ie deurois mettre la doctrine du Purgatoire au nombre

des poinçts sur lesquels nous auons à faire nostre Apologie, pource que nous ne les croyons pas; car il est bien vray qu'elle est extrêmement éloignée de nostre croyance, & est vray encore qu'elle est peut estre vne de celles pour la rejection desquelles nous auons le plus encouru de haine à l'esgard de quelques-vns. Mais ce ne sont pourtant pas ny les peuples, ny les Magistrats, ny les Grands, qui nous veulent du mal à cette occasion; ce sont les Ecclesiastiques, & les Moines, & l'Euesque de Rome notamment, à qui le renuersement de ce dogme peut autant preiudicier, que son establissement leur a apporté d'accommodement & d'vtilité. Car c'est là dessus que sont basties tant de bonnes & riches fondations, c'est de là que germe la necessité de tant de Messes, c'est ce qui a donné credit aux Indulgences & aux Pardons, & sans cette opinion, le thresor des Satisfactions, dont le Pape garde la clef, seroit entierement inutile. Quant aux autres de cette communion, il y en a vne infinité qui ne croient du tout point de Purgatoire: & de ceux qui le croient, la plus-part le craignent plus qu'ils ne l'aiment; de sorte qu'ils ne doiuent point trouuer mau-

uais, que nous ayons cherché dans la Parole de Dieu le moyen de nous en affranchir. Neantmoins pource que les Ecclesiastiques & les Religieux ont vne grande puissance sur les esprits des autres ordres de cette communion, & que la haine qu'ils ont conceüe contre nous à cause de l'abolition du Purgatoire, les rend plus ardens & plus animez à allumer celle que les autres nous portent pour d'autres occasions, il vaut mieux en dire quelque chose en passant, à ce que nostre iustification en soit plus complete. Certainement s'il y auoit en l'Escripture seulement quelque ombre apparente d'enseignement qu'il nous faut attendre quelque telle sorte de tourment apres cette vie, il faudroit tascher de resoudre nos esprits à en receuoir la persuasion, bien qu'elle doie estre accompagnée de beaucoup de douleur & de chagrin. Car bon Dieu qu'est-ce que cela, qu'apres tant de miseres qu'on a souffertes en ce monde icy, & au milieu des angoisses de la mort qui a accoustumé d'estre si espouuantable, on nous vienne troubler l'imagination de l'apprehension d'un feu horriblement cuisant, dans les flammes duquel nos ames doiuent estre tourmentées durant ie ne

sçay combien de siècles ? Nous admirons la fermeté du courage des Martyrs, qui ont pû se refoudre à la souffrance du feu pour deux ou trois heures tout au plus, & quand nous les nous representons rostir sans se desesperer, l'idée seule de ce supplice d'un costé, & de leur constance de l'autre, comble tout ensemble nos esprits de tremeur & de merueille. Que doit-ce donc estre de ceux à qui on fait voir en mourant cét effroyable abisme ouuert, où le feu est incomparablement plus ardent que celuy que les Martyrs ont esprouué dessus leurs buschers, & auquel il n'y en a pas vn qui ne se doive presumer estre condamné pour tant d'années ? Mais puis que la Parole de Dieu n'en parle point, & qu'il n'y a Docteur en la terre qui en osast entreprendre la preuue par elle sans la Tradition, quel mal nous peut-on raisonnablement vouloir si nous nous sommes par la grace de Dieu deliurez de cette gesne ? Car pour ce qui est de la Tradition, i'ay desia dit ailleurs que c'est chose qui ne nous touche pas beaucoup, à cause de l'éloignement & de l'obscurité de ses sources, & de la contestation que nous voyons estre entre les sçauans touchant la pureté ou impureté de

de ses ruisseaux, chacun des partis preten-  
dant que la Tradition est pour luy. Joint  
qu'il y a beaucoup plus de raison de croire  
que le Purgatoire est vne inuention de  
l'esprit humain, & vne imitation des  
Payens, dans les escrits desquels les Do-  
cteurs de l'Eglise Romaine ne nient pas  
qu'il ne soit tout du long, comme dans  
Virgile & dans Platon, que non pas vne  
doctrin du Christianisme. La Religion  
Chrestienne estât en toutes ses autres par-  
ties destinée à la joye & à la consolation  
de nos esprits, & propre pour les asseurer  
contre la crainte de la mort, & de tout ce  
qui peut venir en suite, il n'y a du tout  
point d'apparence qu'en celle-cy elle se  
soit estudiée à remplir nos cœurs d'alar-  
me & d'espouuement. Je diray quel-  
que chose de plus. Quoy que la Parole de  
Dieu n'en enseignast rien disertement, &  
que la Tradition y fust encore plus dou-  
teuse, quoy que le reste de la Religion ne  
s'y accordast pas ouuertement, si nous  
voyions que l'abolissement du Purgatoi-  
re apportast quelque diminution à la gloi-  
re de Dieu, & de Nostre Sauueur, nous  
essayerions de faire en sorte que le zele  
que nous auons pour eux, l'emportast



pardeffus le defir que nous auons de nous procurer contentement & fatisfaction à nous-mefmes. Car fi l'on prend à gloire d'endurer quelque chose pour l'honneur des Princes Souuerains, il feroit beaucoup plus raisonnable que nous feruiffions à celuy de Nostre Sauueur, & que pour cela nous nous difpofaffions aux fouffrances les plus redoutables. Mais quoy ? Nous protestons en la fincerité de nos cœurs, qu'outre l'interest de nostre consolation & de nostre paix, c'est celuy principalement de la gloire de Nostre Seigneur, qui nous a fait entreprendre la destruction de cét edifice. Nous voyons que l'Efcriture le nomme *nostre Sauueur*, & ce doux & precieux Nom refonne perpetuellement en la bouche de son Eglise. Elle dit qu'il a fait la *purgation de tous nos pechez*, & n'excepte de cette expiation aucune de nos offenses. Elle proteste qu'il nous a deliurez de la *malediction*, & que *deformais il n'y a plus de condamnation* pour nous. Elle nous represente Nostre Seigneur introduisant le Larron *en Paradis* dès le iour mesme de sa mort, & nous promet qu'au *déloger de ce corps*, nous serons recueillis dans le *domicile celeste*. En vn mot elle esleue nos

esprits vers la bien-heureuse immortalité, & nous réjouit à la mort de l'esperance qu'elle nous en donne. De sorte que nous croirions trop preiudicier à l'honneur de ce Redempteur, & à l'efficace de sa Croix, si nous croyions que nous eussions encore à souffrir quelques tourmens, & à faire quelque satisfaction pour nos crimes. En effet en l'Eglise Romaine on exempte les Martyrs du Purgatoire par vn priuilege special. Si donc l'on pretend qu'ils en doiuent estre dispensés à cause de ce qu'ils ont enduré, pourquoy ne le ferons nous pas en vertu de la mort de Christ, laquelle nous est imputée? Est-elle moins digne de nous obtenir vne entiere exemption de toute la peine de nos pechez, que les souffrances des Martyrs? Ou l'imputation que Dieu nous en a fait afin de nous racheter par là, est-elle moins efficace à nous en deliurer, que si nous l'auions actuellement endurée? Mais pour n'aller pas plus auant en la dispute, il me semble que Messieurs les Magistrats se doiuent interesser avec nous en la deffense de cette verité; car ils condamneroient d'iniustice vn creancier qui se voudroit faire payer deux fois d'une mesme debte: & se con-

damneroient eux-mesmes d'inhumanité, s'ils punissoient deux fois vn mesme crime selon la seuerité des Loix. Or nos pechez sont comme debtes, Dieu comme le creancier, Iesus-Christ comme nostre caution. Nos pechez sont veritablement des crimes, Dieu le Iuge de l'vniuers, Iesus-Christ le pleige de tous les fideles. De sorte que leur pratique inuiolable en l'administration de la Iustice, & la creance qu'ils doiuent auoir que Dieu n'est pas moins iuste ny moins équitable qu'eux, les conuie à prendre nostre party dans la controuerse que nous auons avec les Moines & les autres Ecclesiastiques pour cette creance; car quant à la nouuelle inuention de quelques-vns, que les peines du Purgatoire ne sont pas tant satisfactoirs en elles mesmes, qu'applicatiues de la satisfaction de Iesus-Christ, c'est vne distinction que Messieurs les Magistrats ne doiuent iamais gouster. La raison en est, qu'ils ne souffriroient nullemēt que ny le payement, ny la peine qu'vn autre a fait, ou soufferte en qualité de pleige & de caution, fust appliquée au premier & vray debteur par vn autre second payement, ou par vn autre nouveau supplice. Assuré,

ment si la Iustice humaine receuoit les cautions en matiere de crime, elle ne souffriroit pas que si Meuius auoit esté pendu au bois pour le forfait de Titius, de sorte que par ce moyen il eust esté pleinement satisfait aux Loix, la satisfaction rendue par Meuius fust appliquée à Titius par la souffrance du foüet, ou par quelques années de galeres.

---

## SECTION V.

*Que pour ne croire pas ny la Transsubstantiation, ny le Sacrifice de la Messe, ceux de la Religion ne meritent point l'auersion de personne.*

**D**E cette grande multitude d'articles pour lesquels il y a tant de disputes entre les Chrestiens depuis six ou septvingts ans, ie n'en produiray plus que trois, pour n'estre pas long : la doctrine de la Transsubstantiation : celle du Sacrifice de la Messe, & celle de l'autorité de l'Euesque de Rome : à quoy i'adiousteray quelques considerations sur nostre separation de la communion. Car si ie puis mon-

strer, comme ie l'espere, qu'il n'y a nulle raison de nous haïr à l'occasion de ces trois ou quatre chefs, ie me fais fort de la reconciliation de nos plus grands aduersaires en tout le reste. Pour ce qui est de la Transsubstantiation, le plus grand, & peut-estre l'vnique sujet de la haine que nostre creance nous attire sur ce poinct, est que nous ne voulons pas rendre au Sacrement l'honneur que l'on pense luy estre deub comme au Seigneur Iesus-Christ Dieu & Homme tout ensemble. Nous ne l'accompagnons pas en procession, nous ne nous prosternons pas deuant luy quand nous le rencontrons, nous ne l'allons pas adorer dessus les Autels dans les Eglises, en vn mot nous ne le tenons nullement pour Dieu; ce qui offense merueilleusement ceux qui l'adorent. Veritablement si c'estoit faute d'affection enuers Nostre Seigneur qui nous portast à refuser au Sacrement l'honneur qu'on desire de nous, nous ne nions pas que nous ne meritions d'estre en horreur à tous les Chrestiens. Car quel honneur ne doit-on point à celuy qui est Dieu benit eternellement? Et de quel amour ne doit-on point reconnoistre la charité qui l'a induit à vouloir



mourir pour nous entant qu'il est Homme? Mais puis qu'on ne nous peut accuser de cela, & qu'au contraire c'est l'extreme respect & la deuotion ardente que nous auons pour Iesus-Christ, qui ne nous peut permettre de rendre ces honneurs à autre qu'à luy, il me semble qu'il est euident que c'est à tort qu'on nous haït pour ce sujet, iusques à ce qu'on nous ait monsté que c'est opiniastrété & obstination d'esprit qui nous empesche de croire que Nostre Seigneur soit par Transsubstantiation en l'Eucharistie. Ce que les Athées font en execration à tout le monde, c'est tres iustement, pource que Dieu ayant espan-  
du par tout au Ciel & en la Terre tant de preuues indubitables de sa Diuinité, & la façon mesme de laquelle les hommes sont composez, auec les facultez dont ils sont douëz, leur en fournissant des argumens irrefragables, ils ne peuuent reuoquer en doute vne verité si constante, & dont la nature mesme a mis tant de semences en nos esprits, sinon par vne obstination volontaire, & qui decouure manifestement la haine qu'ils ont contre Dieu. Car ils ne croient pas qu'il y ait vn Dieu, pource qu'ils ne le veulent pas croire, & ne

le veulent pas croire, pource qu'ils voudroient qu'il n'y en eust point. Ce que les Heretiques qui nient que Nostre Seigneur Iesus-Christ soit Dieu, sont en detestation à tous les Chrestiens, c'est tres-iustement encore. Pource qu'il y a dans la Parole de Dieu tant & de si éuidens tesmoignages de la Deïté de Iesus-Christ, que ceux qui font profession de receuoir cette parole, ne peuuent rejeter cette verité sinon par vne incredulité affectée, qui monstre ou vne tacite haine, ou vn mespris tout ouuert de la Majesté de ce grand Sauueur. Ce que les Iuifs ne le receurent pas autresfois pour le Messie que les Prophetes auoient promis, & que maintenant encore ils ne le recognoissent point pour leur Redempteur, c'est vn crime qui merite la vengeance qu'ils ont souffert de la main de Dieu, & l'indignation qu'ils esprouuent de la part des hommes. Ce bon & glorieux Seigneur a tousiours montré dans sa personne, & dans sa doctrine, & dans ses actions, & monstre tous les iours en la verité de son Euangile, en la conduite de son Eglise, & au gouvernement de l'vniuers, tant & de si expresse

marques qu'il est celuy dont les Saints oracles auoient parlé, qu'il ne peut auoir esté mecoügnu, & ne peut encore estre re-jetté, sinon par ceux qui sont aueuglez de quelque passion desesperée. Mais quant à nous, i'atteste icy la conscience de tous les hommes, si on nous peut accuser de quelque chose de tel sans vne trop grande iniustice. Pour faire que nostre Seigneur soit en l'Eucharistie de la façon qu'on le pretend, il est necessaire que Dieu y produise ie ne sçay combien de miracles si grands & si extraordinaires, qu'il n'en a iamais fait de semblables, ny par les Prophetes, ny par les Apostres, ny par la main mesme de son Fils: Car desia de conuertir du pain, qui est vne substance inanimée, en vn corps humain & viuant, & doüé d'une ame agissante & raisonnable, c'est à quoy tous les siècles precedens n'auoient rien veu de pareil. A la verité Dieu a formé le premier homme de la terre, & a donné à cette matiere des dispositions & des organes qu'elle ne pouuoit auoir que par vn miracle signalé. Mais il crea de rien l'ame qu'il y vouloit inspirer, & ne la tira pas de cette matiere terrestre. Icy il faut que le corps & l'ame de nostre Seigneur vien-

nent de la substance du pain, si, comme le Concile de Trente l'a définy, toute la substance du pain est conuertie en toute la substance du corps du Sauueur du monde. Apres cela, il faut que Dieu conuertisse cette substance en vne autre, laquelle existoit desia auant que cette conuersion se fist, à quoy il n'y a encore iamais rien eu de semblable: Car s'il a conuertiy la verge d'Aaron en serpent, ce serpent n'estoit point auparauant: & s'il a changé l'eau des nopces de Cana en vin, ce vin n'estoit point non plus auant cette transmutation. Au lieu que le corps de nostre Seigneur existe il y a desia plus de seize siecles. De plus, il faut qu'il fasse qu'un corps humain qui garde toutes ses dimensions, de long, de large, & de profond, ne tienne point de place pourtant, ce dont il n'y eut iamais aucun exemple: Car iusques à la Transubstantiation on auoit tousiours mis cette difference entre les esprits & les corps, qu'aux vns on ne donnoit point de certain espace pour occuper, pource que les substances spirituelles n'ont ny quantité ny parties: mais quant aux autres on leur auoit tousiours assigné vn certain lieu, dont ils remplissoient les espaces par l'e-



stenduë des parties desquels ils estoient composez. Outre cela, il est necessaire qu'il fasse qu'un seul & mesme corps, qui ne souffre point de diuision, soit en plusieurs & comme infinis lieux distans l'un de l'autre tout à la fois. Ce qui n'estoit iamais tombé en l'imagination des hommes: car on auoit tousiours creu que comme les lieux distans de quelque interualle, sont aussi differens en nombre, & se comptent par vn, & deux, & trois, selon la multitude qu'on s'en imagine, ainsi les corps qui sont en ces lieux differens, different en nombre aussi, & se compte de mesme que les lieux où ils se trouuent. Au lieu que si ce qu'on dit de cette Transsubstantiation est vray, on peut bien compter les lieux où est le corps de Iesus-Christ, mais non luy, pource qu'il demeure tousiours vn, en quelque multitude de lieux, qu'il se trouue en mesme moment. Il faut encore que Dieu fasse que les accidens d'une substance telle qu'est le pain & le vin, comme sont la figure, & la couleur, & la saueur, subsistent apres que la substance est abolie, sans auoir aucun fondement de leur existence, ny au corps de Christ, ny en aucun autre sujet. Ce qui ne s'est iamais veu



en aucune autre occasion : car on auoit tousiours creu que la couleur, & la figure, & le goust, dependoient tellement de la substance en ce qui est de leur existence, qu'ils ne pouuoient demeurer sinon dans vn certain sujet. Et ce qui n'est pas moins merueilleux, il faut pardeffus tout cela que Dieu fasse que les accidens d'une substance telle qu'est le corps de Iesus-Christ, existent & résident veritablement en leur sujet, sans neantmoins l'affecter en aucune sorte, de la façon de laquelle les accidens affectent naturellement la substance dans laquelle ils sont; car le corps de Christ y doit auoir vne couleur, qui neantmoins ne le rend ny coloré ny visible; il y doit auoir vne solidité, qui neantmoins ne le rend nullement palpable: il y doit auoir vne figure, qui neantmoins ne donne à ses membres aucune configuration : & ainsi de tous les autres accidens qui l'accompagnent. Or depuis le commencement du monde on n'auoit rien cognu de tel, & n'y auoit eu iusques à la Transsubstantiation substance aucune en l'Vniuers, que l'on ne qualifiast selon les accidens & les qualitez dont elle est enuironnée. Enfin, il faut que Dieu

fasse qu'un seul & mesme corps de nostre Seigneur, ait vne existence naturelle dans le Ciel, & vne autre Sacramentelle en la terre, un estat glorieux là haut, & un autre contemptible icy bas; & qu'il se voye, & qu'il se sente, & qu'il se croye assis en magnificence à la dextre de Dieu, & que neantmoins il se voye, & se sente, & se croye entre les mains d'un Prestre en mesme temps : ce dont aucun des siecles precedens n'a iamais fait l'experience; car iusques à la Transsubstantiation on auoit tousiours creu que chaque chose, qui n'est qu'une, n'a qu'une essence, ny qu'une existence par consequent; & que si elle a quelque connoissance & quelque sentiment de foy, elle ne peut pas iuger autrement d'elle mesme sans commettre des extrauagances. Iusques là que les Comiques en ont fait des risées autrefois, qu'on a encore depuis peu portées dessus le theatre en nostre langue. Or n'auons nous que trois voyes de nous persuader la verité des choses, soit naturelles ou miraculeuses : c'est à sçauoir les Sens, la Raison, & la Foy. Les Sens sont pour discerner les choses sensibles, comme les

couleurs, & les figures, & les sons, & les odeurs, & les saveurs, & toutes les qualitez qui tombent sous l'attouchement. La Raison est pour cognoistre les choses intellectuelles desquelles nous sommes naturellement capables, pour les comparer les vnes aux autres selon les rapports & les proportions qu'elles ont entr'elles, & voir comment elles s'ajustent, & comment elles se contrarient, pour les affirmer ou les nier, prononcer cela est vray ou cela est faux, selon que nous en apperceuons ou l'accord ou la repugnance. La Foy est pour acquiescer à l'autorité diuine dans les choses qui surpassent ou la comprehension, ou au moins certes l'inuention de nostre intelligence, & qu'à cette occasion Dieu nous a voulu reueler. Voyons donc si l'on nous peut accuser au sujet dont il s'agit de n'vser pas comme il faut de quelqu'un de ces principes de nos cognoissances. Pour ce qui est des sens, tous les nostres nous persuadent le contraire de ce qu'on nous dit de la Transsubstantiation. Nous ny voyons, ny entendons, ny flairons, ny goustons, ny touchons rien qui ne nous atteste que c'est du pain & du vin, & non le corps & le sang du Sauueur du monde.

Les sens de ceux qui croient la Transsubstantiation en iugent de mesmes que les noistres, & depuis l'institution de la premiere Cene du Seigneur iusqu'à maintenant, il en a tousiours esté ainli, & en sera tousiours ainli iusqu'à la consommation des siecles. Je ne sçay si on appelle opiniaistres ou insensez ceux qui ne se laissent pas persuader à l'experience qu'ils font de la nature des choses par le moyen de leurs sens. Aristote disoit qu'à ceux qui ne croient pas que le feu soit chaud, il ne faut que le leur faire toucher; si apres cela ils persistent encore en leur opinion, il n'importe pas beaucoup comment on les nomme. Mais tant y a que quant à nous on ne nous peut pas accuser ny de cette folie, ny de cette obstination, de resister determinément à la deposition de nos sens, puis que nous iugeons des choses conformément à la realité des qualitez qu'ils nous en representent; car nul ne nie que ce ne soient là veritablement les accidens du pain & du vin, comme nos yeux & nostre goust, & nos autres sens nous en attestent. Pour ce qui est de la raison, c'est vne faculté superieure aux sens à la verité, & qui est destinée à nous raddresser de leurs erreurs

quand il leur arriue d'en commettre. Ain-  
si, encore que nos yeux iugent qu'il y a de  
veritables couleurs en l'arc-en-Ciel, ou  
qu'un baston que nous auons mis droit en  
l'eau, y deuient vn peu courbé, ou qu'une  
longue allée se fait plus estroite à mesure  
qu'elle s'esloigne de nous, nostre raison  
nous fait croire le contraire pourtant, &  
nous persuade que cela vient des diuerfes  
reflexions & positions de la lumiere, de la  
diuersité des deux moyens qui nous rap-  
portent la representation de l'objet, & de  
ce que les rayons que l'on appelle visuels  
font en nos yeux les angles de leur ren-  
contre plus où moins aigus, à proportion  
de la distance de l'objet où ils se portent.  
Et on appelle opiniaftres & obstinez ceux  
qui s'attachent tellement à ce faux iuge-  
ment des sens, qu'ils ne veulent pas defe-  
rer à vne raison claire & euidente. Il est  
vray que pource que de son costé la rai-  
son n'est pas infailible, & qu'assez souuent  
il luy arriue de se tromper, on redresse  
aussies manquemens par le tesmoignage  
des sens. Comme quand vn Philosophe  
s'estant autrefois imaginé par ie ne sçay  
quelle bizarre speculation de sa raison,  
qu'il n'y auoit point de mouuement, quel-  
qu'un



qu'un se leua deuant luy, & se mit à se promener en sa presence. Et c'est encore ainsi que les Peripateticiens disputent en beaucoup de choses contre les Sceptiques, en leur faisant voir à l'œil & toucher à la main la certitude des choses dont ils pensent pouuoir douter par le discours de la raison. Ainsi ces deux facultez s'entr'aident l'une à l'autre, & s'instruisent mutuellement. Tellement que comme ceux là sont tenus pour des acariastres, qui sans vouloir escouter aucune raison, deferent absolument tout à leurs sens; ainsi tient-on pour des aheurtez ceux qui sur quelque vaine imagination de raison reiettent l'attestation des sens dans les choses les plus euidentes. Mais quoy qu'il en soit, on ne nous peut icy imputer ny l'un ny l'autre; car puis que nos sens ne se trompent point en ce qui est de la Transsubstantiation, & que veritablement ils nous rapportent les qualitez des choses telles qu'elles sont, nous n'auons pas besoin que la raison vienne à leur secours pour corriger leurs manquemens, & nous ne deferons à leur tesmoignage sinon comme il faut, en croyant que ce sont les qualitez du pain & du vin, & non les accidens d'une autre

substance. Et quand il y auroit quelque chose à corriger au iugement que nos sens en font , nous ne pouuons estre accusez d'opiniaftreté, comme si nous n'vions pas assez de nostre raison pour le faire ; car nous n'vions de nostre raison sinon sur les sujets qui luy sont proportionnez , & ne soumettons point à son examen les choses qui sont au dessus d'elle. Or n'y a-t'il comme ie croy personne en la communion de Rome, qui voulust dire que les mysteres & les miracles de la Transsubstantiation fussent proportionnez à nostre raison , ny qui consentist qu'il nous fust permis de croire ce qu'elle nous en dicte. Au contraire , on nous blasme de ce qu'en ces mysteres nous voulons trop escouter la voix de la raison , & de ce que nous ne deferons pas assez à vne autorité supérieure. Pour ce qui est de l'autorité, nous en parlerons tantost : mais tant y a que ce seroit vne chose bien estrange que ceux qui ne donnent icy durtout rien ny au sens ny à la raison , nous accusassent d'estre opiniaftres & arrestez à nos imaginations, en ce que nous taschons d'examiner les choses par la voye des sens & de la raison, puis que d'ordinaire on nomme de ce

nom ceux qui ne les veulent pas entendre. Au fonds, nous faisons tout ce que nous pouuons pour comprẽdre comment vne chose qui est, peut estre conuertie en vne autre qui est aussi, sans que celle-cy soit premierement abolie, ny qu'elle acquiere vn nouuel estre, & nous n'y pouuons reũssir. Nous faisons tout l'effort dont nos entendemens sont capables, pour entendre comment vn corps humain peut estre d'une iuste & naturelle grandeur, & que neantmoins il ne soit point besoin d'espace pour le contenir, & nous n'en pouuons trouuer le moyen. Nous partageons tant qu'il nous est possible les pensẽes de nos esprits pour conceuoir qu'un corps soit en diuers lieux separez, & que neantmoins ce ne soit qu'un mẽme corps, & nous n'en pouuons venir à bout. Nous faisons en nostre pensẽe toutes les abstractions imaginables pour separer les accidens d'avec leur substance, & pour leur donner quelque subsistance à part, & nous ne pouuons si bien faire qu'ils ne se dissipent. En vn mot, nous taschons d'ajuster nostre intelligence à toutes ces merueilles là, & tousiours nostre raison y fait vne inuincible resistance. Nous faisons

encore dauantage, afin d'esloigner d'autant plus de nous tout soupçon d'obstination. Nous cherchons dedans les escrits des Docteurs de l'Eglise Romaine quelques aides à nostre conception, & nous y trouuons à la verité force subtilitez, force distinctions, force speculations Scholastiques, par lesquelles ils essayent de diminuer l'étrangeté que nostre raison trouue là dedans : Mais plus nous nous y alambiquons l'esprit, & moins nous y trouuons de satisfaction : plus nous nous efforçons de les saisir, & plus eschappent-elles à nostre comprehension, & s'éuanoüissent en fumée. Nous accuserions volontiers la tardiueté de nos esprits; dont le mouuement ne seroit pas assez agile pour attraper des choses si minces, & qui ont si peu de solidité, sinon que nous trouuons que nous sommes faits comme les autres, & qu'en toutes autres matieres nous ne voyons pas que ces Messieurs aillent plus auant que nous, & que depuis plus de cent ans qu'il y a eu de toutes sortes de gens parmy nous, & plusieurs doüiez d'un tres-excellent entendement, & tres-exercité en toutes choses, quelqu'un sans doute les eust entendues si elles eussent esté intelli-

gibles. Ce qui nous fait croire que ceux mesmes qui les proposent, le font, comme disoit l'Archeuesque de Cologne au Concile de Trente, *non intendendo la materia, mà per consuetudine & habito di Scola*. Assèurément, s'ils en vouloient dire la verité, ils aduouëroient que ce n'est qu'une routine d'Escole, en laquelle leur memoire agit, & leur imagination court apres certains petits fantosmes, où quand la raison fait veritablement son office, elle ne trouue pas mesme la moindre ombre d'un vray corps. N'y eust-il que cette proposition là, qu'un seul & mesme homme peut s'acheminer à l'Orient & à l'Occident en mesme moment, & venir enfin en tournant par diuers chemins au deuant de luy-mesme, & se trouuer luy-mesme front à front, & s'il continuë d'aller, se penetrer par toutes les parties de son corps, & auoir, comme Ianus, des visages à double rencontre, puis en continuant son chemin se separer de soy-mesme encore, & s'il luy prend enuie d'aller au Septentrion & au Midy en mesme temps, ne sentir au Midy la chaleur du Soleil sinon à proportion de ce que la froideur du Septentrion luy fera de la resistance, il y en auroit



affés pour nous faire croire qu'ils s'egayēt, & qu'ils nous debitent ces gentilleſſes comme on fait la Metamorphoſe d'Ouide aux petits enfans. A cela donc que ferions nous? Car puis que noſtre conſcience nous rend teſmoignage que ce n'eſt pas opiniaſtreté qui nous empêche d'accommoder noſtre raiſon à tout cela pour en recevoir la perſuaſion, quel ſujet de mauvaïſe volonté peut-on auoir contre nous ſi nous ne nous y pouuons reſoudre? Reſte donc maintenant la Foy, qui a pour objet la reuelation de la Parole de Dieu, dans laquelle ſi nous ſçauions certainement que ce myſtere euſt eſté reuelé comme on le pretend, alors certes nous trouuerions nous bien enſerrez entre nos ſens & noſtre raiſon d'un coſté, & la reuelation de Dieu de l'autre; car il eſt bien vray que ſon autorité eſt abſolument ſouueraine, & que c'eſt crime que d'y reſiſter. Mais neantmoins pource qu'en toutes les autres parties de la Religion, il ſe fert du miniſtere de nos ſens pour nous inſtruire, & que meſmes il n'y reietté nullement l'entremiſe de noſtre raiſon, il y auroit beaucoup de ſujet de ſ'eſtonner qu'il en ruinaſt entierement les fon-

ctions & les operations en cette matiere. Enfin pourtant nous recognoissons qu'il faudroit que l'un & l'autre cedast à la Foy, si le tesmoignage de la reuelation estoit entierement irrefragable. Or est-il vray que nostre Seigneur a dit, *Cecy est mon corps*; & nul des Chrestiens ne le conteste. Mais aussi nul ne sçauroit-il nier que cette parole ne puisse auoir deux sens; l'un propre, côme l'Eglise Romaine la prend; l'autre metaphorique & figuré, comme les Reformez l'entendent; car qui peut douter que comme ces mots, *la Pierre estoit Christ*. 1. Cor. 10. ont cette intelligence en Sainct Paul, *la Pierre estoit la figure de Iesus-Christ*, ceux-cy, *le pain est le corps de Christ*, ne puissent auoir celle-cy pareillement, *le pain est la representation*, où comme dit S. Augustin, *la figure du corps de Christ*, & qu'ils ne presentent ainsi à l'intellect vne idée fort raisonnable? De fait Bellarmin disputant contre toutes les autres interpretations qu'on apporte à ces paroles de nostre Seigneur, dit nettement qu'il n'y a que celle de l'Eglise Romaine ou la nostre qui leur puissent conuenir, & ne conteste nullement que si on n'a esgard sinon à la forme de s'enoncer, cette propo-

sition, le pain est le corps de Christ, ne puisse receuoir vne exposition metaphorique. On ne peut donc nous accuser d'obstination contre cette reuelation, iusques à ce qu'on nous ait clairement iustificié lequel des deux il faut embrasser à l'exclusion de l'autre: Car nous voyons que de tous les miracles que Dieu a faits, aucun n'a iamais dementy le tesmoignage des sens. Au contraire, il a necessairement fallu qu'ils ayent tres-viuement & tres-certainement conuaincu les sens pour se faire croire miracles. Il ya plus. Iamais Dieu n'a fait aucun miracle qui ait choqué la raison: Car il est bien vray que tous les miracles ont quelque chose au dessus de la raison, en ce que la raison estant la faculté qui est destinée à comprendre les proportions naturelles qui sont entre les choses, & particulieremēt entre les causes & leurs effets, comme entre la chaleur du feu & l'action de brusler, nous voyons que certains tels effets se produisent sans telles causes, & ne voyons point de telles naturelles proportions entr'eux, & la cause qui les produit, qui est l'operation de la Diuinité; car cette puissance de Dieu n'est point déterminée à certaine sorte d'effets par

aucune qualité, cōme le feu l'est à brusler par sa chaleur, & le Soleil à esclairer par sa lumiere. Elle est au dessus de cette determination, & contient tellement en soy par eminence toutes sortes de facultez & de vertus, que neantmoins quand elle se desploye en quelque operation, nous n'en conceuons en façon du monde la maniere. Mais tant y a que si vous mettez à part la consideration de la cause qui produit les miracles, & que vous les consideriez en eux-mesmes quand vne fois ils ont esté faits, il ne s'en est iamais fait aucun dont la constitution ne se soit parfaitement bien accordée avec la raison. L'eau qui fut conuertie en vin, auoit apres sa transmutation vne certaine quantité qui remplissoit certains vaisseaux; elle estoit en vn certain lieu déterminé, & n'estoit nullement en l'autre; elle auoit le goust & la force du vin, & verifioit sa transmutation par là, elle auoit perdu les accidens de l'eau, & ils n'y subsistoient plus sans substance: bref, la raison admiroit bien la cause de ce miraculeux euenemēt, mais en l'euenement mesme il n'y auoit rien d'extrauagant, ny hors des termes de la constitutiō du vin, telle qu'elle doit estre

par les loix de la nature. Au lieu qu'en la Transsubstantiation ce n'est pas tant la vertu à laquelle on attribue l'effect, qui donne de l'admiration, que l'estre mesme de la chose produite, qui choque toutes les reigles de la raison & de l'intelligence. Ioignez à cela que Nostre Seigneur semble auoir pris plaisir à ces façons de parler, tant il s'en sert ordinairement. Il dit qu'*il est la porte*, qu'*il est le chemin*, qu'*il est le sep*, que son pere *est le vigneron*; & le Vieil & le Nouveau Testament n'ont rien de plus frequent que cette locution, par tout où il s'agit de choses qui sont destinées à la representation des autres. Les sept vaches *sont sept années*, & les sept espics pareillement: les sept chandeliers d'or *sont sept Eglises*, & les sept estoiles *sont sept Anges*: & ces façons de s'exprimer sont vsitées en toutes langues. La Carte de la France *est la France*, au langage de tout le monde, & l'image du Roy *est le Roy*; le Crucifix *est Iesus-Christ*, & quand il nous arriue de parler ainsi, nul ne se figure des miracles. Peut-on donc accuser d'opiniastreté ceux qui aiment mieux embrasser vne interpretation facile, vsitée en toutes nations, familiere & commune dans les



propos de Nostre Seigneur, & qui n'a rien de contraire aux sens, ny de repugnant à la raison, qu'une qui ne peut subsister si Dieu ne renuerse la nature des choses tout à fait, s'il ne démonte tout ce qu'il y a de certitude au iugement de la raison, & s'il ne met en trouble & en erreur tout ce qu'il y a de plus assuré dans les fonctions de nos sens pour la cognoissance des choses? Mais quoy? Il ne faut que rapporter icy les paroles du Cardinal Cajetan, personnage de grande reputation en sa communion, pour nous absoudre pleinement d'estre obstinez en cette matiere. *C'est une chose qu'il faut sçavoir*, dit-il en escriuât sur la Somme de Thomas, *que de l'autorité de l'Escripture Sainte touchant l'existence du Corps de Christ au Sacrement, on n'a autre chose d'exprès sinon la parole du Sauueur disant, Ceci est mon Corps; car il faut que ces paroles soient vrayes. Et d'autant que les paroles de l'Escripture Sainte s'exposent en deux façons; c'est à sçavoir, ou proprement ou metaphoriquement, le premier erreur sur ce sujet a esté de ceux qui interpretent ces paroles de Nostre Seigneur metaphoriquement, lequel erreur le Maistre des Sentences traite en la distinction 10. liu. 4. qui aussi est re-jetté en cét article de Thomas: & la force de*

la raison pourquoy on le rejette consiste en ce que les paroles de Nostre Seigneur sont par l'Eglise entendues proprement, & partant il faut qu'elles soient verifiées proprement. Or ie dy par l'Eglise, pource qu'il ne paroist rien en l'Evangile qui force à entendre ces paroles proprement: car par ces mots que le Seigneur a adioustez, *Qui est donné pour vous en remission des pechez*, on ne peut pas conclure euidentement que les paroles precedentes doiuent estre entendues proprement; car cette parole, qui, n'est pas employée pour monstrier la conionction de l'attribut avec le sujet, mais pour monstrier l'attribut, c'est à dire, mon corps, ce qui n'empesche pas que la proposition precedente ne se trouue vraye, est ant prise en un sens metaphorique seulement. Comme là où l'Apostre dit, *Or la pierre estoit Christ, quand il eust adiousté, Qui a esté crucifié pour nous, qui est resuscité pour nous, qui est monté au Ciel, en disant, Or la pierre estoit Christ, qui a esté crucifié pour nous, &c.* cette proposition precedente, *Or la pierre estoit Christ*, ne laisseroit pas de s'entendre metaphoriquement & non proprement: & semblablement en ce qui se propose & dont il s'agist, en ces paroles de Nostre Seigneur, *Cecy est mon Corps, qui sera liuré pour vous, de cette addition, qui sera liuré pour vous, la*

premiere proposition n'est pas restreinte à un sens propre, mais ne laisseroit pas d'estre vraye quand mesme elle seroit prise en un sens metaphorique seulement. Et c'estoit l'opinion de quelques Theologiẽs au Concile de Trente, qu'il ne falloit pas fonder la doctrine de la Transsubstantiation dessus ce passage, comme s'il estoit inéuitablement necessaire de l'interpreter ainsi, mais sur la tradition de l'Eglise en vertu & par l'autorité de laquelle elle l'a ainsi entendu. Pourquoi donc nous accuseroit-on d'opiniastreté, en ce que nous ne pouuons gagner sur nous d'entendre ces paroles en ce sens, veu que par l'adueu mesme de quelques Theologiens celebres en la communion de Rome & de quelques Cardinaux, elles se peuuent prendre en vn qui n'est pas moins clair ny moins certain, & qui s'accorde mieux avec la raison en toutes manieres ? Car quant à ce qui est de l'autorité de la Tradition, nous auons vne infinité de preuues en l'Antiquité, que plusieurs siecles depuis la naissance du Christianisme, l'Eglise n'a rien crû de tel. Quand les preuues en seroient moins euidentés qu'elles ne sont, il y en a assez pourtant pour rendre, notamment en ce point, la

Tradition douteuse. Quand elle seroit moins douteuse, nous voyons vne si grande difference entre la probabilité qu'il y a que les hommes se soient trompez, & que Dieu fasse tant & de si prodigieux miracles tous les iours, que nous ne pouuons comprendre comment on nous pourroit condamner, si nous ne croyons pas si tost des choses de cette nature, dont il n'y a aucun exemple dans tous les siecles precedens, que nous croyons que les hommes se sont abusez, veu que nous auons tant d'experiences de leur inclination à l'erreur en tous temps & en toutes choses. Neantmoins s'il n'estoit question que de la vie ciuile, ou d'une loy politique seulement, peut estre que le desir & l'interest que nous auons de nous reconcilier la bien-veillance de nos superieurs & de nos compatriotes, nous porteroit à quelque condescendance. Non que nous peussions obtenir de nous-mesmes de croire la Transsubstantiation; car nous ne sommes ny les maistres de nos sens, qui nous rapportent les choses telles qu'elles sont, & non telles que peut-estre les voudrions nous bien estre: ny les dominateurs de nostre raison, pour luy commander de croire

ce qu'elle void contredit par des preuues aussi éuidentes que des demonstrations ; ny les Autheurs de nostre foy , pour luy faire embrasser d'autres objets que ceux qu'elle void & qu'elle cognoist certainement estre de reuelation diuine. Mais au moins ferions-nous peut-estre quelque espece de semblant que nous n'y auons point d'aersion, & dissimulerions tant que nous pourrions le mescontentement de nostre raison , pour nous accommoder en vne mesme communion avec ceux qui font profession de croire toutes ces merueilles. Il y a quelquesfois certaines opinions populaires auxquelles les sages ne s'opposent pas ouuertement , quoy qu'ils les reprouuent en l'interieur, pource qu'il est ou inutile , ou mesme assez souuent dangereux de nager contre lestorrents , & que c'est mal vïer de la raison , que de l'exposer à estre foulée aux pieds par ceux qui sont aueuglez de leurs preiugez, ou à qui la nature n'a pas donné assez de capacité pour l'entendre. Si mesmes il n'estoit question que d'un erreur qui ne fust pas de grande consequence en la Religion, & particulièrement qui n'apportast aucune alteration au culte de la Diuinité , peut-estre y con-



niuerions nous encore, & que l'amour de la Paix l'emporteroit par dessus celuy de la Verité, au moins pour ne pas rompre la communion, & pour laisser dans leurs sentimens ceux qui nous laisseroient dans les nostres; car il faut supporter beaucoup de choses en autrui, quand de sa part il ne vous astreint à rien qui choque l'honneur de Dieu, & la paix de la conscience. Mais il y va du seruice de Nostre Seigneur, qu'il nous est absolument impossible de deferer au Sacrement, tel qu'on le desire de nous, tandis que nous ne sommes pas persuadez de la Transsubstantiation, sans que nostre conscience nous conuainque d'une idolatrie inexcusable. Et il y va du salut eternel & de nos corps & de nos esprits, dont nous croirions qu'une telle action commise contre nostre conscience nous priueroit iustement, pour estre precipitez dans une perdition entierement irremediable. Partant nous supplions tout le monde de considerer avec quelle équité on peut desirer de nous une si pernicieuse & si criminelle complaisance. Nous estimons qu'en la communion de Rome il y a un peril manifeste pour le salut, à cause qu'on y adore du culte de la Diuinité ce qui n'est pas Dieu.

Dieu. On s'excuse sur ce qu'on croit qu'on n'y adore rien de cette espece de culte, qui ne soit Dieu veritablement. Et si on ne le croyoit ainsi, on proteste qu'on n'y adorerait pas le Sacrement. Cette excuse ne peut estre bonne, sinon que les preuues sur lesquelles on fonde cette creance, soient si certaines & si euidentes, qu'il n'y ait pas moyen d'y resister. C'est donc à ceux qui ont receu cette persuasion, que l'Hostie est vrayement Dieu, à les bien examiner, afin de ne se pas tromper en vne chose de telle importance. Ceux de la communion de Rome nous croient perdus sans ressource, pource que nous n'adorons pas le Seigneur Iesus au Sacrement. Nous nous excusons sur ce que nous ne croyons pas qu'il y soit, & protestons que si nous en auions vne autre opinion, nous ne manquions nullement de luy rendre toute sorte de veneration, selon sa dignité incomprehensible. C'est à nous à nous bien examiner, à ce que ne soit ny passion ny opiniastreté qui nous empesche de voir la verité des preuues qu'on nous allegue. Et ie m'asseure que ce que ie viens de représenter nous garantit assez de cette imputation. Comme donc ce seroit

iniustice à nous si nous voulions obliger les Catholiques à n'adorer pas le Sacrement, que premierement nous ne leur eussions montré par des preuues indubitables qu'il n'est pas Dieu, puis que nous sommes ainsi disposez que si nous croyions qu'il fust Dieu, nous l'adorerions sans doute: ce ne peut estre iustice à eux de nous vouloir obliger à adorer le Sacrement, iusques à ce qu'ils nous ayent persuadé qu'il est Dieu, puis que telle est la disposition de leurs esprits, qu'ils ne l'adoreroient iamais s'ils n'auoient de luy cette creance.

Le Sacrifice de la Messe est vne doctrine que nous ne pouuons receuoir, principalement pour deux raisons. L'vne, qu'elle presuppose la Transsubstantiation, laquelle nous ne croyons pas. L'autre, que nous tenons ce sacrifice non seulement pour inutile, car ce seroit peu de chose s'il n'y auoit rien de plus; mais encore pour iniurieux à l'honneur du sacrifice de la Croix du Sauueur du monde. Et quant à la premiere de ces raisons, puis que nous ne pouuons croire la Transsubstantiation, & qu'il n'y a nulle pertinente raison de nous blasmer à cette cause, il vient necessairement en consequence que la rejection du sacrifice

soit à nostre esgard exempte de blasme ; car puis que de l'adueu de nos aduersaires il ne peut estre de sacrifice de la Messe sans Transsubstantiation , & puis que , comme ie viens de monstrier , il n'y a point d'opiniastreté à ne croire point la Transsubstantiation , ny de sujet de mauuaise volonté de la part des gens raisonnables , il n'y en peut auoir non plus à ne croire point le Sacrifice qui a ce dogme pour fondement. Quant à la seconde , afin qu'on n'ait pas cette opinion de nous que nous soyons mal-aisez à contenter , & que nous cherchions de gayeté de cœur matiere de diuision & rupture , apres qu'on nous aura monstrier qu'il faut necessairement receuoir la doctrine de la Transsubstantiation : car c'est vne prealable ineuitable , nous nous satisferons volontiers si on nous respond suffisamment à cette difficulté sur le Sacrifice : car bien qu'il y ait vne infinité d'autres preuues de nostre doctrine en cette matiere , & que l'Épistre aux Hebrieux y fourmille de passages euidens , la solution de cette ratiocination suffira pour mettre à couuert l'interest de la Croix du Sauueur du monde. Ou bien le Sacrifice fait en la Croix nous a pleinement racheptez de

nos pechez, ou non. Si nous en a rachep-  
tez, c'est chose inutile de tascher de faire  
vne chose desia faite; & iniurieuse à celuy  
qui l'a entreprise, comme si elle ne l'estoit  
pas. Si il ne nous en a pas racheptez, c'est  
ou pource qu'il ne l'a pas pû, ou pource  
que Christ ne l'a pas voulu. Si il ne l'a pas  
pû, comment l'expiation qui n'a pû se  
faire en la Croix, se pourra-t'elle para-  
cheuer en l'Eucharistie: Et quelle assen-  
surance auons nous de nostre redemption,  
si la mort de Nostre Seigneur n'a pû satis-  
faire pleinement à la iustice de Dieu son  
Pere? Si il l'a pû & qu'il ne l'ait pas voulu,  
qui assenurera que ce qu'il n'a pas voulu fai-  
re en la Croix, il le vueille faire en la sainte  
Cene? La celebration de ce Sacrement  
porte-t'elle plus de marques de la bonne  
volonté qu'il a pour nostre redemption,  
que la souffrance d'une Croix maudite &  
ignominieuse? Il est vray qu'on distingue  
encore icy entre sacrifice de redemption  
& sacrifice d'application & de represen-  
tation. Mais cela ne satisfait pas à nostre  
demande; car ou bien ces representations  
& ces applications sont vne effectiue &  
actuelle propitiation de nos pechez, en sa-  
tisfaisant à la Iustice de Dieu, ou non. Si



on pretend qu'elles en font , il faut retourner à respondre à la raison precedente , & foudre cette difficulté, si Christ nous a rachetez , ou ne nous a pas rachetez en la Croix. Si on ne le pretend pas , pourquoy ceux qui distinguent aussi nous veulent-ils persuader ce qu'ils ne se persuadent pas eux-mesmes ? Et puis qu'ils ne croient pas qu'en la Messe il se fasse aucune réelle expiation, quel sujet d'indignation peuvent-ils auoir contre nous si nous n'y pouuons non plus consentir ? Qu'ils nous souffrent donc s'il leur plaist mettre toute nostre esperance en la Croix de Nostre Sauueur, & ne recognoistre autre oblation propitiatoire de nos pechez , sinon celle qu'il y a offerte. Qu'ils ne nous vueillent point de mal si nous ne pouuons digerer qu'on adjoûte à la plenitude de sa satisfaction, comme si la redemption que nous auons en elle estoit imparfaite. Qu'on ne nous impute point comme vn deffaut de pieté , que nous ne donnons point de compagnons à Nostre Seigneur Iesus en sa charge de Sacrificateur. Qu'on ne nous tourne point à crime cette respectueuse timidité qui nous empesche de nous ingerer à faire des oblations auxquelles nous ne voyons

point que la vocation de Dieu nous appelle. Bref, qu'on ne trouue ny estrange, ny mauuais si ayant deuant nos yeux de si memorables exemples de la vengeance de Dieu sur ceux qui ont osé entreprendre sur la sacrificature d'Aaron, que les flammes de Dieu les ont consumez, & que pour les engloutir la terre s'est entrebaillée, nous craignons de rien attenter à la sacrificature de Christ, dont la saincteté est plus grande sans comparaison, & la majesté plus inuiolable.

---

## SECTION VI.

*Que ceux de la Religion ne sont point dignes d'auersion, ny pour ne deferer pas à l'autorité de l'Euesque de Rome comme il le veut, ny pour s'estre separez de la communion de l'Eglise Romaine.*

**L**A cause de cette auersion qu'une grande partie des peuples, & quelques-uns de ceux qui sont en autorité, & quasi generalement tous les Ecclesiastiques ont contre nous, peut bien estre en ce que

nous ne croyons pas toutes les choses qui sont receuës en la Religion de Rome; mais ie suis tres-assuré que quant au Siege Romain, la haine implacable qu'il nous porte, & les persecutions qu'il suscite cõtre nous par tout où il le peut, ont pour principal, & peut-estre pour vnique motif, que nous ne voulons pas recognoistre sa puissance; car il voudroit qu'il luy en eust cousté le Purgatoire, & la Transsubstantiation, & le Sacrifice de la Messe encore, & tout ce que le commun tient de plus sacré & de plus inuioiable en sa Religion, & que toute l'Europe fust bien reünie deffous son autorité, tellement que le party Catholique & le Reformé luy prestassent leurs forces conjointement pour s'assujettir l'Afrique & l'Asie. Apres cela il voudroit disposer des parties les plus éloignées de l'Orient & de l'Occident, & de fait il a entrepris en ces derniers temps de donner le droict de conquerir les vnes & les autres Indes. Et ie ne parlerois pas si hardiment de ce genie de domination, qui depuis Romulus iusqu'à maintenant a tousiours esté inseparablement attaché au Capitole, si les Cours Souueraines de cét Estat ne l'auoient expressement remarqué, & si elles

ne s'estoient opposées à les entreprises par la generosité de leurs Arrests encore depuis peu d'années. Or si l'ambition de ce Siege le porte à nous haïr à cette occasion, tant s'en faut que ceux qui ne sont pas menez de mesmes interests, doiuent imiter sa passion, que toutes sortes de gens nous deuroient aimer de ce que nous combattons sa puissance. En effet, il en affecte de deux sortes. L'une temporelle, dessus les Estats politiques : & l'autre spirituelle, sur les consciences des Chrestiens. Quant à ce qui est de celle-cy, il faut que ie repete icy ce que j'ay desia dit ailleurs, que mon intention n'est pas d'entrer dedans la Controuerse. Je diray seulement qu'on ne doit pas trouuer estrange si nous ne luy voulons pas deferer toute l'autorité qu'il s'attribuë en cét esgard, puis que plusieurs de sa communiõ la trouuent exorbitante. Pour exemple, si on l'en croyoit, il auroit pareil pouuoir de pardonner les pechez que Nostre Seigneur Iesus, non pas comme ministre de sa grace & de sa paix, qui dit, *Si vous croyez & si vous vous repentez, vos pechez vous sont pardonnez*, ce qui est la voix de l'Euāgile; mais comme Prince Souuerain en l'Eglise de Dieu, à qui il

appartient de retenir & de remettre les pechez avec plenitude de puisſance. Or qu'elle apparence y a-t'il de ſouffrir cette preſomption en vn homme mortel, que chacun ſçait eſtre pecheur comme nous, & qui quelquesfois ſurpaſſe les autres pecheurs en atrocité de crimes? S'il ne met pas en auant cette plenitude de puisſance ordinairement ſi cruëment, que de ne faire deſpendre la remiſſion des pechez d'aucune condition, quoy que chacun ſçait que, *Sic volo, ſic iubeo*, eſt la plus ordinaire loy de ſon Empire, les conditions ſous leſquelles il la promet ne monſtrent pas moins ſa preſomption, que ſ'il le faiſoit d'une authorité abſolument ſouueraine; car il ne dit pas, *ſi vous croyez, & ſi vous vous repentez, vos pechez vous ſeront pardonnez*, en quoy il ſe monſtreroit Seruiteur de Jeſus-Chriſt; mais, *ſi vous dites tant de fois vne telle oraiſon, ſi vous verez les reliques d'un tel Saint, ſi vous viſitez telle ou telle Eglife*. A ce qu'il paroiſſe que c'eſt luy qui a le droit & l'authorité de faire des loix, à l'obſervation deſquelles il attache & la promeſſe de la remuneration, & la menace de la punition, comme bon luy ſemble. Il eſt vray qu'il ne dit pas ouuertement qu'il



abroge la loy de Christ. Mais tant y a que puis qu'il en ordonne de nouuelles auxquelles nostre Seigneur n'a iamais pensé, & qu'il promet à ceux qui les obserueront la mesme remuneration que celle que Iesus-Christ fait esperer à ceux qui garderont les siennes, il s'attribuë en l'Eglise vne puissance aussi absoluë que celle de Iesus-Christ. Or de qui est-ce que cela ne choque point l'entendement, qu'un simple homme, & mortel, & pecheur, s'en vueille tant faire accroire? Il passe mesmes en quelque façon au delà de nostre Seigneur en la distribution de ses recompenses; car ou bien nostre Seigneur a promis vne mesme remuneration vniuersellement à tous les croyans, ou s'il y a mis quelque inégalité, tant y a qu'il en a remis la reuelation au dernier iour, & qu'il n'a point designé les personnes particulieres à qui vne plus grande mesure de gloire est assignée. Au lieu que l'Euesque de Rome pretend auoir le droit de distribuer les couronnes de là haut, en faisant les vns *Saincts*, & se contentant de faire les autres *Bien heureux*, & leur assigne leur culte religieux proportionné à l'eminence de ces degrez, ainsi qu'il plaist à sa *Saincteté* & à

*sa Beatitude Pontificale.* Qui nous accusera d'incrédulité ou d'opiniastreté si nous ne pouvons croire que ceux-là dispensent la gloire & la félicité de là haut, de qui leurs propres historiens disent qu'ils n'y ont point de part; & que Baronius & Genebrard ne traittent point autrement que comme des Apostats & des monstres? Il ne se contente pas de faire plus que nostre Seigneur n'a fait en cela, il deffait ce que nostre Seigneur a fait & constitué en autres choses. Je vous prie à quoy faire les Dispenses qu'il distribué ainsi qu'il luy plaist, sinon à monstrier qu'il a le droit, ou de permettre ce que Iesus-Christ a defendu, ou de defendre ce que Iesus-Christ auoit laissé libre? Car si ce dont il dispense a esté defendu de Dieu, il entreprend sur l'autorité de ses loix. Si ce dont il dispense auoit esté laissé en nostre liberté, la defense qu'il en auoit faite luy-mesme, & dont il nous veut dispenser, est vn attentat à la liberté que Dieu auoit laissée à nos consciences. Or quelle ombre de verisimilitude y peut-il auoir en cela, que le Sauueur nous ait laissé ses loix pour regle de nostre conduite quand il est monté au Ciel, & qu'il ait donné aux hommes mor-

tels la puissance de les enfreindre ? Mais infraction des loix de Dieu , qu'il y ait en ces Dispenses , ou non , tant y a que nous ne pouuons digerer , & nul ne le doit trouuer mauuais , que l'Euesque de Rome donne des loix à nos consciences. Si quand il en establit quelques-vnes , il disoit ; Je n'auance rien de mon chef , & ne veux point *dominer sur les heritages du Seigneur* , ainsi que Saint Pierre l'ordonne ; Je mets seulement en auant ce que nostre Seigneur nous a laissé en sa Parole : Nous aurions en cela la voix d'un seruiteur qui fait profession de ne vouloir rien faire valoir sinon la volonté de son Maistre. Ainsi ce seroit à nous à chercher en cette parole si ce qu'il diroit y seroit fondé , pour disposer nos consciences à respecter comme il faut l'autorité de ce grand Dieu , à qui seul , en ce qui est de la Religion , elles doiuent obeïssance. Mais ou bien il ne nous parle du tout point de la Parole de Dieu en ses loix , où il veut que s'il y en fait mention , nous nous en rapportions entierement à son interpretation : de sorte qu'il vaudroit autant qu'il les nous donnast absolument de son chef , que de nous y alleguer la Parole de Dieu , & neantmoins ne vouloir

pas que nous les examinions, pour voir si elles y sont conformes. Or quoy ? Que peut auoir l'Euesque de Rome qui donne telle autorité à ses constitutions, que nous y soumettions nos ames ? Est-il Dieu pour regner dedans nos esprits, comme les Rois de la terre regnent dessus nos corps ? Ou de quelles preuues peut-il soustenir vne si haute pretention, que Dieu luy ait resigné son autorité, pour auoir vn empire absolu dessus les ames des hommes ? Enfin, i'atteste nos plus passionnez aduersaires, s'il est raisonnable de nous condamner pour ne souffrir pas qu'il empiete la dominiõ absoluë dessus nos consciences. Si nous demandons à l'Euesque de Rome les titres sur lesquels il fonde sa vocation, & cette puissance illimitée qu'il pretend sur l'Eglise de Dieu, il nous produit quelques textes de l'Ecriture : Comme, *Tues Pierre, & Pais mes brebis*, & semblables. Si nous voulons dire quelque chose sur l'intelligence de ces mots, il nous dit qu'il les faut entendre, non selon nostre sens, mais selon son interpretation. Si nous voulons reuoquer en doute l'autorité de son interpretation, il nous dit que tant s'en faut que nous deuions en de-

mander quelque autre preuue que le tefmoignage qu'il luy rend, que la Parole de Dieu mefme ny ne peut, ny ne doit auoir aucune authorité enuers nous, finon celle qu'il luy donne par fon tefmoignage. Que fans cela on n'en feroit pas plus de cas que des fables d'Efope, ou de l'Alcoran de Mahomet, & qu'enfin apres toutes queftions, toutes interrogations, toutes ratiocinations, il faut croire ce qu'il a dit, pource qu'il l'a dit, & ne croire pas à Dieu mefme qui parle dans le Vieil & dans le Nouveau Testament, finon autant qu'il plaira au fouuerain Pontife de Rome. Qui fe perfuadera qu'un homme foit plus croyable que Dieu, ou que les Conftitutions du fiege Romain portent plus de marques de diuinité que les efcrits des Prophetes & des Apoftres ? On tient en la communion Romaine que l'Eglife ne peut errer : mais quand il faut expliquer en qui refide cette grace de l'infalibilité, les opinions fe partagent. Les vns difent qu'elle refide au Concile, qu'ils efleuent au deffus du Pape à cette occafion : les autres fouftiennent qu'elle refide au Pape, qu'à cette raifon ils mettent au deffus du Concile. La Sorbonne a efté autrefois de ce premier senti-



ment, & a esté fuiuite parce qu'il y auoit de plus sain & de plus ſçauant en cette communion. Les Ieſuites qui ſont venus depuis ont pris determinément l'autre party, & ont tiré beaucoup de gens apres eux, & peut-eſtre quelques-vns de la Sorbonne meſme. Ceux-cy accusent les autres de rebellion contre le chef de l'Egliſe de Ieſus-Chriſt : ceux-là accusent le Pape de preſomption, & d'entreprendre deſſus les droits de l'Egliſe. Et pource que le Pape n'oze haſarder la deciſion de cette queſtion, & qu'à ſon aduis il eſt beaucoup plus expedient de gagner pied à pied dans les eſprits par les eſcrits de ſes Docteurs, & par l'entremiſe de ſes emiſſaires, que de s'expoſer au iugement d'un Concile, qui ſelon l'apparence ſe porteroit à la deſenſe de ſes propres droits, il ſouffre en ſa communion ceux qui ne luy accordent pas cette puissance ſouueraine. Pourquoi donc nous haïroit-on pource que nous la luy refusons, & que nous nous oppoſons encore plus vigoureuſement qu'aucun à ſa tyrannie ? Quant à ce qui eſt de la puissance temporelle qu'il pretend auoir deſſus les Rois, les eſprits n'y ſont pas moins partagez, & la qualité de ceux qui y ont inte-

rest rend la dispute plus esclatante ; car il est question de la souveraineté des Potentats, que le Pape & ses adherans pretendent estre soumise à sa domination, au lieu que les Princes & leurs bons sujets la maintiennent estre absolument independante. Et icy encore veritablement nous meritons la bien-veillance des gens de bien, & qui sont affectionnez comme il faut à leurs Princes & à leur Patrie ; car bien que ceux qui fauorisent les desseins du Pape en cet eîgard, disent de cette puissance temporelle qu'il affecte sur les Estats, qu'elle ne luy conuient qu'indirectement seulement, pource qu'elle ne luy a esté donnée sinon pour seruir à la manutention de l'autre, & pour la faire valoir, si est-ce que directement ou indirectement, il assujettit tant qu'il peut les Couronnes à sa Tiare. Les Parlemens à la verité s'opposent ouvertement à cét attentat ; la Sorbonne par ses Decrets, les a secondez où l'occasion l'a requis ; &, ce qui vaut mieux que ny les Arrests, ny les Decrets, nos Rois, où la necessité l'a voulu, n'ont jamais manqué d'y dégainer leur espée. Mais on nous permettra pourtant de dire, que la façon dont nous nous sommes pris  
à en

à en arrester les progresz , eist de toutes la plus efficace , si on nous vouloit entendre. Tandis qu'on permet à l'Euesque de Rome de se preualoir de cette puissance spirituelle & directe qu'il vîsurpe effectiue-ment, quoy que le droit ne luy en ait point encore esté oütroyé par les Conciles , & tandis qu'on souffre qu'il en espende la creance par tout, & mesmes dans les Conseils des Rois , il raisonne tousiours assez probablement qu'elle luy auroit esté donnée inutilement , si l'autre pour la soustenir ne venoit en consequence. Et s'il est vray qu'il soit le Vicaire de nostre Seigneur enuers les Chrestiens , pour leur donner des loix selon lesquelles ils se reglent en ce qui est de la pieté & de la vertu , il semble qu'il ait quelque apparence de raison de vouloir estre son Lieutenant, en ce qui est de l'usage de la puissance temporelle; car si nous considerons nostre Seigneur comme Mediateur seulement, l'autorité que son Pere luy a donnée dessus toutes choses a ces deux relations, qu'entant qu'elle s'estend dessus les consciences des hommes , pour les former aux vertus qui sont necessaires au salut , elle luy appartient directement , pource que sa char-

ge de Mediateur regarde directement le salut & la redemption de l'ame. Mais entrant qu'elle s'estend sur les choses de la vie presente , & dessus l'autorité des Rois, elle ne luy a esté donnée sinon, pour le dire ainsi, aucunement indirectement, afin de gouverner tellement toutes choses icy bas, que rien ne puisse empescher le salut de son Eglise, pour laquelle seule il est Mediateur actuellement. Comme donc elle luy a esté donnée à cet effet, & comme sa charge de Mediateur n'a peu s'en passer, celui qui s'attribuë l'honneur d'estre son Lieutenant en vne partie de son autorité, n'est pas sans quelque couleur de raison enuers ceux qui la luy veulent accorder, de pretendre encore la communication de l'autre. Et il sçait si bien mesnager cette probabilité de son raisonnement, & a tant de gens à sa deuotion pour gouverner les esprits de la pluspart de la Chrestienté, qu'elle passe pour demonstration enuers vne infinité de personnes. Ainsi les Parlemens, par l'affection qu'ils portent à l'autorité des Rois, & par le iuste interest de la leur propre, conseruent les bons sentimens, & les autorisent tant qu'ils peuvent. La Sorbonne, ou par zele à la

Royauté, ou par l'amour de sa propre liberté, ou par quelque autre telle consideration, ne s'est point iusques icy absolument laissée corrompre. Enfin, la puissance & la generosité de nos Rois a tousiours vaillamment soustenu les droits de leur Estat, & la splendeur de leur Couronne. Mais cela n'empesche pas qu'il n'y ait dedans tous les Ordres, quantité d'esprits infectez de cette pernicieuse opinion, que les Papes sont au dessus des Rois, & que leur autorité est dependante de la sienne. De façon que s'il arriuoit quelques fascheux temps, comme nos peres en ont veu, où les bons sentimens ne fussent pas armez de toute la puissance qu'ils ont maintenant, il ne faut pas douter que les mauuais n'en prissent l'occasion pour esclorre. Quant à nous, nous auons porté la hache à la racine de cette ambition, en ostant à l'Euesque de Rome la puissance spirituelle qu'il pretend, & auons par ce moyen rendu nos ames impenetrables à toutes sortes d'opinions, qui seroient pour y choquer tant soit peu la fidelité que nous deuons à nos Princes; car ne recognoissans au monde, hors nostre Seigneur Iesus, homme quelconque au dessus d'eux, on se



peut bien assurer que nostre obeïssance & nostre fidelité demeure absolument inuiolable. Tellement qu'en cette partie en laquelle on nous accuse de n'estre pas assez bons Chrestiens, nostre doctrine nous oblige à estre parfaitement bons François; au lieu qu'autant qu'on s'éloigne de nostre sentiment en cela, autant donne t'on sans y penser, d'ouuerture & d'auantage à l'ambition estrangere. Mais certes c'est à grand tort qu'on nous accuse de n'estre pas bons Chrestiens en cet esgard. C'est le zele que nous auons à la gloire de Iesus-Christ, qui nous rend irreconciliables avec l'Euesque de Rome, & cela pour trois raisons principales. La premiere est, que de ce siege là, comme d'une source féconde à merueille, sont venuës en l'Eglise toutes ces doctrines que nous ne pouuons croire, & que nous estimons ne s'accorder nullement avec la Religion de Iesus-Christ. Ou si ce ne sont les Euesques de Rome qui les ayent inuentées, ils les ont receuës avec tant d'auidité, ils les ont prouignées avec tant de soin, ils les ont defenduës avec tant de chaleur, ils les ont tellement appuyées de leur autorité, & ont excité tant de persecutions contre

ceux qui ont voulu y résister, que sans leur faire tort on leur en peut bien attribuer l'origine. Ayans donc en l'ame vne persuasion si profonde, que ces dogmes ont gasté la pureté de l'Evangile de Christ, comment pourroit-on trouver mauvais que nous ayons cette implacable animosité contre celui que nous en croyons estre la cause ? La seconde est, que comme nous l'auons veu cy-dessus, il s'attribuë quantité de choses, qui n'appartiennent sinon à nostre seul Redempteur, & dont la communication à qui que ce soit, ou ruïne, ou au moins esbranche trop notablement la Souueraine autorité que son Pere luy a donnée; car il veut regner dedans les consciences des Chrestiens, quoy que ce soit l'empire de la seule Diuinité, où l'homme mortel ne doit rien attenter, & où il ne sçauroit atteindre. Il ordonne comme i'ay dit, de toutes choses à sa fantaisie, & denonce eternelle damnation à ceux qui n'obeïront pas; il pardonne comme il luy plaist, & veut qu'on soit aussi asseuré de son pardon, que si on l'auoit receu de la bouche de Dieu mesme. Il determine de ce qu'il faut croire, & commande qu'on y adjouste foy comme aux oracles diuins

Il dispense de ce qu'il veut, & mesmes des commandemens de Dieu, & pretend que sa dispense met à couuert des menaces du Souuerain Iuge du monde. En vn mot, si Iesus-Christ estoit descendu du Ciel, il ne requerroit pas de nous vne plus entiere ny plus absoluë obeïssance à ses ordonnances. Or nous ne croirions pas estre bons Chrestiens si nous consentions à cet attentat, & penserions trahir indignement la gloire de nostre bon Maistre. La troisiéme finalement est, que par quelque rencontre que ce soit, il est arriué qu'une infinité de choses que nous voyons auoir esté predites d'un certain ennemy iuré de Christ, se rapportent merueilleusement à ce qui paroist en l'Euesque & en la Cour de Rome. Et pource qu'il est dit que cét ennemy doit estre manifesté aux derniers temps, & que desormais apres seize ou dix-sept cens ans tous ces temps doiuent estre estimez faire partie de ces derniers, toutes choses de cette nature nous sont suspectes; car nous ne nions pas qu'il n'y ait quelquesfois de la fallace dans les apparences, & qu'il y a beaucoup de choses qui ont quelque ressemblance de ce qu'elles ne sont pas, & d'autres qui sont ce dont elles ne portent

pas les marques bien euidentes. Nous ſça-  
uons meſmes que lors qu'il eſt queſtion  
de l'interpretation des Prophetes, on eſt  
ſujet à ſ'y tromper auant qu'elles ſoient  
eſclaircies par les euenemens, & qu'enco-  
re apres les euenemens, on ne rencontre  
pas toujours à les parfaitement adjuſter  
enſemble. Mais tant y a que la deſſiance  
eſtant la mere de ſeureté, & les Chreſtiens  
ſ'eſtans bien paſſez de Pape au commen-  
cement, nous aimons mieux nous en paſ-  
ſer, & nous abſtenir de toute communion  
avec qui que ce ſoit, qui ait quelque air de  
cet aduerſaire. En quoy l'on peut penſer  
que nous ne ſommes menez d'autre con-  
ſideration ſinon du zele de noſtre Sei-  
gneur, & du deſir de noſtre ſalut, qui nous  
deuroient ſans doute excuſer, quand il y  
auroit, ce que nous ne croyons pas, quel-  
que choſe d'un peu ſcrupuleux en noſtre  
conduite.

Je penſerois auoir ſatisfait aux plaintes  
les plus importantes qu'on faſſe ordinaire-  
ment contre nous à l'égard de ce que nous  
ne croyons pas, ſinon qu'on nous accuſe  
encore de n'auoir pas aſſez deferé à l'au-  
thorité de l'Egliſe, & de ne recognoiſtre  
pas aſſez les bien-faits que nous en auons

receus ; car quoy qu'il en soit , on dit que c'est elle qui nous a enfantez à Dieu par le Baptisme , & qui nous a donné la connoissance de Iesus-Christ. C'est à elle à qui Dieu auoit donné l'autorité de nous gouverner comme à nostre mere , & à qui il auoit remis le soin de nostre education. Et neantmoins nous nous sommes separez d'elle comme d'auec vne estrangere , & luy faisons tout ouuerte-ment la guerre , comme si c'estoit vn enemy. Au lieu de supporter doucement ses defauts , en cas qu'elle en eust , & de respecter plustost ses rides , que de luy insulter , pource que l'aage de tant de siècles a gasté quelque chose de sa premiere beauté , nous l'auons diffamée de tous costez ; & luy auons fait les reproches les plus scandaleux , & donné les titres les plus iniurieux du monde. Estans sortis de ses entrailles , ne deuions nous pas garder quelque reuerence à son nom , & conseruer autant que nous pourrions sa bonne reputation deuant les hommes ? Ce sont les accusations qu'on nous fait , & l'vn des principaux sujets pour lesquels ceux qui sont demeurez dans la communion dont nous sommes sortis ,



ont de l'aersion contre nos personnes. Certainement s'il estoit permis de distinguer entre nous & nos peres, en ce qui est de la Religion que par la grace de Dieu nous tenons, la plus-part de ces accusations ne nous toucheroient aucunement; car pour ce que par l'Eglise on entend seulement la Romaine, nous pourrions incontinent respondre, que quant à nous elle ne nous a point engendrez à Iesus-Christ, & que ce n'est point d'elle que nous auons receu le signe du saint Baptisme, ny nostre education en l'esperance du salut. Nous tenons toutes ces choses de la communion Reformée, dans laquelle nous sommes nez, & n'en auons l'obligation à aucune autre. Nos ayeuls sont bien sortis de la communion de Rome à la verité, pource qu'ils y estoient auparauant: mais pour nous, qui n'y auons iamais esté, on ne nous peut accuser de l'auoir abandonnée. Quand donc l'action de nos peres auroit esté tachée de quelque manque de respect, & de quelque deffaut de gratitude enuers cette Eglise-là, il ne seroit pas raisonnable d'en faire tomber le blasme sur nous, ny que s'ils ont mangé l'aigret, nous en ayons les dents agacées. Quant à nous,

pour ce que c'est l'Eglise Reformée qui nous a engendrez à Dieu, & qu'elle nous nourrit en la cognoissance de Iesus-Christ beaucoup plus purement que ne sçauroit faire la Romaine, si nous nous separions d'elle pour entrer en la communion de l'autre, veu que nous n'en auons point de sujet, & que nous ne voyons rien en elle qui nous offense, ne meriterions-nous pas qu'elle fist contre nous en beaucoup plus forts termes, les plaintes que la Romaine fait contre l'action de nos ayeuls ? Ce qu'on dit qu'ils ont eu tort de se separer de l'Eglise en laquelle ils estoient nez, & à laquelle ils auoient tant d'obligations, ne iustifie-t'il pas clairement la resolution que nous gardons de demeurer en celle où nous sommes ? Car autrement nous ferions tout de mesme que si estant arriué de la dispute entre nostre mere & nostre bisayeule, nous abandonnions la maison de celle qui nous a prochainemēt donné nostre estre, quoy qu'elle ait vn merueilleux soin de nous, & qu'elle nous esleue à toute sorte de vertu & de pudeur, pour nous attacher à celle que nous ne recognoissons pour origine de nostre estre sinon de loin, & à qui la foiblesse de l'aage ne per-

met pas de remedier aux desordres que la plus-part des siens commettent chez elle. Mais, bien : souffrons qu'on nous impute la faute de nos peres, s'il y en a, & voyons si leur action est telle qu'elle merite ce nom, & qu'elle ait deu attirer la mauuaise volonté du reste des Chrestiens dessus eux & dessus nous. Il est certain que c'est de l'Eglise Romaine qu'ils ont receu le Baptisme, & qu'ils ont succé le premier laiët de la cognoissance du Sauueur. Et tandis qu'ils ont esté comme des enfans en intelligence, & qu'ils ne se sont point apperceus de la façon de laquelle on les nourrissoit, ils ont vescu dans vn merueilleux respect à toutes ses ordonnances ; à peu près comme les petits enfans aiment leurs nourrices, pource qu'elles les portent au col, qu'elles les joüent & les ébatent, & qu'elles leur donnent la mammelle, sans discerner quand ils tettent si c'est de bon ou de mauuais laiët. Depuis qu'ils sont deuenus grands, & que Dieu a illuminé leur raison, ils ont recognu que ce qu'ils auoiët succé de la mammelle de leur mere, & de leurs nourrices, estoit corrompu, & que les alimens qu'on leur presentoit continuellement, estoient quasi tous si gastez,

qu'avec fort peu de nourriture qu'ils y trouuoient, ils en tiroient quantité de suc qui auoit des qualitez extremement veneneuses. On leur enseignoit bien qu'il y auoit vn Dieu & vn Mediateur entre Dieu & les hommes : mais on enuironnoit cela d'une telle foule de Saints & de Saintes, qu'on leur propoisoit pour objet de leurs adorations, que leur deuotion s'arrestoit d'ordinaire toute sur eux, & ne paruenoit pas iusques au vray Dieu & au vray Mediateur, sur lesquels seul elle doit tendre. On leur disoit bien que le Seigneur Iesus a souffert la mort en la Croix pour eux ; mais on ne faisoit autre insistence sur cette doctrine sinon de leur monstrier vn Crucifix ; du reste , les satisfactions des Saints , les souffrances des Martyrs , le thresor des Indulgences , les peines du Purgatoire , la propitiation de la Messe, les merites des œuvres , & les autres aydes de cette nature , que les hommes auoient trouuez contre le sentiment du peché, leur estoient tellement inculquez, que la satisfaction de Christ demeueroit estouffée là dessous, & ne desployoit quasi aucune efficace en la conscience. On leur disoit bien que Iesus-Christ est là haut au Ciel : mais

on leur repetoit si souuent qu'il estoit aussi dans l'Hostie, on le mettoit en cét estat si assiduelement deuant leurs yeux, on y attachoit leurs esprits de telle façon, on leur en recommandoit si diligemment & la veneration & l'vsage, qu'au lieu d'esleuer leurs ames en haut pour chercher le Sauueur à la dextre du Pere en vn estat glorieux, tous les mouuemens de leur pieté s'espandoient dessus les accidens d'un petit morceau de pain, sous lesquels on leur disoit qu'il estoit enueloppé icy bas en terre. On les aduertissoit quelquesfois qu'il y a vncertain liure qu'on nomme la Parole de Dieu: mais ils n'en tiroient non plus d'instruction ny de consolation que s'il eust esté aux Indes. Les exemplaires en estoient rares à merueille, comme maintenant encore en Italie & en Espagne c'est vn liure quasi entierement incognu. Ceux qui leur en pouuoient tomber entre les mains estoient en langue où ils n'entendoient du tout rien; ou s'ils y entendoient quelque chose, il ne leur estoit pas permis d'y lire. Au lieu de cela tout estoit rempli de Legendes de Saints, de constitutions Papales, de recits de faux miracles & de vaines visions, & de liures de deu-



tion esgalement remplis d'attraits à la superstition, & d'inutiles impertinences. On leur faisoit bien à la verité quelquesfois quelques Sermons; mais on n'y entendoit resonner autre chose sinon, ou la commemoration de la vie des Saints, ou des exhortations au service de la Vierge, ou la recommandation des pardons émanez du Siege Romain, ou le debit des merites de surerogation, ou des contes extrauagans & fabuleux, sans aucune solide instruction en la doctrine de l'Euangile. On les exhortoit à estre pieux & deuotieux: mais cette deuotion consistoit à frequenter souuent les Eglises, pour y marmonner quelques prieres auxquelles ils n'entendoient quasi rien, à assister aux processions sans sçauoir à quel dessein, à chanter quelques Litanies aux Saints de Paradis, à faire des offrandes aux Autels, & à faire force fondations de Messes pour eux & pour les ames de leurs peres. Enfin, les chapelets, les Agnus Dei, les grains benits, les aspergés d'eau consacrée, les petits morceaux de bois de la Croix enchassez precieusement, quelques esclats de vieux ossemens de morts, quelques lambeaux de leurs habillemens, quelque petit ais demy pourry

resté de leurs bieres, quelques chandelles offertes à vne image, quelques agenouïlemens deuant vn Crucifix, & quelque pelerinage au sepulchre d'un Martyr, estoit cela en quoy consistoit alors le principal de la pieté en laquelle on exerçoit nos ancestres. C'estoient là les alimens dont on les nourrissoit, au lieu de la bonne doctrine de la Parole de Dieu, qui seule peut donner & vne salutaire instruction, & vne solide consolation, & de bons motifs à la vraye sanctification, & de bons & fermes fondemens à l'esperance. Et ie ne crains pas qu'on m'accuse d'en vouloir faire accroire quand ie parle ainsi; car ceux de l'Eglise Romaine mesme, qui ont quelque cognoissance de ce qui se faisoit il y a deux cens ans en la Chrestienté, & qui veulent parler avec ingenuité, aduoient franchement que sans la predication de Luther & de ses compagnons, le nom de Iesus-Christ s'en alloit quasi entierement esteint dans la memoire des hommes. Quand donc Dieu a fait cette grace à nos peres de recognoistre la mauuaise disposition que ces alimens auoient donnée à leurs esprits, & les mauuaises habitudes qu'ils en auoient contractées, ils ont crû estre obligez par

toutes sortes de deuoirs & enuers autrui, & enuers eux-mesmes, d'aduertir leur mere de ce mal, & de la prier d'y donner ordre. Ce qu'ils ont fait tant afin de corriger leur propre temperament, en se seruant deormais de viandes plus salubres, que pour empescher que leurs freres, qu'elle enfantoit iournellement, ne fussent à l'aduenir aussi mal nourris & aussi mal esleuez qu'eux. Et nul ne peut douter que la charité fraternele, que les Chrestiens se doiuent porter les vns aux autres, ne les y obligeast estroitement, comme les affections naturelles obligent ceux qui sont les plus auancez en aage entre les enfans d'une maison, de pouruoir entant qu'en eux est que les plus petits soient nourris comme ils doiuent estre. Or le moyen d'y donner ordre estoit que la mere mesme changeast la premiere le regime de sa vie, afin de faire de bon suc pour le donner à ses enfans: qu'elle eust soin de la conduite des nourrices auxquelles elle les commettoit, afin qu'elles ne gastassent pas leur propre sang par leurs débauches; ce qu'elles ne pouuoient faire sans vitier les parties nobles de ceux qu'elles allaittoient: & enfin, qu'elle changeast tout le gouuernement

ment de sa maison , afin que ceux qui auoient le soin de faire les prouisions , ou n'y apportassent que de bons & salutaires alimens , ou ne les gastassent point eux-mesmes de leurs empoisonnemens. Pour cela il falloit que Rome se reformast la premiere , puis qu'elle se yante d'estre la mere de tous les Chrestiens. Il falloit qu'elle pourueust en toutes les parties de la Chrestienté, à ce que les Euesques & les Prestres , ausquels elle pretend auoir le droit de donner ses enfans à nourrir , ne leur enseignassent que les doctrines de l'Euangile, & qu'ils les destournassent de tout ce qui peut endommager la pureté de la pieté. Bref il falloit qu'elle s'employast à ce que les Vniuersitez , les Academies , & les Colleges , qui sont comme des lieux publics , dont on apporte les doctrines en l'Eglise, fussent repurgez de toutes erreurs , afin que ceux qui en viendroient n'instillassent rien dans l'esprit du peuple, qui ne fust conforme à la verité, & propre pour engendrer la pieté , la consolation, & l'esperance. Cét aduis donc que nos ayeuls ont donné à l'Eglise Romaine, meritoit-il blasme, ou louange, & de quoy deuoit-il estre recognu, de haine, ou

d'amour ? Et maintenant encore que nous persistons à luy departir ces bons aduertissemens, qui ne procedent sinon du zele de la gloire de Dieu , & de la charité que nous auons pour le salut de nos prochains, y a-t'il sujet de crier contre nous comme contre des enfans desobeissans & rebelles à leur mere ? Pour ce qui est de l'autorité que nostre pere celeste luy auoit donnée, nous recognoissons certes que nos ayeuls ont esté obligez d'en faire consideration. Mais aussi prions nous tout le monde de recognoistre que cette autorité-là n'est ny infinie, ny illimitée, ny si absolument souueraine, qu'elle les ait deu empescher de pouruoir à ce qu'ils ont crû estre de leur deuoir enuers Dieu, & de l'esperance de leur salut ; car il n'y a autorité de mere si respectable en la terre, qui oblige les enfans à se laisser empoisonner, quoy qu'il n'y aille sinon de la vie presente seulement. *Q*ue peut-ce donc estre lors qu'il y va d'une felicité eternelle ? Et si on dit que les enfans doivent auoir assez bonne opinion de leur mere, pour ne croire pas qu'elle soit ny si meschante qu'elle voulust, ny si imprudente que sans y penser elle permist qu'on



leur donnaſt du poiſon , à la verité tels ſoupçons ne doiuent pas venir legèrement en la penſée. Mais quand on ſe ſent deſia le corps affecté, & que toutes les fonctions en ſont alterées; quand apres auoir attentiuement conſideré les qualitez des alimens que l'on prend, on les a recognus pernicioeux , & qu'on a toutes ſortes de preuues certaines & indubitables que le mal eſt venu de là, alors il n'y a perſonne qui ne doiue pouruoir à ſa ſeureté, & n'y a reſpect de mere qui tienne. Nos peres donc ayant recognu à toutes les operations de leurs ames, que la doctrine qu'on leur enſeignoit eſtoit toute imbuë de venim, que leur pieté enuers Dieu en eſtoit gaſtée d'idolatrie & de ſuperſtition, que leur charité enuers le prochain en eſtoit toute languiffante, que la paix de leurs eſprits eſtoit continuellement troublée, & leurs conſciences pleines d'inquietude & d'ardeur, que l'eſperance de la bien-heureuſe immortalité eſtoit eſtouffée par des doutes & des craintes irremedia- bles, & que generalement toute l'economie de leurs eſprits eſtoit en deſordre, que pouuoient-ils faire ſinon rechercher la cauſe de leur mal, & apres

l'auoir cognu courir promptement au remede ? Et puis que la reuerence que leur Pere celeste leur auoit enjoint de porter à l'Eglise , n'auoit pour but sinon leur salut , estoit-il raisonnable qu'ils la gardassent encore quand elle y deuenoit pernicieuse ? Adjoustez à cela qu'en vne telle occurrence , apres qu'un bon enfant auroit fait sa plainte à sa mere , il se trouueroit merueilleusement surpris si au lieu de luy donner quelque satisfaction, il n'en remportoit que ces responses. Je ne scaurois vous tromper , & ne scaurois estre trompée moy-mesme. Je ne puis faillir en vostre conduite , & suis impeccable en la mienne, & vous deuez vous laisser mener à mon autorité aueuglement. Ce n'est pas à vous à iuger de la qualité des alimens dont on vous nourrit ; c'est à moy que vostre pere a laissée en son absence dispensatrice des biens de sa maison, administratrice de ses affaires, tutrice & curatrice de ses enfans , avec vne autorité independante & souueraine. Je vous prie cette procedure ne seroit-elle pas indigne d'une bonne mere , & n'augmenteroit-elle pas les soupçons que ses enfans auroient desia de son gouvernement ? Je diray encore

quelque chose dauantage. Si pour faire semblant de donner quelque satisfaction à ses enfans, & de leur oster ces fascheux scrupules de l'esprit, elle faisoit vne assemblée de Medecins pour examiner ces alimens, & qu'elle n'y appellast sinon ceux qui leur sont suspects, & de l'ignorance ou de la perfidie de qui ils se plaignent, & qu'en cette congregation on ne vist rien sinon des menées & des artifices pour prononcer à quelque prix que ce fust en faueur de son autorité, & pour affermir sa domination; cela sans doute augmenteroit encore leur mécontentement, & leur mettroit de plus mauuaises pensées en l'ame. Or c'est ce que l'Eglise Romaine a fait à nos peres; car au lieu d'escouter leurs plaintes, & de leur y donner quelque iuste satisfaction, elle a respondu, *qu'elle ne pouuoit errer, que Dieu l'auoit establie la dispensatrice de ses secrets, qu'elle auoit dans l'ecrain de sa poictrine tous les mysteres du Royaume des Cieux, qu'elle estoit la depositaire de la Tradition, qu'à elle appartenoit la decision des Controuerses pour y prononcer infailliblement, qu'elle seule pouuoit interpreter la parole de Dieu sans peril de s'y tromper, que l'Escripture n'est que la lettre de creance, & l'Eglise*

*l'Ambassadeur à qui les dogmes diuins auoient esté commis pour les reueler ; que cette lettre de creance mesme n'auoit de credit & d'autorité sinon autant que l'Eglise luy en donnoit , & qu'elle l'autorisoit enuers nous par son témoignage. Puis quand à la sollicitation des Rois & des Empereurs elle s'est disposée à conuoquer vn Concile pour vider les differens suruenus entre elle & nous, elle n'a pas voulu permettre qu'aucun s'y trouuast, sinon ceux qu'elle sçauoit estre nos ennemis, & a si bien sçeu mesnager toutes leurs intrigues , que de Rome on enuoyoit à Trente la decision toute nette de ce qui s'y disputoit ; iusques là que mesmes les Ambassadeurs de nos Roys n'ont pû s'empescher d'en tesmoigner ou leur mespris, ou leur indignation par des sarcasmes : car c'est à cette occasion que Monsieur de Lansac disoit, au rapport de M<sup>rs</sup>ieur de Thou, & du Pere Paul, *Qu'on y apportoit de Rome le S. Esprit dans vne valise*. Et la belle histoire que ce dernier, l'vn des plus grands hommes de ces derniers temps, & de communion Romaine pourtant, a mise en lumiere touchant ce Concile, est vne preuue tres-euidente & tres-authentique, que Rome n'y a visé à autre chose qu'à l'establis-*



fement de sa grandeur. Au nom de Dieu, qu'elle opinion nos peres pouuoient-ils auoir de cette conduite ? Et que peuuent des enfans, qui sont en cette extremité, penser ou soupçonner de leur mere ? Sur tout il est souuerainement à considerer, que quand auec de si violentes presomptions d'empoisonnement, il y a encore des indices tres-preignans que la mere fausse la foy à son mary, & qu'elle se laisse cageoler & posseder à des gens qui la corrompent, il est certes naturel aux enfans de pouruoir par toutes voyes raisonnables à la conseruation de leur vie, mais il est de leur deuoir inuiolable d'empescher autant qu'il leur est possible, le des-honneur de leur pere, & le diffame de sa maison. Partant puis que ceux qui nous ont deuancez en nostre profession ont eu cette creance, & si profondement empreinte, & si parfaitement bien fondée, qu'en l'Eglise Romaine non seulement ils couroient risque ineuitable de leur salut, mais qu'elle se laissoit aller à des seruices religieux enuers les creatures, qui sont dans la Religion la mesme chose que l'adultere est au mariage, il n'y a personne si déraisonnable qui ne les exempte de blasme s'ils ont tasché



de remedier à l'un & l'autre de ces maux. Pour ce qui regarde la separation d'avec elle, c'est bien certes vne chose qui semble aucunement scandaleuse, de voir des enfans abandonner la demeure de leur mere, pource qu'ils blasment sa façon de viure; & qu'ils disent hautement qu'ils ne s'y trouuent pas en seureté. Mais quoy? Pour demeurer dans les mesmes comparaisons dont nous nous sommes seruis, ie fais toute personne raisonnable iuge de cette action. Nos ayeuls estoient dans la maison de leur mere à table avec elle & avec les autres enfans; ils se sont apperceus qu'on ne leur seruoit sinon des viandes dangereuses, & ont aduerty & leur mere & leurs freres de s'en abstenir, de peur de quelque funeste accident. Au lieu de faire profit de cet aduertissement, on les a premieremēt estimez desinsensez. Puis quād eux-mesmes les premiers, afin d'en donner l'exemple, ont voulu s'en abstenir, & la mere, & les autres, apres diuerses paroles outrageuses & iniurieuses, leur ont jetté les flambeaux & les assiettes à la teste avec quelque espece de fureur. Ils se sont retirez doucement, & pour ne mourir pas de faim, ils ont dressé vne table à part dans

la mesme chambre de leur mere, ou au moins dans la court de sa maison : Car au commencement nos peres prescherent en diuers lieux dans les nefz des mesmes Eglises, où le seruice de la Religion Romaine se faisoit. Aux lieux où on ne leur permettoit pas de se seruir des mesmes Temples à des heures differentes, ils preschoient dans les carrefours, ou deffous les Halles des villes, & par tout ailleurs où on leur en donnoit la commodité. Là on ne les a pas encore voulu souffrir, & leur mere a premierement fait des proclamations violentes, qu'elle ne les tiendrait pas pour ses enfans, & qu'elle leur defendoit l'entrée de sa maison, s'ils ne se laissoient nourrir, & s'ils ne luy permettoient de se gouverner entierement à sa fantaisie. Puis elle a armé ses autres enfans & ses seruiteurs à l'encontre d'eux, & les a esloignez d'elle tant qu'elle a peu à belles harquebusades : Car comment pouuons nous autrement appeller les Anathemes qu'elle a fulminez contre nous, les Canons qu'elle a dressez dedans ses Conciles, & les horribles persecutions dont elle a tasché de nous ruiner ? I'appelle donc icy Dieu & les hommes à iuger, à qui d'elle ou de nos

ayeuls doit estre donné ce blafme du schisme qui nous separe. Enfin , pour ce qui est des termes qu'on appelle scandaleux & iniurieux dont on se plaint que nous l'auons diffamée , à la verité si nous n'eussions deu auoir aucuns autres esgards sinon ceux de la retenue des enfans , & de leur soin à couvrir les defauts de ceux qui les ont engendrez, le silence nous eust esté plus conuenable , que les bruits & les vacarmes qui naissent de ces contestations. Mais nous auons deu auoir en singuliere recommandation le salut de tous les Chrestiens , & n'auons peu le leur procurer sinon en disant ouuertemēt la verité. Comment pouuions nous les retirer de l'égarement de ses erreurs , de la tyrannie de son gouuernement , & du seruice ou qu'elle souffre, ou qu'elle veut que l'on rende aux creatures , sinon en nommant les choses par leur nom ? Et veu qu'encore auec toute la vehemence des paroles qu'on peut employer en telles occasions , les hommes sont naturellement si attachez aux creances dont ils sont imbus de longue main, qu'on a toutes les peines du monde à les en déprendre , n'eust-ce pas esté trahir la cause de Dieu & leur salut , si par complai-

sance & par dissimulation, nous leur eussions caché le peril où ils estoient, & le vice de leurs creances ? Nous auons deu tâcher à reformer l'Eglise Romaine mesme, & à la ramener à meilleur sens, & n'auons peu le faire autrement sinon en parlant à elle franchement, & en luy découurant les manquemens dans lesquels elle estoit tombée. Et comme quand le Prophete Ieremie dit que luy & ses compagnons ont essayé de medeciner cette grande Metropolitaine des Chaldeens, il a voulu donner à entendre qu'ils luy ont monsté ses playes, afin de l'induire, s'il estoit possible, à receuoir les remedes dont elle auoit besoin ; nous n'auons peu nous mettre en deuoir de guerir celle qui se pretend estre la souueraine de tous les Chrestiens, que nous ne luy missions tout à nud deuant les yeux les vlcères dont elle est gastée. Mais nous prions ces Chrestiens de considerer que s'il y a quelque vehemence en nostre procedé, & quelque chose de tranchant en nos expressions, c'est à l'Eglise de Rome, qui resiste à sa guerison, & non à eux que nous en voulons, & que nous n'auons autre passion contr'eux, sinon vne incomparable ardeur d'affection de les détacher.



d'auec elle : Car ce n'est pas sans vne douleur incroyable, & que nous ne pouuons assez exprimer, que les voyant communiquer à ses pechez, nous les voyons aussi dans le peril de participer à ses playes. Comme ce n'est pas non plus sans quelque admiration de ses appas, & de la force de ses charmes, qu'estant de toutes les societez Chrestiennes celle parmy laquelle le Christianisme s'est le plus corrompu en toutes façons, & qui par consequent merite le moins qu'on respecte sa communion, les autres Eglises pourtant, & la Gallicane notamment, qui s'est tousiours le plus vigoureusement opposée à son ambition, est si scrupuleuse en cét esgard, qu'elle penseroit s'estre separée de Christ, si elle auoit rompu auec Rome. Qu'auons nous à faire d'estre Romains pour estre Chrestiens? Le Christianisme n'a-t'il pas esté salutaire & en Ierusalem, & en Antioche, & en diuers endroits de l'Orient, auant que Rome en eust ouy parler? Et depuis que Rome en a ouy parler, où sont dans les Epistres de S. Paul, ou dans les autres escrits du Nouveau Testament, les traces qu'il fallust necessairement entretenir communion auec elle pour iouir de l'esperance de la gloire?



Sainct Pierre mesme nous parle-t'il d'autre chose que de la foy en la Croix de Christ, & de la vraye sanctification, pour meriter le nom de Chrestiens? Paroist-il en ses, escrits seulement vne ombre d'enseignement, ie ne diray pas qu'il ait estably l'Euesque de Rome son successeur en son autorité, mais qu'il ait desiré qu'on tint sa communion plus necessaire à salut, que celle des autres Apostres? Enfin, en cette Eglise de Rome; le vray objet de nostre indignation est celuy de qui nous auons cette opinion, comme ie disois cy-dessus, qu'il l'a corrompuë, & qui sous le nom de Dieu en terre, semble se vouloir mettre en la place de nostre Pere qui est aux Cieux. Si donc elle auoit resolu de faire diuorce avec luy, & de se remettre en cet estat de pureté auquel elle estoit auparavant, nous oublierions volontiers tout le passé, & ne ferions point de difficulté de nous reünir avec elle. Si mesmes elle ne se contentoit pas que nostre Eglise la recognust pour sa sœur, comme elle a fait celle d'Angleterre, & d'Alemagne, & des Pays-bas, d'autant qu'elle s'imagine que c'est de Rome que l'Euangile est paruenue iusques à nous, nous luy donnerions

telz titres qu'elle voudroit, pour auoir paix avec elle; car quelque droit d'aineffe qu'elle pretendist entre fes sœurs, ou de quelque autre qualité qu'elle voulust qu'on l'honorast, nous supporterions doucement ce petit reste de vanité, pourueu que cela n'allast point iusques à preiudicier à la gloire de nostre commun Seigneur & Maistre. Mais tandis que nous l'y voyons si fort interessé qu'il est, le respect que nous luy portons, & le soin que nous deuons auoir de nostre propre salut, nous est vne pleine & entiere iustification deuant les yeux de l'Vniuers, si nous ne portons pas plus auant les effets de nostre condescendance.

---

## SECTION VII.

*Qu'en ce que ceux de la Religion croient effectiuement, ils ne sont dignes de l'auersion de personne; au contraire, qu'ils doiuent estre tenus pour bons Chrestiens.*

**I**E n'ay donc plus sinon à représenter simplement ce que nous croyons, &

ce que nous faisons en la communion Reformée; à ce que ceux qui n'en ont pas la cognoissance, en puissent estre informez, & qu'ils iugent par là ce qu'on doit estimer de nous. Peut-estre qu'il ne seroit pas absolument necessaire que ie m'arrestasse icy bien particulièrement: pource que nostre Confession de Foy, & la Liturgie de nos Eglises peut en instruire tout le monde. Neantmoins, pour ne renvoyer point mon Lecteur ailleurs, & pource qu'en nostre Confession de Foy nous ne nous sommes pas contentez de mettre les articles positifs de nostre creance, nous y auons aussi meslé ceux que nous ne receuons pas; afin qu'on voye nostre Religion tout à nud, & que sans preoccupation l'on puisse d'autant mieux iuger de son excellence, i'extrairay de cette commune declaration de nostre doctrine, ce qu'effectiue-ment nous croyons, sans y rien adjoûter de ce que nous auons rejeté.

Dés aussi-tost donc que nous commençâmes à paroistre en ce Royaume, nous declarâmes publiquemēt que nous croyōs qu'il y a vn seul Dieu, qui dans l'immensité & simplicité inenarrable de son essence spirituelle, & eternelle, & incomprehen-

fible en toutes manieres, comprend toutes fortes de vertus, de Bonté, de Justice, de Sagesse, de Misericorde, avec vne Puissance infinie, en vne si eminente perfection, qu'il surpasse infiniment la portée de l'esprit des hommes, & de l'intelligence des Anges mesmes. Cela posé pour fondement de nostre creance, nous adjoustames que Dieu nous a manifesté cette connoissance de son estre par deux voyes : à sçauoir par l'ouurage du Monde & de ses parties, conjointement avec la Prouidence qui les conserue & qui les gouuerne : & par les reuelations de sa Parole, qu'il nous a laissée par escrit. Et chacun sçait, sans que i'en fasse le catalogue, que nous auons reconnu pour parties de cette diuine Parole, dans le Nouveau Testament tout ce qui a tousiours esté reconnu pour tel par les Chrestiens, & dans le Vieil, tout ce qui est dans le Canon des Hebreux, & que l'Eglise Iudaïque a crû estre d'origine celeste. Or bien que nous parlions ainsi, si est-ce que nous ne croyons pas que ces liures soient diuins pource seulement que ç'a tousiours esté le consentement vnanime de l'Eglise, & que tous les Chrestiens en sont d'accord ; car si nous n'auions autre  
fonde-

fondement de nostre foy, elle seroit appuyée sur le tesmoignage des hommes, qui s'accordent bien aussi quelquesfois à recevoir ce qui est faux. Mais comme ainsi soit que ces liures ne peuvent estre diuins, & procedez de l'Esprit de Dieu, qu'ils ne portent vne infinité de marques de leur origine, chaque effect ayant touïours des marques indubitables de sa cause, Dieu par vne secrette & interieure operation de son Esprit, ouure tellement les yeux de nos entendemens, qu'il les rend capables de recognoistre ces caracteres de la Diuinité, & nous fait discerner ces liures d'auec tous les autres escrits purement humains, de quelque nature qu'ils soient: de sorte que nous les receuons auec vne persuasion pleine & entiere pour la regle tres-certaine & tres-parfaite de nostre foy, & pour l'instrument efficace par lequel il a pleu à Dieu nous reueler sa cognoissance. Car quant à ce qui est du monde & de ses parties, & de toutes les œuures de la diuine Prouidence, la cognoissance qu'on en peut recueillir a cela de particulier, qu'elle est exposée aux yeux & aux esprits de toutes les Nations, & de tous les hommes de la terre, en quelque lieu qu'ils



soient espars. De façon qu'il n'y en a aucun, s'il y vouloit vser de son entendement comme il faut, qui n'y peust recognoistre que Dieu est vne nature telle que ie l'ay descrite au commencement, & qui par consequent ne peust estre induit par là à luy rendre l'honneur, le seruice, & les actions de graces, auxquelles la cognoissance de ces vertus, & les bien-faits que les hommes en ont receus, inuitent naturellement. Mais pour ce qui est de la reuelation de la Parole, qui est contenuë en ces liures, elle a cét aduantage qu'elle est incomparablement plus claire & plus distincte, & qu'elle nous apprend pour nostre salut vne infinité de choses qui ne nous peuuent estre enseignées par la contemplation de l'Vniuers. Car elle nous descouure premierement qu'en cette souveraine Diuinité, que sa nature, & la creation du monde nous monstre clairement ne pouuoir estre qu'une, il y a neantmoins trois personnes, qui y subsistent distinctement: c'est à sçauoir le Pere, que nous recognoissons estre la premiere cause, le principe, & l'origine de toutes choses: le Fils, qui est sa Parole, & sa Sapience eternelle: & le S. Esprit, qui est sa vertu, son

efficace, & sa puissance, qui execute tous les conseils que le Pere a formez par sa Sapien-  
ce, qui est son Fils. Que le Fils est eternel-  
lement engendré du Pere; que le S.  
Esprit procede eternellement du Pere &  
du Fils, & qu'encore qu'ils n'ayent qu'une  
mesme essence, si est-ce que leurs Person-  
nes ne sont point confusées entr'elles, &  
gardent une eternelle & inuiolable di-  
stinction. En un mot, tout ce que les an-  
ciens Peres, comme S. Hilaire, S. Atha-  
nase, S. Ambroise, & S. Cyrille en ont dit,  
tout ce que les anciens Conciles en ont  
decidé, pource que nous le voyons tres-  
conforme à cette parole de Dieu, nous le  
tenons pour tres-veritable & tres-ortho-  
doxe. En apres, le Monde, si nous y eus-  
sions esté bien attentifs, nous eust bien  
peu apprendre que c'est ce grand Dieu qui  
l'a créé: Car les cieux & la terre rendent  
assez de tesmoignages à leur auteur, si  
les hommes apportoit à les contempler  
une assez pure & assez lumineuse intelli-  
gence. Mais pource que le peché nous a  
aveuglez, les uns ont absolument ignoré  
cette verité, les autres ne l'ont cognüe que  
tres-imparfaitement, & de ce qu'ils en ont  
cognu, ils n'en ont point eu de persuasion

finon douteuse & chancellante, iusques à ce que cette diuine Parole nous en a tres-pleinement & tres-certainement informez. Car c'est en elle qu'il nous est recité, comment ce Dieu, lequel s'est manifesté à nous en trois personnes, a au commencement formé les cieux & la terre, & toutes les choses qui y sont; tant celles qui n'ont que l'estre, ou la vie, ou le sentiment seulement, que celles qui sont douées de raison, & mesmes celles qui estans spirituelles & inuisibles de leur nature, ont vn estre qui consiste quasi tout en intelligence: Car c'est de ses enseignemens que nous recueillons certainement qu'il y a des Anges & des Demons, qui sont tous esgalement créez de la main de Dieu, mais dont les vns ont abandonné leur origine par la reuolte, & sont deuenus ennemis de leur authœur & de tout bien; les autres, qui ont persisté en leur integrité, sont employez à l'execution des volontez de leur Createur, notamment en ce qui concerne les hommes, & plus particulièrement ceux d'entr'eux pour lesquels il a de plus tendres & de plus vehementes affections. Et quoy que la raison nous deust assez aduertir que Dieu n'a

point créé ce grand ouurage du monde pour l'abandonner, si auons nous eu besoin que cette parole nous esclaircist cette verité, & nous affermist en cette creance, que toutes choses sont maintenuës, conseruées, regies, & gouvernées par la Prouidence de leur Createur. Tellement que dans les causes naturelles, & dans les choses qu'on appelle communément contingentes, il n'arriue aucun euenement qu'il n'ait eternellement preueu & preordonné en sa Sapience, & sur lequel il n'ait presidé par la conduite & par l'efficace de sa main. Et bien qu'il semble que les hommes & les Anges ayent plus de liberté en la production de leurs actions, que n'ont toutes les autres creatures, & que de fait ils s'y portent par les mouuemens de l'intelligence, & les executent volontairement, neantmoins cette liberté s'accorde tellement avec la Prouidence diuine, que tout ce qui depend des causes intelligentes, est soumis à son gouvernement. Il est vray que les meschans hommes & les demons semblent auoir voulu se soustraire de son Empire; mais si sont-ils pourtant sujets à sa volonté. De sorte qu'ils n'entreprennent rien que comme il le permet, & n'execu-



tent rien finon comme il leur en donne la puissance; & sur tout il a vn soin special de veiller sur leurs actions, en ce qui concerne ceux d'entre les hommes qu'il aime particulièrement. Car pource que ces meschantes creatures les haïssent à merueille, & machinent toutes sortes de maux à l'encontre d'eux, il est necessaire qu'il pouruoye à leur protection d'une façon speciale, autrement ils auroient trop à souffrir de la part de leurs aduersaires, veu qu'ils sont si enuenimez, en si grand nombre, & si puissans. Cette mesme Parole nous instruit encor, & de la condition de nostre premiere origine, & de la façon de laquelle nous en sommes descheus, & de l'estat auquel nous nous trouuons maintenant naturellement par cette cheute. Car c'est elle qui nous raconte comment Dieu auoit créé l'homme en vn estat d'integrité, & de felicité excellente, & de tout point accomplie, autant que la condition de la Nature le pouuoit porter. C'est elle qui nous recite comment l'homme en transgressant volontairement la loy que son Createur luy auoit donnée, s'est rendu indigne de la felicité en laquelle il auoit esté mis,



& s'est luy mesme corrompu. De maniere qu'au lieu que Dieu luy auoit donné vne intelligence lumineuse, & remplie de la cognoissance de son auteur; & vne volonté toute encline à suiure les mouuemens de cette belle intelligence en toute pieté enuers Dieu, & en toute sorte de vertu; & finalement des appetits bien reglez, & parfaitement assujettits à l'empire de la raison: ses appetits ont par le peché secoué le ioug de la raison, & se sont emancipez d'une façon merueilleusement licentieuse; sa volonté est deuenue deprauée & portée à toute sorte de mal; & les tenebres ont tellement saisi son intelligence qu'elle n'a plus esté capable ny de gouuerner les appetits comme il faut, ny de tourner la volonté vers les objets bons & loüables, ny de iuger des choses conuenablement. Vray est qu'il semble que pour ce qui regarde les choses politiques & morales, il soit resté dans l'entendement de l'homme quelque faculté de discerner entre le bien & le mal. D'où vient qu'il n'y a iamais eu de nation dessus la terre, pour si barbare qu'elle fust, parmi laquelle il ne soit demeuré quelque trace de l'estime de la iustice, de l'honneur

steté, & de la vertu. Mais outre que c'est encore vn effect de la diuine Prouidence qui a voulu conseruer ce petit reste de cognoissance parmy les hommes, afin de seruir de lien à leur société; lors qu'il est question de Dieu, & de le cognoistre comme il faut, & de luy rendre le seruice qui conuient à l'excellence de sa nature, ils y sont entierement auégles, si Dieu ne les y adresse & ne les illumine pour cét effect extraordinairement. Ainsi, encore que l'homme soit libre, en ce qu'il est porté à ses actions par le mouuement de sa volonté, & que sa volonté y est portée pource que son entendemēt discourt & raisonne sur les choses qui se presentent pour iuger de leurs qualitez, il est neantmoins esclaué, en ce que sa malice naturelle est si grande, & qu'elle a tellement saisi toutes les puissances de son esprit, que si Dieu par la vertu du sien ne le deliure de cette seruitude volontaire, il ne iuge point, & ne peut iuger des choses autrement que mal, & par consequent il ne fait que mal, & ne peut rien sinon mal-faire. Or pource que tous les hommes sont descendus de ce premier, qui s'est ainsi mal-heureusement cor-

rompu , si nous eussions retenu la cognoissance de nostre origine , elle nous eust pû apprendre , outre les autres preuues que nous en auions en nous mesmes, que nostre premier pere a prouigné cette sienne corruption en nous tous. Mais pour ce que cét aueuglement naturel , qui nous empesche de iuger de toutes autres choses , nous a aussi osté la cognoissance de nostre principe & de nous-mesmes , il a fallu que cette mesme Parole nous apprist que tous les hommes du monde en sont naturellement gastez. Tellement qu'il n'y a aucun des descendans d'Adam , en qui par la generation des peres aux enfans, cette corrupcion ne se soit écoulée ; car ce que les Pelagiens ont voulu dire , que nous ne sommes mauuais que par imitation , est vn pernicieux erreur , que nous detestons : nous sommes aussi outre cela mauuais de nature , de quelque façon que cette tache originelle se prouigne en nous. Cognoissans comme nous faisons si certainement le mal , nous ne nous donnons pas beaucoup de peine de sçauoir la façon comment il se perpetuë au monde. Et ce mal est si grand , que quand nous n'en commettrions point d'autre , il nous

rend coupables deuant le iugement de Dieu, & nous assujettit à la mort. Bien est vray que Dieu le nous pardonne, & qu'il nous donne le seau de cette remission par le Baptisme; mais neantmoins il garde tousiours sa nature; car pour n'estre pas puny, vn peché ne laisse pas d'estre peché pourtant. Et qu'il garde tousiours sa nature, il en appert par experience; car c'est de là, comme d'une source inespuisable, que viennent toutes les mauuaises passions, toutes les mauuaises pensées, toutes les mauuaises actions, & toutes les mauuaises paroles, par lesquelles les hommes attirent dessus eux ire & malediction. Mais bien que la Parole de Dieu soit admirable en la reuelation qu'elle nous donne de toutes ces belles cognoissances, si ne l'est-elle point tant qu'en la declaration qu'elle nous a faite du moyen par lequel Dieu nous retire de cette malediction, & des motifs qui l'ont porté à nous en garantir; car pour ce qui est des motifs, elle nous enseigne qu'outre cette charité innarrable qu'il a tesmoigné enuers le monde, en ce que sans y estre incité d'aucune autre cause, que de sa seule bonne volonté, il a voulu donner son Fils vnique pour

l'abandonner à la mort, afin que quiconque croiroit en luy, fust sauué par luy, nous auons encore en elle la reuelation d'un myſtere que nous ne pouuions iamais apprendre d'ailleurs. C'est que Dieu, meu de ſa pure volonté, & ſans y eſtre inuité par aucune bonne qualité qui fuſt en l'un pluſtoſt qu'en l'autre d'entre les hommes, à de toute éternité, & dans le conſeil qu'il en a formé deuant la fondation du monde, mis de la diſtinction entre eux; car il a eu le ſalut des vns ſeulement à cœur, qu'il les a mis à part des autres, afin de leur donner de croire en ce Redempteur, & de les amener par ce moyen indubitablement à la jouiſſance de ſa félicité éternelle. Au lieu qu'il a laïſſé les autres en arriere pour les abandonner à eux-mêmes, & à l'aveuglement de leurs cœurs. Leur aveuglement donc eſtant tel que nous l'auons cy-deſſus représenté, il eſt abſolument inéuiſtable qu'ils ne croiront point en l'Euangile, & ainſi qu'ils demeureront en leur naturelle perdition. De ſorte que comme ſa miſericorde paroît merueilleuſement riche en la diſpenſation de laquelle il a vſé enuers les vns, cette ſeuérité dont il a vſé enuers les autres,



bien qu'elle ne soit nullement iniuste, pour ce qu'ils ont bien merité d'estre ainsi abandonnez, donne de l'estonnement pourtant, & est enfin suiuite de l'execution d'une ire & d'une vengeance espouuantable. Et l'experience nous ratifie ce que la Parole de Dieu nous en apprend; car comme ie l'ay dit ailleurs, puis que les vns croient en Iesus-Christ, & les autres n'y croient pas, & que nul n'y croid sinon par la grace que Dieu luy en donne, il faut necessairement qu'il ait mis distinction entre les hommes en cet esgard, & que ce que nous en voyons arriuer maintenant, soit l'effet de la resolution qu'il en auoit prise auant la fondation du monde. Doctrine à laquelle le Cardinal Bellarmin, & les autres principaux Docteurs de l'Eglise Romaine consentent. Quant à ce qui est du moyen que Dieu a suiuy pour nous tirer de cette condamnation, qui est-ce qui peut porter le nom de Chrestien, s'il ne croid ce que nos Eglises en enseignent? Elles disent premierement qu'en Iesus-Christ Dieu nous a offert & communiqué tout ce qui nous est necessaire pour nostre salut; en ce qu'il a esté fait sapience, pour nous reueler toutes les lumieres & toutes

les cognoissances qui concernoient la gloire de Dieu & nostre souueraine felicité : & iustice, pour nous faire absoudre deuant le iugement de Dieu par le moyen de sa satisfaction : & sanctification, pour nous communiquer de son Esprit, & reparrer en nous l'image de la saincteté du Pere celeste : & redemption, pour ce qu'il nous retirera enfin de la main de tous nos ennemis, & de celle de la mort mesme. Tellemēt que qui s'adresse à lui, il y trouue tout ce qui luy est nécessaire pour estre sauué ; & qui se destourne de luy, renonce à la misericorde de Dieu, laquelle il luy a plû de reueler en son Vnique. Elles adjouſtent qu'encore que ce Iesus-Christ soit la sagesse de Dieu, & son Fils eternal, & Dieu beny és siecles des siecles, si est-ce qu'il a vestu nostre chair, & joint en vne mesme personne en luy la nature humaine avec la diuine. Par ce moyen non seulement quant au corps il a esté fait semblables à nous en toutes infirmitéz, mais aussi quant à l'ame il n'a point differé de nous en toutes sortes de passions, sinon entant qu'en l'un & en l'autre il a esté parfaitement exempt & des pechez que nous y commettons, & du vice qui y est inherent

de nostre nature. Mais quoy que c'en soit, il a esté homme veritablement, & comme il estoit descendu de la race de Daud & d'Abraham, ainsi que les saincts Oracles l'auoient promis, il a eu vne nature toute semblable à la leur, mise à part la corruption laquelle y est suruenüe. Et s'il y a eu, ou entre les anciens, ou entre les modernes, quelques gens qui en ayent crû autrement, nos Eglises ont tousiours eu leurs erreurs en vne abomination extreme. Et afin que personne ne se trompast en l'intelligence de leur sentiment, elles en ont donné par tout vne interpretation & vne declaratiõ tres-expressse; car elles ont toujours crû & toujours dit, que ces deux natures, diuine & humaine, sont tellement conjointes en vne mesme personne en Iesus-Christ, qu'encore qu'elles soient inseparablement vnies, chacune d'elles y garde distinctement ses proprietéz. Comme donc la nature diuine y demeure increée; infinie, & immense tout a fait; la nature humaine y demeure limitée des bornes qui luy sont propres comme aux autres hommes, & reuestuë de sa figure, & conformée en sa stature ainsi que les autres corps humains. Vray est qu'en la resurre-

tion le corps de Nostre Seigneur Iesus a acquis des qualitez fort differentes de celles qu'il auoit en l'infirmité de sa chair: car il est deuenu incorruptible, & immortel: mais neantmoins il a toujours cōserué la nature d'un vray corps, & la possède là haut en la gloire des lieux celestes. Or bien qu'il nous reuienne vne infinité d'auantages & d'incomparables vtilitez, de l'enuoy de Nostre Seigneur icy bas, & qu'on y puisse remarquer vne infinité de caracteres admirables des vertus que Dieu y a voulu decouurir, le principal sujet pourtant de tout ce merueilleux mystere, a esté que Dieu nous a voulu monstrier son inestimable charité, & son amour inenarrable enuers nous, en ce qu'il la liuré volontairement à la mort, afin d'y satisfaire pour nos pechez, & qu'il la ressuscité d'entre les morts, afin de nous attester que la satisfaction estoit parfaite, & qu'elle auoit esté acceptée de luy, puis qu'il libereroit nostre caution. De sorte que par ce moyen nous a esté acquise, & la iustice en vertu de laquelle nous comparoissions hardiment deuant luy en iugement, & la vie eternelle, qui est le but de nos souhaits & l'objet de nos esperances. Pour nous obtenir cela,



nous croyons que Nostre Seigneur Iesus a offert à Dieu son pere vn seul sacrifice en la Croix, par le moyen duquel nous sommes reconciliez à Dieu, & tenus pour iustes en sa presence. Et cela estoit absolument necessaire pour nous faire obtenir la vie à laquelle nous aspirons; car nous ne l'obtenons sinon comme vn heritage, & en qualité d'enfans: & ne sommes enfans de Dieu sinon par son adoption. Or ne pouuons nous estre participans de son adoption, que premierement il ne nous pardonnast & n'enseuelist toutes nos offenses. Pour ce donc que nos fautes sont des debtes & des crimes, comme ie l'ay dit cy-deuant, & que pour des debtes & des crimes il faut vne satisfaction & vn payement, qui soit proportionné à l'obligation & à la peine que la loy denonce, comme il n'y auoit aucun qui peust faire cela parfaitement sinon le Seigneur, aussi l'a t-il si parfaitement accomply, qu'il n'est desormais plus de besoin d'autre satisfaction ny d'autres souffrances. Or comme qui a payé, est quitte de son obligation, & qui pareillement a souffert, est quitte de l'obligation à la vengeance, soit qu'il l'ait fait pour soy-mesme, ou par l'entremise de sa caution



caution, Nostre Seigneur ayant ainsi & payé & satisfait pleinement pour nous, nous fondons là dessus la pretention que nous auons d'estre absous & iustifiez de Dieu, qui à cette occasion ne nous punit pas, mais nous remet gratuitement toutes nos debtes & tous nos crimes; car puis qu'il est entierement satisfait en Nostre Seigneur, il n'a plus rien à demander à nos personnes. Pour cela nous estimons nous souuerainement heureux, ainsi qu'a fait Daud autrefois, de ce que n'ayans rien en nous-mesmes dequoy contenter la iustice de Dieu, ny en merites ny en satisfactions, nous auons tout en Iesus-Christ, qui par cette sienne satisfaction nous a acquis la remission de nos pechez, & nous a esleuez à l'esperance certaine de la felicité eternelle. Ainsi nous jouïssons par la grace de Dieu de paix & de repos en nos cœurs, au lieu qu'autrement nous serions tousiours agitez d'apprehensions, si nous auions à respondre de nous-mesmes, & sur l'asseurance de nostre propre iustice, à son iugement. C'est aussi en cette mesme confiance, que nous inuoquons Dieu comme nostre Pere, & que nous sommes assurez d'estre exaucez en tout ce que nous de-

manderons au Nom de ce grand Mediateur ; car puis qu'il est nostre Moyenneur, il rendra nos prieres agreables à son Pere ; puis qu'il est celuy auquel nous auons esté adoptez, il fera que nos supplications seront receuës de Dieu, comme venant de ses chers enfans, & puis qu'il est nostre chef, & nous ses membres, il ne se peut que la faueur que le Pere celeste luy porte, ne se respande dessus nous, & dessus les prieres que nous luy presentons par luy. Au reste, comme ainsi soit que les promesses de toutes ces graces, qui nous sont faites en l'Euangile, soient vniuerselles sous la condition de la Foy, selon ce qu'il est dit, qu'il a souffert pour nous acquerir salut, afin que quiconque croira en luy ne perisse point, mais qu'il ait la vie eternelle, nous nous rendons ces promesses particulieres, & les nous approprions par la Foy. De sorte qu'au lieu que les autres n'en sentent aucun effet, pource qu'ils n'y croient pas, nous en sentons quant à nous, pource que nous les acceptons. Et comme en les acceptant de nostre costé nous demeurons persuadez que Dieu ne manquera pas d'excuter ce que de sa bouche sacrée il a promis : Dieu de sa part les execute effectiue-

ment en nostre esgard , & nous rend participans de cette iustice de son Fils en la remission de nos pechez , iusques à ce qu'il nous introduise en la jouïssance de la vie. Cependant ce que nous croyons, nous ne le nous attribuons pas à nous-mesmes ; mais nous recognoissons le tenir tout de la grace de Dieu ; car les promesses, comme i'ay dit cy-dessus, sont offertes generalement à tous, mais la grace de les recevoir est vn don gratuit & particulier que Dieu donne à qui bon luy semble. Tellement qu'au lieu que les vns ont seulement cette obligation à Dieu en ce qui regarde leur salut, qu'il leur a esté offert de sa part dans les promesses de l'Evangile de Christ, les autres luy sont obligez au double, en ce qu'en la distribution de la grace par laquelle on les embrasse, ils ont esté prefez. Et l'obligation qu'ils en ont à Dieu est d'autant plus grande, que cette illumination interieure & secrette de l'esprit de Dieu, par laquelle ils sont rendus capables de recognoistre la verité de l'Evangile du Sauueur, ne se desploye pas en eux pour vne fois seulement, comme si Dieu les vouloit seulement mettre dans le chemin du salut, pour les laisser là puis apres à leur

propre conduite. Ce qu'il commence en eux, il le continuë & le paracheue aussi. Et de fait comme luy seul en a pû donner les commencemens, aussi peut-il seul donner la perfection à son ouurage. Et pour ce que la promesse de l'Evangile ne regarde pas seulement la remission des pechez, mais aussi la vraye sanctification dont le saint Esprit est auteur, quand nous disons que nous receuons cette promesse par foy, nous donnons assez à entendre que la foy ne nous met pas seulement en la possession de cette remission, mais aussi nous obtient l'Esprit de sanctification qui nous regenere. Tellement qu'outre ce que la foy d'elle-mesme excite l'affection de bien & saintement viure, en ce que nos entendemens ne peuuent estre illuminez d'une si belle verité, que nos affections ne s'enflamment de son amour, & ne se conforment à sa sainteté; elle produit encore la vraye regeneration en nous, en ce qu'ayant par sa grace crû à la promesse de Dieu, il nous donne plus liberalement son S. Esprit, pour nous reformer à son image. Et pour ce que c'est en cela que consiste le suc & la moüelle de la doctrine de l'Evangile, & quant & quant le corps & la verité



de ce qui estoit autresfois representé dans les figures de la Loy, nous ne consideront plus les ceremonies que comme des choses passées, & ne nous seruons de la Loy morale mesme, sinon pour estre la regle de nostre conduite & de nos deportemens.

Pour ce que ce grand salut que nous auons en Iesus-Christ nous est communiqué par l'Euangile, & ratifié par les Sacremens, & qu'au reste ny l'Euangile ne nous est presché, ny les Sacremens ne nous sont administrez, sinon par l'ordre de l'Eglise, tel qu'il a pleu à Dieu de l'establis, il est raisonnable que l'on sçache aussi ce que nous croyons de toutes ces choses, & que l'on voye combien la créance que nous en auons est non seulement innocente, mais conforme à la verité diuine, & digne de l'approbation de tous les Chrestiens. Afin donc de commencer par là, nous croyons que Dieu a estably vn certain ordre en son Eglise, selon lequel les vns sont ordonnez pour estre Pasteurs & Docteurs, & les autres pour receuoir leurs instructions, & que cet ordre doit estre sacré & inuiolable. En telle maniere que les vns, que Dieu a doiez des dons necessaires pour cela,



soient appellez à ce ministere par des voyes conuenables, & qu'ils l'exercent en toute fidelité, & que les autres escoutent avec respect & reuerence, & fassent profit de leurs enseignemens. Ce n'est pas que s'il eust pleu à Dieu choisir quelqu'autre voye de nous enseigner ce qui est de nostre salut, il ne l'eust peu faire. Ny sa Sapiencc, ny sa Puissance n'estoient pas tellement astreintes & determinées à ce moyen-là, qu'il fust absolument ineuitable. Mais l'ayant iugé le plus propre, & le plus accommodé à la nature de l'homme, ainsi qu'il a fait, c'est luy resister que de ne s'y assujettir pas, & ruiner l'edification de ses enfans, que de vouloir abolir vne si belle discipline. Et de là s'ensuit necessairement qu'encore que chacun doive auoir le soin de s'instruire en particulier en la cognoissance de la verité, & que chaque pere de famille soit particulierement obligé à l'instruction de ceux qui sont dessous son gouuernement, neantmoins il y doit auoir des assemblées publiques, où tout le monde soit endoctriné en commun par ceux à qui Dieu en a commis la charge, tellement que ceux qui se separerent de ces assemblées, contrarient à

l'ordonnance de Dieu, se soustrayent du ioug de nostre Seigneur Iesus-Christ, & rompent l'vnité de son Eglise. Et cela a esté iugé si necessaire par les Apostres & & par les anciens Chrestiens, qu'ils l'ont tousiours pratiqué nonobstant les Edicts des Empereurs, & toutes les persecutions qui leur ont esté faites pour les en empescher; car pource qu'ils ont crû que cela estoit de l'institution de Dieu, ils ont estimé qu'il estoit plus iuste & plus raisonnable d'obeir à Dieu qu'aux hommes. Or est-il bien aisé de recueillir de ce que i'ay dit cy-dessus, que c'est que nous croyons de la nature de l'Eglise; car si vous considerez les fidelles entant qu'ils se trouuent actuellement ensemble pour oüir la predication de la Parole de Dieu, & vaquer aux exercices de pieté, l'Eglise est l'assemblée de ceux qui conuiennent en mesme lieu à cette intention de tesmoigner la foy qu'ils ont en nostre Seigneur Iesus-Christ, & de s'auancer en sa cognoissance salutaire par l'oüie de la predication de sa Parole, & par la celebration de ses Sacremens, comme aussi pour prier Dieu, luy rendre actions de graces d'un commun consentement, & se fortifier de plus

en plus en l'esperance de la bien-heureuse immortalité : selon que nous auons tous besoin de faire progrès en toutes ces choses, iusques à ce que nous soyons paruenus à la perfection à laquelle nous aspirons. Et si vous les considerez separez, comme il n'est pas possible qu'ils vacquent tousiours ensemble à ces saints exercices, l'Eglise est la société de ceux qui entretiennent communion ensemble par vne mesme foy en Iesus-Christ, & par la participation à mesme esperance, & qui donnent des tesmoignages de cette communion où les occasions s'en presentent, par toutes les choses que ie viens de rapporter. Or quand nous composons ainsi l'Eglise de fideles, nous ne pretendons pas dire qu'il ne se mesle point parmy eux des gens qui ne meritent pas ce nom. Car il n'y a que trop d'hypocrites, qui pour quelques considerations demeurent exterieurement en cette société. Mais cela n'empesche pas que la société ne subsiste, & qu'elle ne doie estre nommée du nom d'Eglise, à cause que le nombre des vrais fidelles y est plus considerable & plus grand, & que la Religion qui les rend tels, est pratiquée comme il faut en toutes ses

parties. A la verité, où la Parole de Dieu n'est point preschée, où les Sacremens ne sont point administrez, où il n'y a point d'ordre estably pour le seruice de Dieu & pour la conduite de son peuple, on ne peut pas dire qu'il y ait aucune Eglise, quelle qu'elle soit. Où la parole de Dieu est preschée en quelque façon, mais mêlée des erreurs & des superstitions des hommes; où les Sacremens sont administrez, mais gastez & corrompus en diuerses manieres: où il y a quelque ordre pour la conduite de ceux qui sont profession du nom Chrestien, mais alteré & degeneré de l'institution du Sauueur du monde, il se peut faire qu'on donnera le nom d'Eglise à vne telle société, mais elle ne sera telle pourtant sinon à proportion de ce que toutes ces choses y seront ou pures ou contaminées. Car puis que ce sont ces choses - là qui à proprement parler, & constituent & marquent l'Eglise de Dieu, nulle société ne peut porter ce glorieux nom, sinon autant qu'elles s'y rencontrent. Et ce n'est pas sans raison que j'ay fait mention d'un ordre sous la conduite duquel l'Eglise soit gouvernée; car nous tenons cela pour certain, que c'est



vne chose necessaire à la subsistance de la vraye Eglise , qu'il y ait vne certaine police establie pour son administration , qui soit entierement conforme à l'institution de Iesus-Christ , ou au moins qui approche le plus que faire se peut de la pratique des saincts Apostres. C'est pourquoy outre les Pasteurs qui sont ordonnez pour instruire le peuple , & pour luy administrer les Sacremens , nous estimons qu'il faut qu'il y ait des Anciens & Surueillans , & des Diacres , dont la charge consiste principalement à remedier aux scandales qui peuuent arriuer par les mauuais deportemens des vicieux , à soulager les necessitez des pauvres , & servir à la consolation des affligez , à donner ordre que les assemblées se tiennent avec la decence conuenable , & sans tumulte ny confusion , & en vn mot , à servir à l'edification de tous , & à contribuer avec les Pasteurs à l'auancement de la doctrine du saint Euangile. Entre ces Anciens & ces Diacres , & les Pasteurs qui preschent la Parole & qui administrent les Sacremens , nous mettons vne notable differēce quant à l'ordre de leurs charges , & ne croyons pas qu'ils soiēt d'égale autorité en l'Eglise de Dieu.



Mais quant aux Pasteurs, nous estimons que leur charge les esgale, & ne reconnoissons point d'autre difference entre eux, sinon celle qu'il plaist à nostre Seigneur Iesus d'y mettre par la distinction de leurs dons. Car comme c'est luy qui est le Chef de son Eglise, & son souverain Pasteur, aussi est-ce luy qui orne de ses dons comme il luy plaist ceux qu'il employe en ce ministere. Mais tant y a que ny l'ordre de leurs charges, ny le lieu auquel ils sont establis, ne leur donne aucune prerogative, ny aucune domination les vns sur les autres entre nous. En quoy nous sçavons bien que tout le monde n'est pas de mesme sentiment avec nous. Mais puis que nous ne suivons cette esgalité sinon pour fuir l'ambition & la tyrannie, qui sont les pestes de l'Eglise de Dieu, il n'y a nulle apparence qu'on nous doive sçavoir mauvais gré d'une institution si conuenable à l'humilité, qui sied si bien à tous les Chrestiens, & notamment aux Ministres de l'Evangile. Quoy qu'il en soit, esgaux ou inegaux, que l'on constitue les Pasteurs, nous estimons que nul ne se doit ingerer de son propre mouvement en l'exercice de cette charge, mais que

ceux qui y seruent y doiuent estre legitime-  
ment appelez selon l'ordre de l'Eglise de  
Dieu. A la verité si quelque Chrestien de  
condition priuée s'estoit rencontré seul  
parmi des barbares, qu'il peust conuertir à  
la cognoissance de Iesus-Christ, nous esti-  
mons qu'il seroit assez autorisé par la  
necessité de la chose, par la charité enuers  
le prochain, par le zele de la gloire du  
Sauueur, & par la conduite de la proui-  
dence de son Pere, d'entreprendre d'y for-  
mer vne Eglise, & d'y faire les fonctions  
de Pasteur. Et le consentement de ceux  
qu'il auroit conuertis y suruenant, nous  
tiendrions sa vocation pour parfaite &  
pour authentique. Si puis apres il pouuoit  
auoir quelque communion avec vne au-  
tre Eglise, & estre confirmé en l'exercice  
de sa charge par ceux qui y auroient esté  
establis plus regulierement, assurement  
cela seruiroit à l'edification commune, &  
il a esté ainsi pratiqué entre les anciens  
Chrestiens. Mais si cela ne se pouuoit, com-  
me tout le monde est legitiment appel-  
lé par la regle de la charité, à sauuer son  
prochain d'un embrasement & d'un nau-  
frage, nous estimons qu'un tel en beau-  
coup plus forts termes auroit vne iuste vo-

cation à retirer les hommes de la malediction. Et n'y a rien au monde de si raisonnable. De mesmes, s'il estoit arriué à quelque Chrestien de condition priuée, de se trouuer en vne Eglise en laquelle le seruice de Dieu, la predication de la Parole, l'administration des Sacremens, & la conduite de l'ordre, fussent tellement corrompus d'idolatrie, d'heresie, de superstition, & de tyrannie, qu'il fust absolument impossible de faire son salut en cette communion, nous estimons que son deuoir seroit d'aduertir premierement ceux qui y porteroient la qualité de Pasteurs, d'y apporter la reformatiō necessaire, & de pouruoir à leur salut & à celui de leur troupeau. Si apres les en auoir auertis ils n'y vouloiēt pas cōsētir, nous tenons pour indubitable que plūstost que d'endurer la ruïne de la religion, la profanatiō de la gloire & de la verité de son Sauueur, & la perte du salut des hōmes, il deuroit en entreprendre la reformation de soy mesme, principalement si Dieu luy auoit donné les dons de cognoissance, d'éloquence, de prudence, & de zele pour cela. Car en vne necessité extraordinaire, & d'une telle importāce, l'ardeur du zele de l'entreprēdre, & les dons necessai-

res pour l'executer, sont vne marque assez authentique de la vocation de Dieu. Bien est vray que si les Ministres ordinaires y vouloient mettre la main, il ne s'y deuroit ingeter que conjointement avec eux & par leur association; pource qu'en tant qu'il se peut, il faut tousiours deferer à l'ordre des choses qui sont desia legitimement establies. Mais si les Ministres ordinaires ou negligeoient de le faire, ou s'y opposoient, aussi bien icy qu'en toute autre police, le salut du peuple est la souveraine loy. Où donc l'ordre public vient à manquer, la voix de la necessité est la voix de Dieu, qui appelle à la restauration de sa verité ceux à qui il a donné la faculté de la pouuoir deliurer de l'iniustice où les hommes la detiennent. Hors ces deux occasions, nous croyons qu'il faut tres-religieusement observer cette regle en ce qui est de l'establissement des Pasteurs, qu'on y suiue quelque ordre public, & que la mission de chacun soit ratifiée par de bons & authentiques témoignages. Quant à ce qui est de la Discipline par laquelle l'Eglise doit estre gouvernée, nous estimons que c'est aux Ministres de l'Euangile, conioinctement avec ceux que l'on a



choisis pour Surueillans , à en dresser les reglemens , en telle sorte qu'ils se conforment entierement à la Parole de Dieu , & qu'ils ne visent à autre chose qu'à l'edification commune. Il est vray qu'en telle nature de choses qui regardent la police exterieure de l'Eglise ; la parole de Dieu s'estant quelquesfois contentée de donner des regles generales , lesquelles il faut appliquer aux circonstances particulieres des choses , des personnes , & des temps ; & ces circonstances là n'estant pas semblables en tous lieux , & mesmes ne perseverant pas tōū jours en mesmes lieux en vn estat vniforme , il est aucunement ineuitable , & qu'entre diuerses Eglises il y ait quelque diuersité en cét esgard , & qu'en vne mesme Eglise quelquesfois on en varie la constitution selon les occurrences. Mais cela n'arriue sinon en choses legeres , & qui ne sont pas d'importance pour le salut : en celles qui sont de quelque consequence , on doit estre beaucoup plus exact à suiure ponctuellement ce que la Parole de Dieu en ordonne. Et d'autant qu'entre autres choses elle s'explique disertement en ce qui est de l'excommunication de ceux qui sont incorrigibles en



leurs vices, & opiniastrement refractaires à l'ordre de l'Eglise de Dieu, nous ne faisons nulle difficulté qu'il n'en faille user où l'occasion le requiert, en y observant toutes les precautions de prudence & de charité qu'il est possible. Car nostre Seigneur Iesus le nous a enjoint, quand il a donné à ses seruiteurs l'autorité d'appliquer la rigueur de ses chastimens selon les occurrences. Quant à ce qui est des Sacremens, nous croyons que Dieu les a adjoustez à la predication de sa Parole pour nous confirmer & ratifier de plus en plus la verité des promesses qu'il nous y fait. Car pource que nostre felicité despend de la persuasion que nous auons de la verité des promesses diuines, & que l'infirmité de nostre chair a besoin de beaucoup d'aydes pour les nous persuader, Dieu ne s'est pas contenté de les nous faire annoncer de viue voix, il nous en a encore voulu donner des gages & des assurances visibles. Et comme il se sert tellement de la predication de sa Parole, qu'il ne veut pas seulement que ce soit vn son exterieur qui batte les oreilles de nos corps, il l'accompagne de l'efficace de son Esprit, par le moyen de laquelle elle s'insinuë en nos  
ames:

ames: aussi quand il nous fait administrer les Sacremens , il ne se contente pas de faire que ce soient seulement des signes extérieurs qui se presentent à nos yeux, il y déploye la mesme vertu de son Esprit, pour les rendre efficaces en nos consciences. Mais comme c'est de l'efficace de l'Esprit qui accompagne l'un & l'autre que toute leur vertu depend, aussi n'ont-ils autre vertu ny l'un ny l'autre non plus, sinon de nous amener à Iesus-Christ , seul auteur de nostre salut, & le seul objet de la veneration & de la deuotion de nos ames. Nous sçauons qu'en l'Eglise Romaine on croit qu'il y a sept Sacremens, & nostre intention n'est pas de disputer contre cette opinion maintenant. En quelque nombre que les Catholiques les reçoient, tant y a qu'ils ne nous contestent pas que ceux que nous croyons estre tels, ne le soient véritablement, à sçauoir le Baptisme la sainte Cène, qu'on nomme autrement l'Eucharistie. Et bien qu'à l'esgard de ces saintes ceremonies ils tiennent beaucoup de choses que nous ne tenons pas quant à nous, si est-ce que pour ce que nous en croyons, ils ne sçauroient y rien trouuer à reprendre. Car quant à ce qui est du Baptisme, nous

croyons avec eux qu'il nous est donné pour gage que Dieu nous adopte en son Fils, pour estre du nombre de ses enfans: & que comme l'eau est propre pour nettoyer les souilleures de nos corps, le sang de Christ, qu'il a respendu en la Croix, & le Saint Esprit qu'il nous donne lauent les souilleures de nos esprits, l'un par la remission qu'il nous a obtenuë, & l'autre par la sanctification qu'il nous communique. Nous croyons encore comme eux, que le Baptisme ne doit estre administré qu'une fois à chaque personne, & ne se doit point reïterer: mais que quant à son fruit & à son efficace, il s'estend à toute la vie, pour nous asseurer que nous trouuerons toujours en Iesus-Christ & la remission de nos offenses, & la grace de la sanctification. En fin nous sommes encore d'accord avec eux, que quoy que ce soit vn Sacrement de foy & de penitence, & que ceux qui viennent grands à la cognoissance du Christianisme, doiuent tesmoigner qu'ils croient & qu'ils se repentent, auant que de le receuoir, neantmoins il doit estre administré aux petits enfans de ceux qui sont desia en l'Eglise, & que nostre Seigneur Iesus-Christ l'a ainsi voulu. Pour ce qui est

de la Sainte Cene, on ne nous conteste non plus que tout ce que nous en croyons ne soit absolument veritable. Car premierement nous tenons que c'est le tesmoignage de la communion que nous auons avec nostre Seigneur Iesus Christ, laquelle consiste en ce qu'il n'est pas seulement vne fois mort pour nos offenses, & ressuscité pour nostre iultification : mais aussi qu'il se communique tellement à nous, qu'il n'est pas plus vray que le pain & le vin nourrissent nos corps, qu'il est certain & indubitable que sa chair & son sang sont la nourriture & le breuuage de nos ames. Il est bien vray que nous croyons qu'il est au Ciel, comme aussi ceux de l'Eglise Romaine le croient ; & est bien vray encore que nous sommes en la terre, & qu'ainsi il y a vn merueilleux interualle entre luy & nous. Mais cela n'empesche pas que par la force de la foy, par laquelle nous l'embrassons, & par la vertu secrette & incomprehensible de son Esprit, lequel il nous communique, nous ne nous ioignions tellement à luy, & qu'il ne se ioigne tellement à nous, que nous sommes nourris & soustenus de sa substance. Et confessons que cette communion de Christ avec nous.

& de nous avec luy, est vn myſtere dont nos eſprits ne ſont pas capables de comprendre toute la grandeur & l'excellence. Neantmoins quoy que nous ne le comprenions pas entierement, ſi ſommes nous pleinement & profondement perſuadez, comme ie l'ay deſia dit cy-deſſus, que ny le Baptesme, ny la Cene, ne ſont pas des ſignes creux, qui ne contiennent & qui ne communiquent pas effectiuemēt ce qu'ils representent. Car nous croyons fermement qu'au ſainct Baptesme noſtre Seigneur Ieſus-Chriſt, par l'efficace de ſon ſang & par la vertu de ſon Eſprit, nous laue de nos pechez, auſſi certainement qu'il eſt vray que l'eau nettoye les ſouillures de nos corps. Et qu'en la Cene il nourrit ſpirituellement nos ames de ſa chair & de ſon ſang, auſſi certainement que le pain & le vin ſeruent à la nourriture de nos corps. Ainſi diſons nous qu'il faut bien ſoigneuſement diſtinguer entre les choſes exterieures qui nous ſont communiquées aux Sacremens, à les conſiderer preciſément en elles meſmes, & la vertu que noſtre Seigneur leur a donnée par ſon institution, de nous en representer d'autres, & de nous en mettre en poſſeſſion; car quant à ce



qu'il a d'exterieur, l'eau de loy-mesme est vn element caduque & contemptible, qui n'a en elle aucune vertu en ce qui est de nostre salut. Mais l'institution de nostre Seigneur Iesus-Christ fait qu'elle nous presente nostre lauement spirituel, & qu'actuellement, autant qu'une telle chose exterieure le peut, elle nous en met en jouissance. Le pain & le vin aussi, à les considerer precisément en eux-mesmes, n'ont aucune vertu de nourrir nos esprits en vne vie eternelle, ny de les esleuer à l'esperance de la bien-heureuse immortalité. Mais l'institution de nostre Seigneur Iesus-Christ les a non seulement rendus capables de nous presenter sa chair, & son sang, comme si nous les voyions à l'œil, mais de nous en mettre en actuelle possession, autant que des choses de cette nature en sont capables. Car ce n'est pas certes pour neant que nostre Seigneur Iesus a prononcé ces paroles, *Cecy est mon Corps*, son intention a esté de donner au pain qu'il nommoit ainsi, & vne particuliere dignité, & vne singuliere efficace. C'est pourquoy nous celebrons ce Sacrement avec toute sorte de respect, & en y participant comme il faut, nous pretendons en-

trer en la communion de nostre Seigneur, & en la participation de toutes ses graces. Il ne me reste plus qu'un mot à dire de nostre creance; non pour ce qu'il soit absolument necessaire de m'en énoncer icy, pour ce que ie m'en suis assez expliqué lors que j'ay parlé de la relation que nous auons & au Roy & à l'Estat: mais seulement afin qu'il ne manque rien à l'abregé que j'ay voulu faire icy de la Foy de nos Eglises. Nous croyons donc finalement, que comme Dieu est l'autheur de la Religion, en quoy il a voulu auoir soin du salut des hommes, il est aussi l'autheur du gouuernement politique, en quoy il a voulu pouruoir à la conseruation de leur société; & il estoit ainsi absolument necessaire, autrement les passions des hommes, qui sont naturellement effrenées, eussent tout renuersé c'en dessus dessous. Pour obuier à ce desordre, Dieu a estably les Royaumes, & les Republiques, & toutes sortes de Principautez: & bien qu'il y ait vne merueilleuse diuersité tant en leurs formes, qu'en la maniere de leur establissement, & en l'ordre de leur succession, les vnes estant electiues, & les autres hereditaires, & la façon mesme ou d'en heriter, ou d'y estre

esleu, n'estant pas esgale par tout, si est-ce que c'est Dieu qui y preside, & qu'elles doivent toutes estre rapportées à son institution. Et afin que le caractere de son autorité qu'il y imprime, ne soit pas mesprisé par l'audace des meschans, il a mis le glaive en la main des Puissances superieures, pour punir les pechez qui tendent à la ruine de cette societé, soit qu'ils violent les commandemens de la seconde Table, où sont contenus les devoirs de la charité envers le prochain, soit qu'ils soient commis contre la premiere, où sont contenus les commandemens qui concernent les devoirs de la pieté envers Dieu; car la Religion estant vn des principaux liens de cette societé, le Magistrat doit auoir soin de sa conseruation, au moins certes autant que le mespris qu'on en fait, en ébranle les fondemens & la subsistance. Non seulement donc Dieu ne veut pas qu'aucun entreprenne de renuerfer cét ordre politique qu'il a ainsi autorisé, mais il veut que chacun s'y soumette avec respect, en rendant obeïssance tant au Souuerain Magistrat, qu'à ceux qu'il a ordonnez pour suppléer à son absence, & faire ses fonctions comme Lieutenans, chacun selon le degré

qu'il tient, & selon l'estenduë de sa Jurisdiction & de sa puissance. Et pour ce que cet ordre public ne se maintient que par les Loix, & qu'il n'y a pas moyen de faire valoir les Loix, si le Magistrat qui les établit & qui les conserue, n'est en estat de les deffendre, & que pour le maintenir en cet estat, il faut faire des despeses auxquelles il n'y a moyen de fournir sans subsides & sans impôts : nous croyons que chacun non seulement est obligé d'obeïr à ces Loix, mais aussi de contribuer à ces depenses. Tellement qu'en toutes les necessitez publiques, chacun est obligé de porter volontairement ce joug, selon que la Puissance superieure en distribuë le faix par sa prudence. Comme donc les saints Apostres nous ont donné ces instructions en vn temps auquel les souuerains Magistrats estoient infideles, & comme les premiers Chrestiens les ont fidellement pratiquées enuers les Empereurs & Payens & persecuteurs, ainsi croyons nous qu'en ce temps, la diuersité de Religion n'empesche nullement ny l'autorité des Magistrats, ny la sujettion des inferieurs, & que la cognoissance & la profession de la verité ne dispense aucunement de ce respect, enuers

ceux à qui Dieu n'en a pas encore donné l'illumination par sa grace. Voila donc ce que nous croyons effectiuement, que i'ose bien prononcer estre tel, qu'il n'y a personne qui sçache que c'est du Christianisme, qui y trouue rien à reprendre. Car tout cela est conforme aux commandemens de Dieu: à l'oraison que nostre Seigneur a enseignée à ses Disciples; au Symbole que nous appellons communément des Apostres; à celuy du Concile de Nicée; à celuy qui a esté composé par S. Athanase, & approuué par tous les Orthodoxes; aux décisions des premiers Conciles de l'Eglise, & generalement à tout ce que l'Eglise Romaine mesme croid, en cela en quoy il n'y a point de different entre nous. Partant nous sommes persuadez que tant s'en faut que cette creance nous doiuue produire l'a- uersion de ceux avec qui nous viuons, qu'au contraire, elle nous deuroit consi- lier la bien-vueillance de tout le monde.



## SECTION VIII.

*Qu'en ce que ceux de la Religion font en leurs exercices de pieté en consequence de leurs dogmes, il n'y a rien qui merite qu'on ait aucune auersion pour eux.*

**A** PRES auoir exposé ce que nous croyons, il est raisonnable d'informer ceux qui ne le sçauent pas, de ce que nous faisons en consequence, en ce qui est de nos exercices de pieté. Si nos plus grands aduersaires auoient la curiosité de venir seulement en nos Temples, à l'heure que nous y sommes assemblez pour le seruice de Dieu, pourueu qu'ils peussent vn peu mettre à part leur passion, ils en remporteroient sans doute vne grande edification, & nous n'aurions point à faire de nous estendre en cette partie de nostre defense. Mais pource qu'ou bien les Directeurs de leurs consciences les en destournent, ou bien ils y ont de la repugnance d'eux-mesmes, ou ils craignent de scandaliser ceux de leur profession, & d'engen-

drer en leurs esprits de mauuais soupçons, ou bien finalement les occupations de la vie presente, & quelque nonchalance les retient, ie representeray icy briefuement ce que c'est, afin qu'au moins quelques-vns s'instruisent en particulier, de ce contre quoy tant de gens crient ordinairement, sans en auoir aucune certaine cognoissance.

Outre les prieres particulieres de chaque personne & de chaque famille, qui se font soir & matin dans les maisons, & la lecture de la Parole de Dieu, qui se fait reglement en diuers lieux apres les repas, nous auons, où la commodité le peut permettre, diuers iours en la semaine destinez à la predication, & aux autres parties du culte diuin. Sur tout y auôs nous si particulièrement consacré le saint Dimanche, à l'imitation des Apostres & de toute l'Eglise ancienne, en memoire de la resurrection du Sauueur, qu'il n'y a lieu où il nous soit permis de le faire par les Edicts, auquel ceux de nostre profession ne s'assemblent ce iour-là solemnellement vne ou deux fois, pour rendre à Dieu les devoirs de leur pieté, & en s'auançant en la sanctification, se confirmer de plus en plus

en l'esperance de la vie. Là donc la premiere chose qu'on fait est qu'apres l'inuocation du nom de Dieu, quelqu'un qui est destiné pour cela lit hautement l'Escripture en langage populaire, afin de donner au peuple la cognoissance de l'histoire sainte, quelque teinture des predctions des choses futures lesquelles y sont contenuës, & sur tout l'intelligence des mysteres de nostre redemption. Ce qui ne se peut faire sans luy inculquer les enseignemens à la pieté & à la vertu, & les consolations, & les exhortations qui nous y ont esté laissées par les Prophetes & par les Apostres. Et on ne scauroit suffisamment représenter combien cette lecture a d'efficace pour esmouuoir les consciences, & pour imprimer de bonnes pensées dans les ames des Chrestiens. Aussi a-t'elle esté si soigneusement pratiquée en l'Eglise Primitiue, qu'il y a eu des Lecteurs en charge particuliere pour cela, qui depuis ont tenu rang entre les ordres de l'Eglise. A cette lecture on entremesle le chant de quelques Pseaumes de Dauid, comme ils ont esté mis en rime par Clement Marot & par de Beze. Or d'autant que de tout le Vieux Testament le liure de ces saints Cantiques est

sans aucune difficulté le plus beau, & le plus capable de former les hommes à la pieté, ce n'est pas chose conceuable à ceux qui ne l'ont point experimenté, combien ce chant adjouste à la deuotion, ny quelle vtilité ceux qui y ont de l'attention en recueillent. Car il n'y a personne en affliction, qui n'y trouue de la consolation, il n'y a qui que ce soit en prosperité, qui n'y trouue de quoy s'exciter à loüanges & à actions de graces. Les prieres y sont ardentés tout ce qui se peut, les loüanges des vertus de Dieu y sont illustres & magnifiques. Les accouragemens à la patience y sont souuerainement puissans, les promesses & les assurances de la bonne volonté de Dieu y sont expresses à merueilles. Les exemples de ses iugemens & de ses benedictions y sont en grand nombre dans les hystoires du temps passé, les predctions de ce qui deuoit arriuer à nostre Seigneur y sont si exactes & si precises, que vous diriez que ses actions, & notamment ses passions, y ont esté peintes. Les exhortations à la pieté, à la saincteté, & à la vertu y esleuent l'ame iusques dans les Cieux, les imprecations prophetiques que Dauid y fait contre les meschans, & les denon-

ciations des iugemens de Dieu dessus eux, sont capables de mettre la terreur & l'espouuancement dans les ames les plus insensibles. Au reste tout cela y est semé de si beaux ornemens, enrichy de si glorieux emblèmes, & rehaussé de pensées si sublimes & si celestes, qu'il faut estre plus brutal que les brutes mesmes, & plus endurci que les rochers, pour n'en estre point rauy en admiration, & pour n'en sentir point d'incomparables eslancemens de pieté, & d'inenarrables esmotions de deuotion en la conscience. Nous sçauons bien qu'il y a quelques esprits mal formez, & mesmes entre les Predicateurs, qui taschent autant comme ils peuuent de rendre ce saint exercice ridicule. Car ils trouuent estrange premierement qu'vniuersellemēt tout le monde y chante, tant les petits que les grands, sans en excepter les femmes mesmes. Puis apres ils cherchent par cy par là quelques vieux mots & quelques locutions surannées, qui se rencontrent notamment dans la rime de Marot, qu'ils tournent en derision; iusques-là qu'il y en a quelques-vns qui les veulent faire seruir à engendrer dans les esprits, des pensées fales & profanes. Or pour ce qui est de ces



derniers, ie ne leur responds point. Ils ne sont pas dignes que les gens d'honneur s'amüsent à eux, & beaucoup moins d'estre receus à monter dans les chaires destinées à la predication, lesquelles doiuent estre si sainctes & si venerables. Je diray seulement que pour ce qui est de la vieillesse de l'elocution, si nous voulions nous entrechicaner, & nous rendre ridicules les vns les autres, il se trouueroit d'aussi mauuais mots, & aussi peu congrus pour le moins, dedans le Latin de la Messe, qu'on en rencontre dans le François de la rime de Marot. Chacun sçait combien nostre langue est exposée au changement, & comment au bout de neuf ou dix ans pour le plus, vne façon de parler qui a eu de l'elegance en son temps, deuient quasi barbare & estrangere à nos oreilles. Tant y a que ces Pseaumes, dont on se rit à cette heure, estoient il y a cent ans l'admiration des Cours des Rois, & qu'auant que l'vsage auquel nous les auons employez les eust rendus odieux, ils estoient vniuersellement estimez par tout le Royaume. Et ceux qui ont quelque sens, & tout ensemble quelque candeur, aduoüent que si l'on en oste quelques-vns des plus vieux ter-

mes, qui sont en assez petit nombre pour-  
tant, ils ont en leur simplicité vne grace  
tout à fait incomparable. Tellement que  
les efforts qu'y ont fait les Des-Portes &  
les Marillacs, & generalement tous ceux  
qui se sont estudiez à estendre ces saincts  
Cantiques en Paraphrases, les ont bien  
surmontez en pompe & en elegance quel-  
quesfois, mais n'ont iamais sceu appro-  
cher de cette claire naifueté qui respond si  
parfaitement au texte originel du saint  
Prophete. Mais nous viuons en vn temps  
auquel on ne fait plus de cas ny de la beau-  
té des pensées, ny de la grace naturelle  
d'une diction simple & sans fard, ny de cet  
air genereux & quelquesfois vn peu non-  
chalant d'un genie qui enfante ses produ-  
ctions sans peine, ce qui a rendu si recom-  
mandables les ouurages des plus anciens  
Autheurs, si le moindre petit mot qui n'est  
pas à la mode les des-honore. La pieté mé-  
me n'est pas agreable si elle n'est aiustée  
selon le temps, & pour plaire, il faut qu'elle  
estudie tous ses pas, & qu'elle pese tous  
ses mots, & que toutes ses periodes tom-  
bent en cadence. Certainement cette cu-  
riosité aux choix des mots, ce nombre &  
cette mesure qu'on affecte maintenant  
avec

avec tant de soin dans les periodes , & cette iustesse si parfaite qu'on obserue dans la structure des termes, & dans la mesure des vers , a quelque chose de singulierement elegant. Mais outre qu'il a esté ingenieusement & iudicieusement dit par quelqu'un, que c'est vne faute en matiere de bien dire, que de ne faillir du tout point , & qu'un soin si scrupuleux semble auoir quelque chose de seruile , c'est bien souuent vne gesne des esprits, qui leur fait perdre quantité de beaux esclans & de genereuses pensées. Quoy qu'il en soit , car ie m'auance peut-estre vn peu trop , la Religion n'a iamais esté superstitieuse en matiere de paroles, & comme elle n'emprunte point son efficace de l'eloquence du siecle , aussi ne se donne-t'elle pas beaucoup de peine d'estre parée de ces ornemens. Il luy suffit qu'on l'entende seulement , & semble qu'elle se plaise à triompher en sa simplicité , de la pompe & de la magnificence du monde. Pour ce qui est de permettre que toutes personnes chantent en nos assemblées, ceux qui nous en blasment ne scauent pas que l'Eglise Primitiue le pratiquoit ainsi , comme il y en a de beaux enseignemens dans Plin Second, dans Chry-

ſoſtome, dans ſainct Auguſtin, & quantité d'autres. Veritablement ſicela engendroit quelque confuſion, il ſ'en faudroit abſtenir, afin qu'en l'Eglife de Dieu tout ſe fiſt, ſelon le precepte de ſainct Paul, honneſtemēt & par ordre. Mais bien que ces Pſcaumes ayent eſté mis ſur vne muſique vn peu difficile en quelques endroits, nous ſommes tellement accouſtumez à les chanter dès noſtre bas aage, que les plus ſimples du populaire ſ'y rencontrent en vn parfaitement bon accord avec les meilleurs Muſiciens, & que du meſlange de tant de voix ſe forme ie ne ſçay quelle harmonie, dont le ſeul ſon a quelquesfois rauy les paſſans, tant l'air de ce chant eſt melodieux, & tant il eſt propre à donner à l'eſprit des eſmotions extraordinaires. Pour nous certes nous pouuons bien parler de ce que nous en experimentons, & dire en toute verité qu'il y a telle occaſion où ces diuines paroles animées de la façon, mettent quaſi nos ames hors d'elles-mêmes. De ſorte que ie ne croy pas qu'il ſe puiſſe voir en la terre vne plus belle image de ce que nous eſperons quelque iour en Paradis, qu'une telle congregatiō de perſonnes aſſemblées pour les actions de pieté,

lors qu'elle pousse vers le ciel les loüanges de Dieu sur tant de voix, où reluisent de tous costez les estincelles de sa deuotion & de son zele. Le Ministre estant venu apres cette lecture & ce chant, il fait assez ordinairement lire les Commandemens de Dieu, que l'on escoute avec reuerence, les hommes ayans la teste decouuerte par respect, & tout le reste de l'assemblée en profond silence. Ce qui donne de la reuerence pour la Loy de Dieu, & la ramenoit à chacun de nous, pour en faire la regle de nostre conduite. Cela fait, le Ministre monte en chaire; & commence son action par vne generale confession des pechez de toute l'assemblée, par vne protestation solennelle de repentance, & par vne priere bien expresse & bien emphatique pour demander pardon à Dieu, & implorer l'assistance de la grace de son Esprit au nom de Nostre Seigneur Iesus-Christ. Apres cela il fait chanter vne pause d'un Pseaume ou choisi expressement pour son action, ou suiuy selon l'ordre estably dedans l'Eglise, & le Cantique acheué, il recommence vne autre priere, dans laquelle recognoissant la sublimité incomprehensible des myste-



res de la Foy, & l'imbecilité naturelle de l'entendement de l'homme, il demande à Dieu l'illumination de sa grace, pour bien comprendre ses diuins secrets, & la faculté de les énoncer en pureté & en vérité, à l'edification de ceux qui l'entendent. Sur tout il le prie qu'il rende sa parole efficace par sa benediction, à ce qu'elle entre bien auant dedans les esprits de ses auditeurs, & qu'elle y soit comme vne semence feconde de sanctification, qui produise abondamment des fruiets de iustice & de pieté, à la gloire de Dieu, à l'edification du prochain, & au salut de chacun particulier; puis il conclud par l'oraison Dominicale. En suite, apres auoir aduertty d'escouter avec reuerence & obeïssance de foy, il lit quelque partie de l'Escriture, qu'il se propose d'exposer, & puis s'estant composé à parler, tout le monde se dispose à l'escouter en silence. Alors apres vne preface accommodée à son texte, ou à quelque occasion qui se presente, il explique son sujet le plus exactement qu'il se peut, se tenant ferré aux paroles & à l'intention de son autheur, sans se laisser emporter ny à des digressions inutiles, ny à des narrations d'histoire hors de pro-

pos, ny à des amplifications pedantesques, ny à beaucoup de citations d'anciens auteurs, de quelque nature qu'ils soient, & se contente d'expliquer, d'illustrer, & de confirmer ce qu'il se propose, par passages de la Parole de Dieu, & par les raisons qui s'en desduisent. S'il se presente en suite quelque controuerse, à la decision de laquelle la matiere dont il se traite puisse seruir, il la y applique modestement, sans autre chaleur & sans autre passion que celles qui sont permises par les Loix de disputer, & que la vehemence ordinaire de la predication donne. En quoy il luy est souuerainement recommandé de ne tesmoigner point qu'il aime la controuerse avec qui que ce soit, & de n'insulter point aux personnes avec qui est le demeslé, ny mesmes au dogme qu'il entreprend de refuter, sinon autant que la gloire de la verité le requiert, & que l'amour de la paix, & le respect des personnes le peut permettre. En fin il vient aux enseignemens que le passage qu'il a traité luy fournit, pour les appliquer en remonstrances, en exhortations, en consolations, & en accouragemens selon la necessité des occurrences. Particulierement

il insiste sur les exhortations à la piété, à la sainteté, à la vertu, à la charité, au mépris des choses du monde, à la patience en affliction, à la confiance en la bonté de nostre Seigneur, à l'obéissance aux Magistrats, tant Souverains que subalternes, & à dresser toutes ses pensées vers le prix de l'immortalité, dont il ramenoit toujours l'esperance à la fin de son propos, selon les promesses de l'Euangile. Tout cela se fait avec vne simplicité & vne gravité digne de la sainteté de l'action, & du sujet qui s'y traite; sans gestes de baisteleur ou de charlatan, sans contenance de bouffon ny d'hypocrite, sans affectation d'éloquence ny de vaine erudition, sans marques de vanité, sans ostentation & sans parade. De sorte que s'il y paroist quelque vehemence & quelque grace dans la prononciation, c'est l'excellence du sujet & la nature du predicateur qui la donne. S'il y a quelques fleurs en son langage, & quelques ornemens en son propos, on les y void naistre d'eux-mesmes, & non y estre amenez de loin; & quoy qu'on n'y vienne point sans premeditation, l'action est toujours pleine d'autant de simplicité, & autant esloignée de

la magnificence de l'art, que si elle estoit impremeditée. De sorte qu'à l'imitation de l'Apostre S. Paul, toute l'efficace de telles predications despend, non des discours attrayans de la sapience du siecle, mais de la Parole de Dieu, & de la vertu de son Esprit qui l'accompagne. Mais elle s'y deploye de telle façon, que souuent il y en a peu dans l'assemblée qui n'en soient esmeus; & quelquesfois on y experimente de tels transports, que s'il plaisoit à Dieu retirer du monde à l'heure qu'on est ainsi rauy, on en sortiroit non seulement sans regret, mais avec vne allegresse incomparable. Le Presche acheué le Ministre se met à prier, ou bien en termes qu'il conçoit luy mesme, ou bien selon les formulaires que nous en auons en nos Eglises. Quoy qu'il en soit, tous les Dimanches il recite en la presence du peuple, qui le suit des mouuemens de sa deuotion, vne assez longue priere, dans laquelle nous auons recueilly tout ce qui est necessaire de demander à Dieu, tant pour le public que pour les particuliers, tant pour ce qui regarde la vie presente, que principalement pour ce qui concerne celle qui est à venir. Là donc apres auoir déclaré que c'est en la



seule confiance des promesses que Dieu nous a faites en Iesus - Christ , que nous nous presentons deuant luy , pour luy adresser nos oraisons, nous commençons à le prier pour les Puissances du monde , & notamment pour le Roy qu'il nous a donné, luy demandans ardemment toute sorte de faueur , de protection & de benediction pour sa personne , & pour son Estat. En suite nous ne manquons iamais de prier pour la Reyne; pour Monseigneur le Frere du Roy, Monseigneur le Duc d'Orleans, Messieurs les Princes du Sang, & tous ceux de la Maison Royale, & du Conseil de sa Majesté, avec tous ceux qui sont en autorité en l'administration des affaires du Royaume. Nommément nous respondons nos vœux en la presence du Seigneur pour les Gouverneurs des Prouinces & des Places dans lesquelles nous habitons, & pour les Magistrats à qui la Iustice & la Police en est commise, à ce qu'il luy plaise les benir & les conduire par son bon Esprit en l'exercice de leurs charges, & qu'il incline leurs cœurs vers ceux qui le seruent en pureté. De là nous passons à prier pour les Pasteurs que Dieu a establis dessus son Eglise, à ce qu'il leur donne de s'acquiter fi-



delement de leur deuoir ; pour tous hommes generalement, à ce qu'il les appelle à la cognoissance ; pour tous ceux qui sont affligez , à ce qu'il les console & qu'il les deliure ; pour tous ceux qui souffrent persecution pour la verité , à ce qu'il les soustienne & qu'il les rende inuincibles ; & en fin pour nous mesmes , à ce qu'il nous rende capables de la iouissance de son Royaume ; puis nous finissons par l'oraison de nostre Seigneur , & par le recit du Symbole des Apostres. Quelquesfois dans les afflictions publiques , dans la celebration de nos ieusnes, ou quand quelque autre occasion le requiert, nous suiurons vn autre formulaire de priere , que nous auons encore en la Liturgie de nos Eglises, dont toute la matiere est à peu pres semblable à la precedente , sinon que la cōfession des pechez y est encore plus expresse, les sentimens de repentance aucunement plus vifs & plus profonds, les vœux encore ie ne sçay comment plus feruens, & les marques de l'humiliation de l'esprit , telles qu'elles doiuent estre en vn dueil public & en vne affliction extraordinaire. Or ie ne veux point autrement recommander ces prieres que par le iugement que nos ennemis mesmes en

ont fait. Car ils les ont trouuées si dignes du Christianisme , si propres à enflammer la pieté , si pleines d'esprits & d'action , si belles & si efficaces, que quelques Curez de Paris les ont inferées dans le volume des prieres qu'ils ont recueillies pour mettre entre les mains de leurs parroissiens; de sorte qu'il y a tel qui sans nous cognoistre nous maudit , qui prie Dieu comme nous pourtât, & à qui nous fournissons le moyen de nourrir & de fomentier ce qu'il y peut auoir de bon dans sa pieté, sans qu'il y pense. Apres ces prieres, s'il y a quelqu'un des Sacremens à celebrer, on le fait autant que l'on peut avec la reuerence conuenable: Car s'il faut baptiser vn enfant, on l'apporte en la presence de toute l'Eglise, afin d'estre consacré à Dieu le plus solennellemēt qu'il se peut , & là estant présenté au Ministre par le pere, & en son nom par ceux qu'il a choisis pour cēt effect, on lit publiquement le formulaire dans lequel nous auons compris l'institution du S. Baptisme, son but, ses fruits, son efficace, & les principales choses pour lesquelles nous croyons qu'il doit estre administré aux petits enfans. Puis par vne priere solennelle on offre cēt enfant à Dieu , en demandant

au nom de nostre Seigneur Iesus-Christ qu'il soit fait participant de son salut, & que le Baptisme produise en luy sa vertu, en remission du peché originel, & en sanctification, lors qu'il en sera venu en aage. Et apres auoir tiré promesse de ceux qui le presentent, qu'ils l'instruiront en la foy de l'Euangile, & en l'amour de la pieté, on lui verse de l'eau sur la teste, en le baptisant au nom du Pere, & du Fils, & du S. Esprit. Si c'est le temps & l'occasion de participer à la Cene, on adjouste premierement quelque chose à la priere publique, pour demander à Dieu qu'il nous dispose à communiquer deuotieusement à ce Sacremēt, & qu'il le rende efficace au salut & à la consolation de nos consciences. Puis on lit le formulaire dans lequel nous auons compris son institution, comme elle est rapportée par S. Paul, & briefuement expliqué l'usage de cette ceremonie, sa nature & son efficace, conjointement avec les exhortations par lesquelles le Ministre reueille les consciences des assistans. Par là il les incite à s'examiner eux mesmes, & à se disposer à la communion par foy & par repentance, & par de saintes dispositions à la charité, en denonçant à ceux qui

ne sont pas bien préparez, de s'abstenir de ces saints mysteres. Ce qui ayant esté fait avec toute la grauité conuenable, le Ministre prononce quelques paroles tirées de l'Ecriture sur le pain & le vin du Sacrement, communie avec ses collegues, & en suite donne à communier à tous ceux de l'assemblée qui s'y veulent presenter, & qui portent avec eux certaine marque qu'ils sont reconnus pour estre de nostre profession. Là viennent premierement les hommes, selon la prerogatiue de leur sexe, la teste descouuerte, & en estat de respect & d'humilité: puis les femmes en vne modeste contenâce, sans pompe d'habillemens, & sans marques de vanité; & ainsi chacun estant aduertý par la bouche du Ministre que c'est la communion au corps & au sang de Christ, qu'on luy donne pour seau de la remission de ses pechez, prend le pain & la coupe de sa main, communie debout en tesmoignage de reuerence, & puis se retire en sa place sans tumulte ny confusion. La communion paracheuée, le Ministre remonte en chaire, rend graces à Dieu solennellement de ce qu'il a fait la faueur à l'assemblée de l'attirer à la communion de son Fils, & le prie



d'en imprimer bien profondément la sou-  
uenance dans la conscience de ses fideles,  
& de leur rendre cette sainte ceremonie  
singulierement efficace en sanctification.  
Q<sup>uo</sup>y fait, on chante le Cantique d'action  
de graces, à l'imitation de nostre Sei-  
gneur & de ses Apostres. Si ce n'est point  
iour de celebrer les Sacremens, apres la  
priere dont i'ay cy-dessus parlé, on chante  
vne pause de Pseaume, apres laquelle on  
donne la benediction au peuple par les  
paroles que Dieu auoit autrefois ordon-  
nées en sa Loy, & le renuoye-t'on en paix  
avec exhortation de n'oublier iamais la  
charité enuers les pauvres. Outre tout  
cela, dans les Eglises vn peu populeuses,  
& où ny l'esloignement du lieu, ny les  
autres incommoditez qui trauerfent les  
exercices de plusieurs, n'empeschent pas  
l'obseruatiō d'vn ordre vn peu plus exact,  
on explique le Catechisme le Dimanche  
à l'apresdisnée. Car nous auons fait sous  
ce nom vn recueil de toutes les doctrines  
fondamentales à la religion Chrestienne,  
disposé par interrogations & par respon-  
ses, accommodé le plus qu'on a peu à la  
capacité des enfans, & où on a brieuement  
touché les principales controuerses de nos



temps. On en prend donc vne section, qu'on fait reciter à quelques enfans, puis on l'expose deuant le peuple le plus intelligiblement qu'il se peut, afin de donner à la ieunesse de bonnes impressions, tant pour ce qui est de la doctrine, que pour ce qui regarde la pieté & les bonnes mœurs: ce qui renouelle en l'esprit de tous les assistans les ideées des connoissances qu'ils auoient desia acquises. Tellement que tous les ans; car le nombre des sections est à peu pres comme celuy des Dimanches de l'année; on donne au peuple Chrestien vne exposition populaire de tous les mysteres de la Foy, & on le premunit des principales raisons par lesquelles il en faut defendre la verité contre les erreurs les plus importantes. Ce qui est accompagné de prieres, de chant de Pseaumes, & de toutes les parties du Culte que j'ay cy-dessus descrit.

Or ne veux-je point icy faire de comparaison entre ce seruice que nous rendõs à Dieu par nostre Seigneur Iesus Christ, & celuy qui est receu en la communion Romaine. Les Ceremonies y sont si diuerfes, le langage si different, & generalement toutes choses y sont si diametralement

opposees , qu'il faudroit trop allonger cette Apologie pour bien expliquer & bien demonstrier les raisons de si differentes institutions , les avantages de l'une par dessus l'autre , & l'edification & la sanctification que le peuple en peut remporter. Chacun peut assez faire cette comparaison de soy-mesme , & qui qu'il soit , s'il ne se laisse point trop maistriser par les passions & les preiugez, nous ne craignons pas que le iugement qu'il en fera , nous soit autre que favorable. Et quant à ceux qui ont quelque connoissance de la premiere antiquité de l'Eglise , comme nous en auons les enseignemens dans les Escrits des Apostres , de Iustin Martyr , de Tertullian , & de quelques autres , ils ne nieront pas que nostre Culte ne luy soit sans contredit plus conforme , que celuy que l'Eglise de Rome pratique maintenât. Je diray seulement que toute comparaison mise à part , & à nous considerer purement & simplement en nous-mesmes, il n'y a rien en tout ce seruice de nos Eglises qui merite la haine publique, que plusieurs essayét de nous faire porter depuis si long temps. Car tout ce que nous y faisons estant conforme à nostre creance , & no

estre creance estant , comme nous l'auons  
veu cy-dessus , de l'adueu mesme de nos  
aduerfaires , le Christianisme en tous ses  
principes , & dans ses plus belles & plus  
importantes conclusions , le seruice qui  
est edifié dessus ne peut sinon estre propre  
à engendrer la pieté enuers Dieu , & la  
charité enuers les hommes . Or si nous  
sommes dignes de haine pour estre pieux  
enuers Dieu , & charitables enuers nos  
prochains , par quel moyen nous conci-  
lierons nous la bonne volôté de nos con-  
citoyens , & qu'est-ce qui nous pourra ren-  
dre recommandables enuers nos Supe-  
rieurs , pour obtenir leur protection , & les  
effets de leur equité , si ces qualitez nous  
les alienent ? Il est vray qu'il y en a quel-  
ques-vns qui sont equitables iusques à ce  
point , que de confesser que nous ne som-  
mes point dignes de l'auersion qu'on a  
pour nous , à cause de ce que nous croyõs ;  
mais ils pretendēt que pour ce que nous  
n'en croyons pas assez , nous n'en faisons  
pas assez aussi , & qu'encore que nous em-  
brassions vne partie du seruice de Dieu , si  
ne peut-on pas supporter que nous en re-  
iettions l'autre . Car comme ceux-là sont  
odieux qui commettent quelque chose  
contre

contre les regles que Dieu nous a données pour conduire nostre pieté , aussi ceux-là tombent-ils dans vn notable defect, qui ne remplissent pastoute la mesure de ces regles , & qui retranchēt quelque partie de la pieté que nous luy deuōs. Pour donc satisfaire à cette plainte , qui seule reste à faire contre nous ; outre les reflexions que nous auons faites cy-dessus, ces Messieurs sans doute trouueront bon que nous leur representations deux choses. L'vne est , que quand on s'abstiēt de quelque partie du seruice de Dieu par mespris, il n'y a point d'excuse pour celuy qui le fait, ny deuant Dieu, ny deuant les hommes. Mais quand on le fait par mouuemēt de la conscience , & pource que n'estant pas bien informé de la volonté de nostre Seigneur , on a peur d'en faire trop , il a sans comparaison plus agreable cette modestie timidité , que la temerité de ceux qui se portent indifferemment & sans aucune circonspection , à ce dont ils n'ont aucune certitude qu'il soit legitime. Car quoy que c'en soit , la timidité en telles choses est vne marque de respect , au lieu que la precipitation . qui induit à faire à tors & à trauers tout ce que la fantaisie

nous suggere, ou à receuoir sans examiner tout ce qui nous est fourny par autruy, monstre qu'on ne se donne pas beaucoup de sollicitude si le seruice qu'on rend à Dieu luy peut estre agreable ou non. C'est pourquoy S. Paul enseigne constamment & disertement, qu'encore que l'usage de toutes sortes de viandes soit indifferent de sa nature, & permis par la doctrine de salut, si est-ce que celuy qui s'en abstient pource qu'il a peur d'offenser Dieu, & de violer quelque vne de ses institutions s'il en vsoit, luy est sans comparaison plus agreable que celuy qui nonobstant le scrupule qu'il en fait, s'y laisse emporter par l'exemple, ou par quelque autre tel motif. Puis donc que non seulement nous soupçonnons que ce qu'on estime estre de manqué dans nostre creance, & dans le seruice qui s'en ensuit, est plustost vn excés que non pas vn defect, mais mesmes que nous sommes viuement & profondement persuadez que ce sont choses ennemiés de la gloire de nostre Sauueur, & pernicieuses à nostre esperance, nous serions dignes de beaucoup plus d'auersion qu'on n'en a pour nous, si nous nous laissions emporter par-dessus cette persuasion & ce mouuement



de nos consciences. L'autre est, que si ceux qui estiment que nostre creance est defectueuse, y veulēt adiouster quelque chose, & nous persuader ce que nous ne croyons pas, il faut qu'ils prennent tout le contre-pied de la violence & de la haine. Car outre que les creances ne s'impriment que par la raison, outre que la religion Chrestienne a cela de particulier par dessus toute autre discipline qui soit sur la terre, qu'elle forme les esprits des hommes à la douceur & à la debonnaireté: diuerses considerations font que la haine & l'animosité, & les traitemens defauorables, produisent en nous vn effet tout contraire à l'intention de ceux qui les employent en nostre endroit. D'vn costé nous sommes hommes, qui auons les ressentimens naturels tous semblables à ceux des autres, sinon autant que nous taschons de corriger par la parole de Dieu ce qu'il y a de vicieux. Or c'est le naturel de tous les hommes de se roidir contre la contrainte, & de tascher de maintenir leur liberté. Et bien que pour ce qui regarde les actions corporelles que nous pouuons faire en bonne conscience, nous ployons volontairemēt sous l'autorité de nos Superieurs, & qu'on ne nous

peut pas accuser d'y estre plus refractaires que celle de l'autre communion, si est-ce que pour ce qui regarde les opinions de l'esprit en matiere de religion, nous sommes esleuez dès nostre enfance à deferer peu à toute autre autorité qu'à celle de Dieu. Car on nous persuade par la connoissance de la verité, on force nos entendemens par son euidēce, on nous fait voir à l'œil; & toucher à la main les raisons de ce qu'on veut que nous croyions, & nous sommes si habitez à cela, qu'un seul passage de l'Ecriture que nous entendons biē, a plus de poids enuers nous que l'autorité de tout vn Concile. Tellement qu'en des ames ainsi disposees dès leur enfance, & qui ne sont menées en telles choses d'autre passion que du zele de la gloire de Dieu, & du desir de leur salut, il ne faut pas esperer de faire iamais entrer aucun dogme de la Foy, sinon à force de raisons accompagnées de demonstration de douceur & de bienveillāce. D'autre costé cette façon de nous vouloir conuertir par des traitemens peu equitables, nous rend suspecte la creance de ceux qui en vsent enuers nous. Pource que de toutes les veritez qui sont au monde, la plus claire & la plus

euidēte est celle de la Religion de Christ, C'est elle sans doute qui a le plus d'attraits pour se persuader aux hommes aucunement raisonnables, & le plus de force encore pour conuaincre les contredisans. Et afin de faire d'autant plus paroistre cette clarté & cette force de la Foy Chrestienne, Dieu a expressēmēt voulu que quand elle s'est establie en la terre, elle n'eust aucun support dans les puissances du monde, & qu'elle tirast tous ses auantages d'elle mesme & de sa naturelle beauté. Aussi a-t'il esté sans doute beaucoup plus glorieux pour elle, que douze pauvres pescheurs, qui auoient pour ennemis tous les Potentats de la terre, l'ayent neātmoins rendue victorieuse de tout l'Vniuers, & ayēt amené les plus grands Empires sous l'obeissance de Iesus-Christ, que si Dieu l'eust armée des choses qui ont de l'éclat, & qui impriment de la terreur dans les entendemens des hommes. Si donc c'est la verité qu'on nous veut faire receuoir, on luy fait tort d'y employer, non certes les violences ouuertes & les persecutions, car la bonté de nos Roys, & la iustice de nos Gouverneurs nous en garentit, mais les iniquitez moins descouuertes, & les

traitemens peu fauorables que quelques-uns des officiers de Iudicature, & la plus-part des peuples pratiquent assez ordinairement enuers nous. Enfin, pour ce que les anciens Chrestiens ont dit alors qu'on les mal-traittoit, que la verité est estrangere en ce monde, & partant que ce n'est pas chose estrange si elle y trouue peu de faueur. Comme les esprits des hommes sont enclins à tirer toutes choses à leur auantage, nous ne sentôs aucun effect de la mauuaise volonté de nos concitoyens, qu'il ne nous vienne incontinent en la pensée, que c'est la verité de Dieu que nous maintenons, & que l'on combat en nos personnes sans la connoistre. A quoy nous adioustôs cette consideration, que le Seigneur Iesus & ses Apostres ont predict, que la religion qu'ils annonçoient souffriroit beaucoup de contradiction en la terre. *Vous serez*, dit le Sauueur, *hays à cause de mon Nom*. Nous sçauons bien qu'il faut vser de quelque retenüe à raisonner de cette sorte, & qu'il faut estre persuadé par d'autres preuues que par les choses que l'on souffre, que c'est la verité qu'on deffend. Car les Iuifs endurent aussi de la part des Chrestiens, & quelques-uns d'entre les peuples Payens



ont esté exposez à beaucoup de calamitez de la part des gens qui font profession du Christianisme. Les Indes Orientales, & particulièrement les Occidentales, en sont tesmoins; & bien que les Espagnols y ayēt exercé des rigueurs & des cruautéz sans exemple, on ne sçauroit pas pourtāt exempter absolument de blasme en cet égard les autres nations qui les conquestent. Il se peut faire qu'en Angleterre & en Escoffe les Catholiques Romains n'y ont pas tous leurs contentemens, comme au contraire on dit qu'en Irlande les Protestans ont souffert depuis peu de temps des inhumanitez épouuentables. *Tantum religio potuit suadere malorum!* Mais veritablement & les vns & les autres ont tort, si sous pre-texte de religion, & si par le zele qu'ils ont pour celle dont ils font profession, ils commettent quelque chose contre ce qui est de l'humanité, & contre la iustice des loix sous lesquelles ils vivent. Et si les Catholiques d'Angleterre auoient eu par le passé, & auoient encore maintenant des Edicts, sous la protectiō desquels ils fussent à couuert, comme nos Roys nous en ont donné, ie tiendrois les Reformez pour indignes de la qualité qu'ils portent, s'ils abu-



soient de leur autorité pour en eneruer la vigueur, & s'ils ne les obseruoient ponctuellement en toutes occurrences. Car qui n'est pas iuste en sa conduite, n'est pas veritablement deuotieux, & qui n'observe pas les loix qu'il doit maintenir, soit en qualité de personne priuée ou de personne publique, n'est pas iuste. Ce zele destitué de iustice & d'équité, est passion; & bien qu'elle nous aueugle quant à nous, & que nous pensions faire sacrifice à Dieu quand nous nous y laissons emporter, Dieu ne nous en aduouera pas pourtant, & ne recevra point en iugement nostre passion pour son zele. Car le vray zele n'est rien sinon vne certaine ferueur d'amour pour la gloire de Dieu & de sa verité; au lieu que la passion est vn excès de l'amour que nous nous portons à nous-mesmes. Or il n'est pas raisonnable que l'amour démesuré que nous nous portons, & aux choses que nous considerons pour nostre interest, nous soit alloüé en compte, comme si nous n'y considerions rien sinon Dieu, & les choses qui le regardent. En fin, quand cette haine qu'on porte à nostre doctrine ne seroit point marque certaine & indubitable de sa verité, si semble-t'il qu'il est

& de la bonté & de la prudence de ceux qui nous veulent attirer à eux , de s'empescher de nous donner les occasions que nous la prenions pour telle. Car tandis que nous le croirons ainsi , ce sera vn obstacle insurmontable à cette conuersion , laquelle ils font profession de vouloir procurer de toute leur puissance.

---

## CONCLVSION.

**I**Cy ie prie le Lecteur de prendre en bonne part que ie donne la conclusion à cette Apologie , par quelques briefues reflexions sur les actions & les interests des Souuerains , dont les sujets professent diuerfes religions : sur le deuoir des Magistrats inferieurs , à qui ils ont commis l'administration de la Iustice & de la Police en leurs Estats : & en fin sur la disposition des esprits des peuples , & sur leurs deportemens en ces professions differentes. Et pour ce qui est des Souuerains , comme ils sont quant à leurs personnes , Chrestiens , & quant à leur charge & à leur dignité , Potentats , aussi ont-ils sans doute & des considerations , &

des intereſts vn peu diuers, ſelon la difference de ces relations: mais que la prudēce Politique & Chreſtiēne neantmoins, ſçait fort bien accorder enſemble. En ce qu'ils font profeſſion du Chriſtianisme, non ſeulement ce n'eſt pas merueille s'ils s'affectionnent à l'auancement de la creance qu'ils ont embrassée, mais il ſemble que chacun ſe doit eſtimer obligé en ſa conſcience de le faire, & que c'eſt vn inſtinct de la pieté. Car puis qu'il y va du ſeruice de Dieu, ce n'eſt pas en eſtre zelateur que de ne le prouigner pas autant qu'on peut, ſelon la perſuaſion qu'on en a; & puis qu'il y va du ſalut de l'homme, ce n'eſt pas eſtre émeu de charité comme il faut, que de ne taſcher pas de ramener au bon chemin ceux que l'on penſe qui s'en égarēt. Neantmoins ny ce zele ny cette charité ne les doit point porter entant que Chreſtiens, au delà des termes de la douceur & de la raiſon, ſeules voyes cōuenables pour faire entrer la religion de Ieſus-Chriſt dans la conſcience des hommes. Ny luy ny ſes Apoſtres n'y ont point employé le fer & le feu, & s'il eſt arriué que l'Euañgile qu'ils ont annoncé, ait eſté cauſe dans le monde de quelques combuſtions, cela eſt arriué

par le vice de l'esprit humain, contre la nature de la doctrine de salut, & contre le dessein de son auteur & de ses Ministres. Entant qu'ils sont Princes & Potentats, ce n'est pas merueille non plus s'ils souhaitent que leurs sujets ne se bigarrent point en religions, & semble mesmes que leurs interets les y portent. Car leur gloire & leur grandeur consiste en l'entiere obeïssance de leurs sujets, en la tranquillité de leurs Estats, & en l'vnion des parties qui les composent. Or est-il trop ordinaire que la diuision des sentimens & des creances partage les affections, & n'y a point de si violente passion que celle qui s'allume dans la conscience. Quand donc la diuersité des sentimens passe en difference de factions, il est comme impossible que le Prince, tant par le mouuement de sa conscience, que par la profession qu'il fait exterieurement, ne se declare pour l'un des partis contédans, & qu'ainsi il n'affoiblisse beaucoup, s'il ne perd mesme tout à fait le respect & l'obeïssance qu'il deuroit attendre de l'autre. C'est pourquoy tous Potentats s'opposent au commencement à toutes innouations, & nos Rois entre les autres, ou de leur propre mouuement, ou

par la suggestion de leurs Conseils, ont employé tout ce qui se peut imaginer de rigueur, pour estouffer dans leur Estat la Reformation en sa naissance. Enfin pourtant l'experience des choses leur a donné d'autres inclinations. Car pource que les prisons, & les gibbets, & les feux, dont on s'estoit serui pour en arrester le cours pendant le regne de François premier & de Henry second, ne peurent empescher que nostre doctrine ne gaignast dās toutes les parties du Royaume, tellemēt que l'Estat estoit alors partagé quasi également, & que sous le regne de François second ny le mal heureux succès de l'entreprise d'Amboise, ny la prison du Prince de Condé, ny la continuation de la persecution contre les autres, n'empescherent pas qu'ils n'allassent merueilleusement multipliant, la Reyne Catherine de Medicis, & ceux qui gouuernoient l'Estat sous la minorité de Charles, creurent qu'il valoit mieux consentir à vne chose que l'on ne pouuoit empescher, & donner quelque liberté à la ferueur d'un zele absolument inuincible. Ainsi fut fait l'Edict qu'on appella de Iauier, par lequel ceux de la Religion eurent la liberté de leurs exercices dans les faux-



bourgs de toutes les villes, & generale-  
ment par tout où ils estoient en quelque  
nōbre considerable : de sorte qu'il s'en for-  
ma deux mille Eglises cōme en vñ momēt.  
En quoy la Reyne Catherine, & les Prin-  
ces & Ministres de l'Estat firent sans doute  
ceder le zele de religion à la prudence po-  
litique, cōme il est souuent absolument  
necessaire en telles occasions : & c'est cho-  
se qui n'est nullement desagreable à Dieu,  
quand on y est obligé par la necessité des  
occurrences. Car la Religion ne pouuant  
subsister sinon par la subsistence des Em-  
pires politiques, lors que les choses en sont  
venuës à tel point, que pour empescher le  
progrez de quelque innouation, on met  
toute la Republique en peril, il est & de la  
pieté & de la sagesse de ceux qui en ont le  
gouuernement en la main, de pouruoir à  
ce que l'vne ne s'estouffe pas enfin sous les  
ruines de l'autre. Et si on eust perseueré en  
cette bonne pensèe, on eust espargné à  
l'Estat les espouventables confusions des  
guerres ciuiles, qui l'ont mis à deux doigts  
de son tombeau. Mais l'ambition de quel-  
ques-vns, & l'effroy & l'impatiēce des au-  
tres, & la suggestion des conseils de Rome  
notamment, ayant incontinent troublé le

repos de la France par l'infraction de cét  
Edict, & par les choses qui vinrēt apres, on  
ne sçauroit dire quelles horreurs ont esté  
exercées de l'vn à l'autre parti par l'espace  
de plus de trente ans. Et nous nous fussions  
asseurément entr'exterminiez, sinon qu'en  
fin Henry le Grand, de glorieuse & im-  
mortelle memoire, ayant reconquis son  
Royaume de la main de ses ennemis, ter-  
mina ces calamitez par l'Edict de Nantes,  
& reünissant tous ses sujets sous son obeis-  
sance, sans violenter la conscience d'au-  
cun, esteignit autant que la prudence le  
permettoit, la semence de ces desordres.  
Ce qui luy reüssit si bien, que neuf ou dix  
ans de paix apres ces longues & conti-  
nuelles desolations, remirent le Royaume  
en vn estat si puissant & si fleurissant, que  
quand cét incomparable Prince nous fut si  
mal-heureusemēt rauy, il estoit non con-  
siderable seulement, mais redoutable à  
toute l'Europe. Sous le regne du feu Roy  
il est arriué quelques choses, qui ont deux  
ou trois fois interrompu le cours de cette  
felicité. Mais neantmoins diuerses consi-  
derations luy ont tousiours fait solennel-  
lement declarer, qu'il ne vouloit aucune-  
ment entamer la liberté que le Roy son

pete auoit donnée à ses sujets en ce qui est de leur religion, ny rien changer en l'establisement qu'il auoit fait par son Edict. Car premierement le Roy son pere l'ayât fait *perpetuel & irreuocable*, & luy-mesme à son aduenemēt, & depuis à diuerfes fois, l'ayant confirmé comme tel, ainsi qu'il estoit Prince genereux, il a creu que la souueraineté independante de sa Couronne, & la puissance illimitée de sa Majesté ne le dispensoit pas de l'obligation de sa parole, & de ses promesses, en l'observation desquelles Dieu mesme met vne notable partie de sa gloire & de sa grandeur. Car bien qu'il soit infiniment plus esleué au dessus des Rois, que les Rois ne le sont au dessus de leurs sujets, & que quand il manqueroit aux conuentions de ses alliances, ses creatures pourtāt ne pourroient l'en tirer en iugement, si est-ce que plus il est grand, plus estime-t'il qu'il luy conuient d'estre iuste, & par consequent exact à l'execution de ce qu'il a promis, quād vne fois il a engagé sa parole. Apres cela Henry le Grand ayant estimé qu'en l'observation de cette sienne ordonnance, *consistoit le principal fondement de l'vniō de ses sujets, de la tranquillité & du repos de son*

*Estat, & de son reſtabliſſement en ſa premiere ſplendeur*, comme le Roy ſon fils eſtoit prudent, il a bien apperceu qu'il en eſtoit veritablement ainſi; & que le danger eſtoit evident, ſi l'on renuerſoit ce fondement; de rejeter le Royaume dans les anciēnes diuiſions, & de l'expoſer en proye à l'ambition eſtrangere. Enfin il auoit reconnu que le zele de religion, qui auoit porté ſes predeceſſeurs, ou à n'accorder rien, ou à rompre les Edicts qu'ils auoient accordez aux Reformez, auoit apporté ſans comparaiſon plus de dommage à la pieté en general, & meſmes en la religion qu'ils profeſſoient, que d'affoibliſſement & de diminution à celle qu'ils vouloiēt eſteindre. Car outre que chacun ſçait que les guerres ciuiles produiſent la licence & le débordement en la vie, & la profaneté & l'irreuerence aux choſes diuines, & qu'en s'eſforçant d'étouffer la religion d'autrui, on s'accouſtume à meſpriſer la ſienne propre: la Romaine n'eſtoit aucunemēt pratiquée où les Reformez eſtoient les plus forts, & où ils ne l'eſtoient pas, ſi n'eſtoit-elle exercée ſinon avec trouble & incommodité, par tout où ils pouuoieiēt porter le tumulte de leurs armes. Comme donc ce Prince eſtoit

estoit singulierement deuotieux en sa cre-  
ance , il a creu que pour le bien & l'auan-  
tage de l'Eglise Romaine , il falloit laisser  
cette liberté à la Reformée en son Royau-  
me. Et nous voyons que depuis la Regence  
de la Reyne, le gouuernement de l'Estat  
roule touîjours dessus les mesmes maximes  
d'un train égal : ce qui a maintenu les su-  
jets du Roy en vne parfaite vnion , con-  
serué l'obeïssance qu'ils doiuent à leur sou-  
uerain , & donné le moyen de continuer  
les grandes & glorieuses conquestes que  
le feu Roy auoit commencées. Quant à ce  
qui est des Magistrats inferieurs , il me  
semble qu'ils doiuent regler toute leur  
conduite en cet égard , par ces deux ou  
trois pensees. L'une est, qu'ils doiuent pre-  
sumer que si Dieu les auoit appelez près  
de la personne des Rois, pour auoir part  
en leurs conseils, ils auroient les mesmes  
considerations que ceux qui ont les pre-  
miers conseillé ces Edicts , & qui mainte-  
nant encor les entretiennent. Ny les Po-  
tentats , ny leurs Ministres ne sont pas  
moins deuotieux qu'eux , & leur zele ne  
seroit pas moins vehement , si d'autres  
égards n'en temperoient l'ardeur & la  
violence. Puis donc qu'ils ont souffert que



ces raisons d'État y apportassent de la moderation, & que depuis que les choses ont esté ainsi establies par l'autorité des loix publiques, ils ont estimé que leur foy y estoit engagée, & qu'ils ne la pouuoient violer sans flestrir leur propre gloire, & ternir en quelque façon le lustre de leur grandeur, les autres doivent volontiers reuestir les mesmes sentimens, & ne prendre point à des-honneur de se conformer aux grands exemples. La seconde est, que comme ils ont deux relations, l'une de Catholiques Romains; ce qui régarde le seruice qu'ils pensent deuoir à Dieu selô leur profession; l'autre d'Officiers du Roy, ce qui concerne le seruice qu'il faut qu'ils luy rendent en l'administration de leurs charges: comme ces deux relations sont fort distinctes, aussi en doivent-t'ils tres-soigneusement distinguer les fonctions & les operations. Car quant à la premiere, qu'ils ayent à la bonne heure toute la ferueur de zele qui se puisse imaginer, & qu'ils escoutent les exhortations de ceux qui les y enflamment. Peut-estre que l'Esprit de Dieu les illuminera quelque iour autrement, & quand ils seront autrement esclairez, ils porteront cette vehemence de leur pieté

sur d'autres meilleurs objets que ceux qu'on leur presente ordinairement, & dont ils tireront plus de consolation pour leurs consciences. Mais tant y a entant qu'ils sont Catholiques Romains, ils sont personnes particulieres, & par consequent cette deuotion ne doit pas aller plus auant, sinon d'oüir quant à leurs personnes les Messes bien diligemment, de vacquer aux Sermons assiduellement, d'assister aux Processions avec soin, de communier le plus frequemment qu'ils pourront, & de pouruoir à ce qu'en leurs maisons la mesme deuotiõ regne entre leurs domestiques. Mais quant à la seconde, ils ne doiuent dans les fonctions qui en dépendent, regarder à autre chose qu'à la volonté du Souuerain, comme elle est declarée en ses Edicts, afin de s'y conformer exactement en toutes occurrences. Car quand il ne seroit point à presuposer que s'ils auoient esté appelez au Ministere de l'Estat, ils se laisseroient conduire aux mesmes raisons qui ont induit ces grands Rois à les nous donner, ce n'est pas à leurs Officiers à iuger des motifs qui les y ont portez, ny à pretendre de corriger par les mouuemens de leur pieté, les fautes que la prudẽce Politique auroit

fait commettre contre la Religion Romaine. S'il y en a quelqu'une en cette conduite, c'est aux Rois à en répondre devant Dieu. Quant aux Magistrats inférieurs, lors qu'il faudra comparoître en iugement devant nostre Seigneur, pour rendre raison de leurs actions en cette qualité, on ne leur demandera pas s'ils ont esté grands zelateurs de la Foy de Christ; car cela regarde la relation qu'ils ont en qualité de personnes particulieres: mais s'ils auront esté fideles dispensateurs de ce que le Prince leur a commis, pour rēdre la iustice à tous ses sujets, selō les regles qu'il leur en auoit données. En quoy s'ils ont plustost suiuy la suggestion de quelques-vns, dont le zele est inconsideré, seditieux & turbulent, que la volonté du Souuerain, comme elle est expliquée en ses loix, assurément ils n'en remporteront point de contentement de devant le grand & vniuersel Iuge du monde. La troisieme finalement est, que les Officiers de Iudicature ne sont point installés en leurs charges qu'ils ne prestent serment solennel de iuger selon les Ordonnances des Rois, & de suiure leurs volontez en l'administration de la iustice en toutes choses. Or chacun sçait quelle est

l'obligation du serment, & comment elle doit estre absolument inuiolable. Certes celuy qui sous pretexte de pieté enuers Dieu en ce qui regarde la Religion, viole le serment qu'il a fait au Roy en ce qui est de son seruice & de la cōduite de son Estat, certuy-là ne sert ny Dieu ny le Roy, & commet vn crime digne de punition, tant de la part de son Souuerain en ce siecle icy, que de celle du Souuerain des Souuerains en l'autre. Enfin, pour ce qui est des peuples, ils ont aussi deux qualitez; l'une de Chrestiens, & l'autre de sujets du Prince. Quant à l'une, ils sont obligez de viure conformément aux loix de Dieu, selon la connoissance qu'ils en ont; quant à l'autre, ils sont tenus de se comporter conformément aux loix de l'Estat, cōme elles y ont esté publiées. Puis dōc que les loix de Dieu sont qu'ils destrampent tout leur zele en debonnaireté & en charité, & que les loix du Prince sont qu'ils repriment leurs passions par la considération de la paix commune, & par le respect qu'ils doiuent à sa volonté, tant s'en faut que les paroles injurieuses, & les traitemens violents leur puissent estre permis, s'ils veulent auoir la louange de bōs sujets & de bons François,

que mesmes ils ne sçauroient estre bons Chrestiens , s'ils ne bannissent de leurs cœurs toute auersion contre nous , & s'ils ne nous portent vne affection veritablement cordiale. Nous les en supplions donc tres-affectueusement , & les en conjurons par la bonté de Iesus-Christ , par les entrailles de sa charité, par la gloire de sa verité, par le precieux depost de sa paix, qu'il a laissé à ses Disciples autrefois, & par l'incomparable douceur dont il leur a donné le patron en sa conuersation en la terre. Neantmoins si nous ne pouuons obtenir qu'ils se monstrent veritablement Chrestiens enuers nous par les effets de leur humanité , c'est à nous à nous efforcer de nous monstrier tels enuers eux par tous offices de charité, & par vne inuincible patience. Car nostre bon maistre nous a commandé que nous aimions nos ennemis , que nous benissions ceux qui nous maudissent , que nous fassions du bien à ceux qui nous haïssent, & que nous prions pour ceux qui nous persecutent & nous courent sus. C'est ainsi qu'il dit que nous ferons voir que nous sommes enfans de nostre Pere qui est aux Cieux, & que nous représenterons l'image de cette diuine



pour ceux de la Relig. 327  
perfection de charité, dont il nous four-  
nit l'exemple.

F I N.

---

A P P R O B A T I O N.

Cette Apologie a esté veüe & approuvée par  
Messieurs de la Cantinaye & Vacher, Pasteurs  
des Eglises de Baugé & de l'Isle Bouchard, Com-  
missaires ordonnez pour les livres de Religion en  
cette Prouince.

T A B L E.

**D**Essein de l'Ouvrage, pag. 1.  
Seët. I. Que si on considere ceux de la Re-  
ligion dans les devoirs auxquels ils sont obli-  
gez envers les autres entant qu'hommes, ils  
ne sont dignes de l'aersion de qui que ce soit,  
pag. 11.

Seët. II. Que si on considere ceux de la Reli-  
gion dans les devoirs auxquels ils sont obli-  
gez envers le Roy & l'Estat, entant que  
François, ils ne sont point dignes de l'aer-  
sion de qui que ce soit, pag. 38.

Seët. III. Que si on considere ceux de la Re-  
ligion en qualité de Chrestiens, ils ne meri-  
tent l'aersion de qui que ce soit. Et premie-

# T A B L E.

rement à l'esgard des creances qu'on leur  
impute contre verité, pag.82.

*Seët. I V.* Que si on considere ceux de la Reli-  
gion à l'esgard des choses qu'ils ne croient  
pas, ils ne meritent point d'aersion. Et pre-  
mierement touchant l'innuocation des Saints,  
l'adoration des Images, & le Purgatoire,  
pag.136.

*Seët. V.* Que pour ne croire pas ny la Trans-  
substantiation, ny le sacrifice de la Messe,  
ceux de la Religion ne meritent point l'aer-  
sion de personne, p.165.

*Seët. V I.* Que ceux de la Religion ne sont point  
dignes d'aersion, ny pour ne deferer pas à  
l'autorité de l'Euesque de Rome comme il  
le veut, ny pour s'estre separez de la commu-  
nion de l'Eglise Romaine, p.198.

*Seët. V I I.* Qu'en ce que ceux de la Religion  
croient effectiuement, ils ne sont dignes de  
l'aersion de personne; au contraire, qu'ils  
doiuent estre tenus pour bös Chrestiens, p.238.

*Seët. V I I I.* Qu'en ce que ceux de la Religion  
font en leurs exercices de pieté, en consequen-  
ce de leurs dogmes, il n'y a rien qui merite  
qu'on ait aucune aersion pour eux, p.282.

*Conclusion,* p.313.

F I N.





3865-216-

S. G.  
O. H. H.



